

ИЗ СЛАВЯНСКОГО ПЕРЕВОДА КОРПУСА СОЧИНЕНИЙ ДИОНИСИЯ АРЕОПАГИТА С ТОЛКОВАНИЯМИ МАКСИМА ИСПОВЕДНИКА

О НЕБЕСНОЙ ИЕРАРХИИ

ПРЕДИСЛОВИЕ ПЕРЕВОДЧИКА

Понеже убо мнози предъ многими времени и лѣты и по различных мѣстѣх обрѣтошася въ словенскомъ нашемъ языкѣ, прелагающе Божественая Писания от многопремудраго и художнаго, зѣло скупаго еллинскаго языка въ нашъ языкъ, ихже имена не чловѣкы токмо вѣдома суть, нѣ въ книгах паче живых Богомъ написанна суть, ихже послѣжде и лѣты и наказаниемъ и художествомъ разума еллинскаго языка, вяще же добрыми дѣлы, и къ вечеру солнечнаго дне, захода седморичнаго реку вѣка* и моя жизни скончаниа, случися и мнѣ навикнути мало гречьскаго языка, — толико, елико мощи ми разумѣти скупость того и тяжесть прилагания от оного в нашъ языкъ.

Гречьскый бо языкъ ово убо от Бога исперва художень и пространъ бысть, ово же и от различных по временех любомудрець ухыщренъ бысть. Нашъ же словѣнскы языкъ от Бога убо добрѣ сътворенъ бысть, понеже вся, елика сътвори Богъ, зѣло добра, нѣ улишением любоучения любочестивых слова мужей хытрости, якоже онъ, не удостоися.

И убо колико-любо аще от оного навыхохъ, не хотѣх коснутися сущих паче мене, рекше прѣлагати от гречьскаго языка въ нашъ, — по реченному: высочайших тебе не ищи и глубочайших тебе не испытуй. Бояся и оного, еже пострадаша и въ Ветхомъ и Новѣмъ Писании, иже преобидяще дерзостнѣ съмѣшаше божественых прикоснутися.* Нѣ обаче божественымъ сим мужемъ, преосвященнымъ глаголю митрополитомъ богоспасенаго града Сира кир Феодосиемъ* и пречестнымъ, принужденъ быхъ на превождение.

И влѣпоту бо мню бѣ таковому мужу, иже от аггелъ, по великому Дионисию, просвѣщение приемлющу, без разуждения повинутися. Съи бо убо истинный Божий чловѣкъ, аще и кто другый, житие убо сладко слышатися имаше, спасително же подражати се и полезно. Не токмо бо языкъ въ учени имаше полезенъ слышашимъ, нѣ и житие много множае подражающимъ полезно. Паче же подобает ми истинное рещи: елико языкъ убо, вѣнегда глаголати,

неуподобляемъ имаше, толико и житие, вьнегда творити е, непостижимо. Всегда бо и присно, по апостолѣ: «Задняя забываете»,* — на предняя дѣяния и видѣния простирашеся. И сие свѣтлое любочьстна, и любоимѣния, и премудрости вькупѣ съ милостынею имаше, яко не многих быти вторый. И сие оному блаженому сия и ина не мала, елика къ благоугождению, приходящу и многих симь собою дѣлами учащу, аз же не подрѣзнувъ, ни же на свою крѣпость слова и разума надѣся, — не буди то! — нъ симь, якоже рѣхъ, понужденъ бывъ и на того богомолителныя и светыя молитвы надѣся, почая и преложих светаго Дионисиа Ареопагита споспѣшениемъ и ексодем,* или откупомъ, сего светого ми владыки и заступника.

И ина прежде сего преложих, и по семь — елика всещедрый светыми его молитвами дастъ Богъ.

Бою же ся рещи, яко азъ преложих светаго Дионисиа, аще и преложих его, — сматряя непостижимую не малы высоту богословиа, и светого крайнюю премудрость, и тину моих грѣховъ добрѣ съвѣды.

Книгу же убо сию, светаго Дионисиа глаголю, в добра убо времена почаяхъ, егда божественыя убо церкви и Светаа Гора* раеви подобнѣ цвѣтяху, якоже нѣкый садъ при источницѣхъ, присно напааемъ. Сверхих же ту въ злѣйше всѣхъ злыхъ временъ когда, егда огнѣви Богъ христиане западныхъ странъ.*

И подвиже деспоть Углеша* вся сербьскыя и гречьскы войска, и брата своего Волкашина краля,* и иныя велможа многыя нѣгде до шестидесят тысущъ избранныя войска, и поидоша въ Македонию на изгнание туркъ,* не судивше, яко гнѣву Божию никтоже мощень противустати. Тѣхъ убо не изгнаша, нъ сами от нихъ убиени быша, и тамо кости их падоша и непогребенни пребыша. И много многое множьство ово убо вьостриемъ меча умроша, ово же въ заплѣнение ведено бысть. Нѣции же их, и гонезнущие, приидоша.

И толика нужда и злолютыя облия вся грады и страны западныя, елико ни же уши слышаста, ни же очи видѣста. По убиении бо мужа сего, храбраго деспота Углеша, просыпашася измалтяне и полетѣша по всей земли, якоже птица во воздуху, и овѣх убо от христианъ мечемъ закалаху, овѣх же въ заплѣнение отвождаху. А оставших смерть безгодна пожьже. От смерти же оставшаа гладомъ погублени бывше, таковой бо глад бысть по всѣхъ странах, яковый же не бысть по всѣхъ странах от сложения миру, ни же потомъ таковой, Христе милостивый, да будетъ! А ихже гладъ не погуби, сихъ попущениемъ Божиимъ волци, нощию и дению нападаючи, снѣдаху.

Увы, умилень позоръ бѣ видѣти: оста замля всѣхъ добрыхъ пуста: и людей, и скоть, и иныхъ плодовъ. Не бо бѣ князя, ни вожда, ни наставника в людех, ни избавляюща, ни спасающаго, нъ вся исполнишася страха измалитьскаго. И сердца храбрая доблестныхъ мужей въ женъ слабѣйшая сердца

приложишася. В то бо время и племя сръбскихъ господъ, седми мною родъ, конецъ приять.* И въистину тогда ублажаху живии преже умершихъ.

И вѣруйте ми: не азъ, иже невѣжда по всему есмь, нъ и онъ премудрый въ елинѣхъ Ливаніе,* не бы могль писаниемъ представити нужду, яже постиже христианъ западныхъ странъ.

Хотящей же убо преписовати и прочитати сию книгу, милостиви и неззорливи, молюся, будите моей ума немощи и недостатку и сами, понеже и вы чловѣци и чловѣчьскимъ подъялежаше, яко требуете милости от Бога и прощениа от чловѣкъ, прощению вашему и мене сподобляйте, у Бога испрашающе оставление безднѣ моего окаанства грѣхомъ.

И имже въ инокихъ мене худаго аще хощещи увѣдети, начало тому есть осмеричное число, среда же двосьтное и первое, конецъ же десято съ единѣмъ наскончавается.*

Лѣто же тогда течаше 6-тысячное, 8-сѣтное, 70 и 9-е, индиктионъ 9.*

Давшему же Богу и начати сия, и съвершити благоизволшему, — слава, честь и поклоняние въ бесконечныя вѣки. Аминь.

О НЕБЕСНОЙ ИЕРАРХИИ

Сие петънадесете главизны объемлетъ еже «О небеснѣмъ священноначелии» слово:

1. Яко всако божествное осиание, по благности различнѣ въ промышляемаа происходе, прѣбываетъ просто, и не се тъкмо, нъ и съединенно творить осиаваемаа.

2. Яко подобнѣ божествнаа и небеснаа и отличными знаменми изьявляемаа суть.

3. Что есть священноначелие, и что въ священноначели полза. Прѣдѣль священноначелия.

4. Что назнаменуеть еже аггель именованіе.

5. Почто вса небеснаа сущствіа отдолѣ общѣ аггелы глаголютсе.

6. Что прьво небесныхъ сущствъ удобреніе, что срѣдне, что послѣдне.

7. О серафимѣхъ, и херувимѣхъ, и прѣстолѣхъ, и о прьвом, ихъ священноначелии.

8. О господствѣхъ, и силахъ, и властехъ, и о срѣднемъ ихъ священноначелии.

9. О начелѣхъ, и архаггелѣхъ, и аггелѣхъ, и о послѣднемъ, ихъ священноначелии.

10. Повъсприетіе и събрание аггельскаго благочинія.

11. Почто все небесные силы и существа общѣ силы небесные глаголютсе.

12. Почто иже въ чловѣцѣхъ священноначелници аггелы глаголютсе.

13. Почто от серафимъ глаголетсе очиститисе пророкъ Исаиа.

14. Что назнаменуеть прѣданное аггельское число.

15. Кыи изьобразителнии аггельскихъ силъ образы. Сия вса въ петънадесетой главизнѣ:

- 1) что еже огневидное,
- 2) что еже чловѣковидное,
- 3) что очеса,
- 4) что ноздры, что уши,
- 5) что уста,
- 6) что осезание,
- 7) что обрѣви и вѣжде,
- 8) что юность,
- 9) что зубы,
- 10) что рамена, и мышце, и руки,
- 11) что сердце,
- 12) что прѣси,
- 13) что плещи,
- 14) что ноги и крила,
- 15) что нагота и еже необуvenное,
- 16) что одѣвание,
- 17) что свѣтлаа риза,
- 18) что святительскаа одежда,
- 19) что поясы,
- 20) что жѣзлы,
- 21) что копиа, и сѣчива, и землемѣрите-
- 22) лнаа, и дрѣводѣлскаа орудия,
- 23) что вѣтры, и облаци, и мѣдъ, и илектронь,¹
- 24) и лица,
- 25) что еже львовидное, еже воловидное, еже орловидное,
- 26) что коны, и различия конскихъ мастей, и колеснице, и кола, и прочаа, что глаголемаа радость аггельскаа.

¹ *Маргиналий:* Илектронъ есть ками... ..ликийъ ...нѣ та... ..поема ...тъльз...

Гранословіа о книзѣ светого Дионусіа:

От великаго Дионусіа словь
 Не убо кто обрѣшетъ книгу скупѣйшу,
 Всако праведнѣ, ни же высочайшую,
 Аще сія висока, сребро и порфіра.

Надѣписание въ блаженнаго Дионусіа:

Аггелъскыя прѣмудрости свѣтлости многыя разумѣвъ,
 Чловѣкомъ явилъ еси видѣти умосьставную Звѣзду.

СЪСВЕЩЕНИКУ ТИМОФЕЮ — ДИОНУСИЕ СВЕЩЕННИКЪ О НЕБЕСНѢМЪ СВЕЩЕННОНАЧЕЛСТВѢ²

ГЛАВА 1. ЯКО ВСАКО БОЖЕСТВЕННОЕ ОСИЯНИЕ,
 ПО БЛАГОСТЫ РАЗЛИЧНѢ ВЪ ПРОМЫШЛЯЕМАА ПРОИСХОДЕ,
 ПРѢБЫВАЕТЪ ПРОСТО, И НЕ СЕ ТЪКМО,
 НЬ И ЕДИНОТВОРИТЬ ОСИАВАЕМАА

1. «Всако дание благо и всакъ даръ съвршениъ свыше есть, сходяей отъ Отца свѣтомъ».³ Нь и всако отцедвижнаго свѣтоявления прошствие въ насъ благодатнѣ приходимо, пакы яко единотворна сила въиспръноснѣ насъ въспростираетъ и обращаетъ къ Събирателя Отца* единству и боготворной простотѣ. Ибо «отъ Того вса и въ Томъ»,* якоже священное рече Слово.

2. Прочее, убо Исуса призвавше, иже отечскый «Свѣтъ», иже сый, «иже истинный, иже просвѣщаетъ всакого чловѣка, гредущаго въ миръ»,* имже еже къ свѣтоначелнику Отцу* приведение имѣхомъ, на священныхъ Словесъ

² Сказание надписанию. Понеже надписание «свещенноначалие» имать, нарицати обыче священноначелники епископы, длжно есть вѣдѣти убо, яко священноначалие убо есть еже завѣщания самого священныхъ начело и образомъ нѣкимъ попечение, и священноначелникъ — иже священными начелствуе, и пекуйсе, и промышляе, не убо священници, нь — иже яже священнаа и уставъ ихъ же и церкви и таинъ различниа, не убо же священноначелникъ. Сие же тлкование и самъ великий Дионусіе долѣ прѣдлагаеть въ иже «О церковничьскомъ священноначелии» словѣ.

Маргиналий: И священникъ бо священнаа суть; того ради отъ общаго, рекше отъ священнаго тогова, словится священноначелникъ, а не отъ священника. Священная же начелствуя явѣ священници, понеже и тии священни.

Продолжение схолии: Знаменай же, и яко священника име и епископа являеть, зане яко священникъ есть и епископъ. И се являетсе и въ «Дѣбаниахъ светыхъ апостоль», идеже въ Асии съчиняетсе церквамъ ее светый апостоль Павль.*

³ Знаменай, яко светаго Иакова Съборнымъ посланиемъ* приемлетъ блаженный Дионусіе, оттуду бо речение есть, и яко изданно уже бѣ.

отцепрѣдательна⁴ осианиа якоже мощно естъ възмагаимъ, и яже от тѣхъ знаменателнѣ⁵ намъ и възводителнѣ изъявленна небесныхъ умовѣ⁶ священноначелствиа, коль мощны есмы, узримъ. И еже начелное и прѣначелное⁷ богоначелнаго Отца свѣтодание, еже аггель намъ образними знаменми изъявляеть блаженна священноначелствиа, невеществными и неизблемыми ума очесы приемше, паки отъ того на простую того възникнемъ зару.

И бо ниже сиа коли своего единствнаго внутрънства⁸ оскудѣваеть къ възвождению же и единотворному промыляемыхъ растворению,⁹ благолѣпнѣ множещисе и происходещи, прѣбываетъ внутръ себе тврѣдстнѣ въ недвижимоу тождствѣ прѣбывателнѣ вдруженна и иже на ту, якоже праведно естъ, възимающеисе по мѣрѣ тѣмъ всиаваеть и единотворить по простотнѣмъ ее единствѣ. Ибо ни же мощно инако намъ всиати богоначелной зарѣ, аще не различиемъ священныхъ завѣсь¹⁰ възводнѣ прикрываемой и сущимъ у насъ промыслоу отечьскимъ съестствнѣ и свойствнѣ указанной.

3. Тѣмже и преподобнѣйшее наше священноначалие Служьбнство Священноположно¹¹ небесныхъ священноначелствѣ прѣмирному уподобленю сподобивъ, и реченна невеществнаа священноначелствиа вещественными образы и зрачными сложенми¹² уразличивъ, прѣдасть, яко да по мѣрѣ мы сами отъ священнѣйшихъ зданий¹³ на простие и необразие въземсе възводей

⁴ Отце zde являеть прѣдавшеи ему прѣдание, не убо же естественые, от еллин бо бѣ, якоже сказуютъ «Дѣяниахъ свѣтыхъ апостоль»* и сам же въ еже къ светому Поликарпу посланию* и въ 9 главѣ «О небеснѣмъ священноначелии».*

⁵ Знаменателнѣ. Знаменми нѣкоими глаголетъ и образи, не бо естествословнѣ.

⁶ Умове наричутъ и иже отъ еллинъ прѣмудры разумные, сирѣчь аггелскыя силы, понеже все умъ естъ кждо ихъ и существо все умъ живъ въ вид себѣ възсущствлено имать.

⁷ Прѣначелный же Богъ, яко паче всакого начела и богоначелны свѣтъ, яко начело глаголемыхъ богъ, — аггель, глаголю, и чловѣкъ праведныхъ.

⁸ Внутрънство глаголетъ съкрывенство, всѣмъ бо сущимъ внѣ тое недовѣдома естъ.

⁹ Знаменай «растворение» и почто Божество, едино сущее, множитсе.

¹⁰ «Завѣсы» глаголетъ яже тѣлеснѣ о Бозѣ глаголема въ Писанияхъ, рекше удѣ чловѣчскыхъ, или силъ нѣкоихъ именованиа. Знаменай же, яко кромѣ образъ и знамений не мощно намъ, въ плѣти сущимъ, узрѣти невеществнаа и бесплѣтнаа. И се паче являю яже въ скини завѣшениа, якоже zde гадаеть.

¹¹ «Служьбнство Священноположно» — божественное священныхъ таинствѣ нашихъ удобрѣниа положеніе и прѣдложеніе естъ начело бывше отъ Бога апостольми съвршителными сихъ благихъ. Наученние бо съвршеннѣхъ наричеть божественный апостоль Павелъ, глаголе: «Елици убо съвршенныи, се да мудрствуемъ».* *Маргиналий*: «Служьбнство священноположно» zde разумѣй небесно священноначалие.

¹² Знаменай же, кые глаголетъ «образе и зрачнаа сложеніа», рекше изобразеніа, яже напрѣдѣ прѣдлагаеть.

¹³ Знаменай, яко зданновиднаа глаголетъ яже zde таинствѣнаа прѣданіа, яже въ иже «Церковномъ священноначелии» словѣ отврѣзаеть. Се же боголѣпнѣ достоить разумѣти. Къ убо «зрачнымъ» «назденіе» въздаждъ, къ «сложенію» же «простаа и невобразяемаа».

подобия, понеже ни же мощно есть нашему уму къ невестственному оному възетисе небесныхъ священноначельствъ подобию и видѣннью, аще не еже отъ сихъ вещнымъ руководениемъ¹⁴ потрѣбуеть яже убо видимые доброты¹⁵ невидимаго благолѣпия изьображения помышляе, и яже чювьствнаа благоуханна вьображенна умнаго прѣподанна, и безвеществнаго свѣтоданна образъ вещьнаа свѣтила, и еже по уму зрительнаго съвршениа Божественныхъ Писаний прочитанне,¹⁶ и еже съгожденнаго къ божественнымъ съчиненнаго имьства,¹⁷ иже овдѣшьянаго украшенна чины и Исусова приобщенна божественнѣйшаго благодаренна причещенне, и елика инаа небеснымъ убо сущьствомъ прѣмирнѣ, нам же образнѣ прѣдашесе.

Сиего убо ради нашего по мѣрѣ обоженна чловѣколюбное Службоначелие и небеснаго священноначельства намъ указуе,¹⁸ и съслужителя ихъ съвршае еже у нас священноначалие, еже прѣма силѣ нашей уподоблениемъ боговиднаго ихъ освещенна чювьствными образы прѣнебесные написа умове въ священнописателныхъ словесъ¹⁹ слозѣхъ, яко да убо нас възведеть²⁰ чювьствныхъ ради на умна и от онѣхъ священнозданныхъ знаменій на простие небесныхъ священноначельствъ врьхы.²¹

¹⁴ Вещное руководство глаголетъ еже вещными глаголемыми къ мысли възводитисе паче чювьствныхъ. «Видимые же доброты» яже священныхъ храмъ удобренна глаголетъ, «украшени же чины» — священникъ степены.

¹⁵ Знаменай же, яко видимые доброты образы суть невидимыхъ удобреней, якоже являет и апостоль въ иже «Къ Евреомъ», яже о сѣны зре, и Моуси слыше: «Вса по образу, показанном ти на горѣ, сътвори».*

¹⁶ Божественныхъ Писаний прочитанне есть яже видимыми и вещьми пространнѣйшаа указанна.

¹⁷ «Имьства» суть тамо божественнаа завѣщавающе. Имьство же есть качество прѣбывателно. Зде же и церковны чины тамошняа имьства за еже бесплътнаа образуютъ. Имьства бо бесплътныхъ суть.

¹⁸ Знаменати достоить, яко еже отъ нас, чловѣкъ, съвршаемо священничьское тайнослуженне подражанне есть небеснаго священноначелиа.

¹⁹ «Священнописателнаа же Словесъ сложенна» глаголетъ яже священнѣ о тѣхъ сложеннаа словеса въ Писаниихъ.

²⁰ Знаменай, како възводимсе на богословие и яко Христос нас възводитъ.

²¹ Ничтоже яко по прилучению именованно есть от блаженнаго сего, нь многоучителнѣ и истѣйше съ благочестиемъ. Понеже убо еже у нас завѣщанне образы вещными и сказанми и назданми рече съвршатисе по еже намъ мощно образъ сущей подражанне еже у аггель священнаго удобренна вѣлѣпоту еже въ нихъ священноявленне врьхъ нарече. Врьхъ бо и крайнее обыкоше звати иже о сихъ упразнившеисе коегождо сущьства чистѣйшее и къ нему же прилежитъ приближнѣ, сирѣчь приближно, сущьство. Якоже есть рещи, душе врьхъ есть умъ ея чистѣйши, и рачителства врьхъ прѣвъзъшьдшиихъ и божественнѣйшихъ топлотное желанне, и нашего убо священноначелиа и тайновиднаго удобренна врьхъ и крайнее чистѣйшее его от неже начетсе и еже близъ приходе невестествна. Еже убо чистѣйше въ нас знаменне врьхъ неизьображаемыхъ и простихъ и бесплътныхъ таньствъ, емуже священноначелие съвкупляемо приходить, образомъ нѣкоимъ къ чловѣкъ священноявленнью, и образы възводитъ на чистая видѣння умнаго служьбьства, врьху, глаголющусе вѣлѣпоту иже здѣ телесныхъ же и вешевидныхъ.

ГЛАВА 2. ЯКО ПОДОБНѢ БОЖЬСТВНАЯ И НЕБЕСНАЯ И ОТЛИЧНЫМИ ЗНАМЕНИИ ИЗЪЯВЛЯЕМА СУТЬ

1. Потрѣба же есть убо, яко мню, пръвѣе изложити кую убо быти мысль всакого священноначельства непшуемъ и что тогове коеждо съликъствники ползуетъ, прочее же небесная священноначельства въспѣти по еже тѣхъ въ Словесѣхъ изьявлению,¹ послѣдователнѣ же симъ рещи, кыми священными ображенми небесные изображаютъ доброты² Словесная священнописания и къ коей възвестисе подобаетъ назданий ради простотѣ, яко да не и мы подобнѣ инымъ несвещеннѣ възнепшуемъ небесные и боговидные умове многожние быти нѣкые и многоличные и къ воловъ скотъству или къ львовъ звѣрообразию въображенные, и къ орловъ погрѣбленокътну виду,* или къ птицъ власовну крилатоестествию созданные,* и кола нѣкотогаа огневидна на небесы* възмѣчтаемъ, и прѣстоле вещние Богоначелию къ сѣдению прикладные,* и коне нѣкые многопъстротные,* и съ копиями архистратиге,* и еликаа инаа от словесъ намъ священнѣздательнѣ въ различию изьявителныхъ знаменяхъ прѣдана быше. И бо явѣ богословие творителными³ священнозданми на безобразныхъ умовъ потрѣбова иже у нас, якоже речесе, умъ съвыше присѣтивъ и прискрняго тому и съестественаго възвода промысливъ и тому наздавъ възводителная священнописания.

2. Аще ли же нѣкоему мнитсе священная убо приемати сложения⁴ простиихъ от себе невѣдомыхъ же и незримыхъ намъ бывающихъ, неприкладна же мнить яже светиихъ умовъ въ словесѣхъ образописания и всако,

¹ Изьявление глаголетъ възвѣщение, явлено же, яко — еже знаменми изобразенми, яже и наздания рече; простоту же — еже естества невещественное.

² Въдѣше бо, яко въспѣвае иже въ небесѣхъ священние умове, якоже самъ глаголетъ, по Писанической нужди имѣше рещи о животныхъ звѣрообразныхъ, и орловѣхъ, и иныхъ, имиже уподобляютъ Божьствная Писания архагельские силы, глаголетъ бо: «Да не и мы, и якоже мнози, възнепшуемъ несвещеннѣ» не имѣти тлъкования многоличнымъ и многожнимъ чиномъ небеснымъ. Ся же убо изьяснити прѣдречесе, по священныхъ Словесѣхъ изьявлению.

³ Яко и творителными назданми приеть Писание рекъ. Подобна быти небесная знамения и ображения иже отъ творецъ мѣчтаемымъ, якоже священнъ си мужъ съ глаголетъ (творецъ же разумѣй или отъ еллинъ удивляемие (рекше Омира, Исиодона и прочее), или творителными, рекше наздателными изобразенми. Видѣвъ бо Божие прѣмудрое съхождение нашъ умъ немощнъ и къ височайшему неприкладнѣ имущъ, възведение тому съестственно наздавъ, сиче архагльская въ явленно приведе удобрения, не яко имуть истиную, изьяснивъ, нь како мы и можемъ разумѣти. Ничесоже неподобно мѣчтай яже небесныхъ.

⁴ Сложения глаголетъ реченная наздания и образотворения. «Отъ себе» же, сирѣчь, якоже имуть естествомъ, невѣдомы намъ, глаголетъ, и незримы суть.

яко рещи, отрочно⁵ само аггельских именъ подобие, и потрѣбно быти глаголетъ богословцем на тѣлотворение нѣкако бесплътных пришѣдшимъ ближними (*на поле рядом: самѣх тѣх виновна*) тѣхъ и яко мощно сѣродными наздавати же и изъявляти ображенми от иже у нас честнѣйших⁶ и безвещественных нѣкако⁷ и прѣвышележещихъ сущѣствъ, а не небеснымъ и боговиднымъ простотамъ⁸ яже на земли послѣдняя налагати многообразия (ово бо убо нашихъ и възводително хотѣше быти, и яже прѣмирная изъявления не свести въ неприкладная отличнства, ово же и въ божественные неправеднѣ досаждаеть силы и нашъ негли заблуждаеть умъ, въ несвещенная ть выгльбляе сложения, и рекше⁹ и възьмнитсе прѣнебесная львовъ нѣкоихъ¹⁰ и конь многих исполнятисе, и мръкательнаго пѣснословия, и птичияго ятоначелия, и животныхъ иныхъ,¹¹ и вещей безчестнѣйшихъ, елика къ безмѣстию и таимичеству и страсти¹² уклонитисе написують иже по всемъ отличная васнѣ изъявительныхъ Словесъ уподобления), нъ еже истины, якоже мню, прошение указуетъ юже въ Словесехъ священную прѣмудрость въ небесныхъ умовъ изображеняхъ, коеждо зѣло промысливъ,

⁵ Отрочно, мню, глаголати тому странно и рекше обычайныхъ отсѣченны путь и название. Сего ради и подобие то именуеть, изъявляе не истинны быти написанныи светыхъ аггель зраци. Ниже бо истинною таковы суть, яковыхъ тѣхъ Священное прѣдаеть Писание, нъ да мы приходимъ къ величствию ихъ. Сам же Дионусие покушаетсе сѣсложити реченная о нихъ и показати, яко мощно есть сказаний ради тако разумѣвати аггельская удобрения, якоже речеса.

⁶ Честнѣйша и невещественна отчести существа небо и звѣзды глаголетъ.

⁷ Нѣкако невещественныхъ, — сирѣчь отчести, не бо отнудъ безвещественныхъ. Прѣвышележащая же существа небо и яже на небеси глаголетъ, сирѣчь звѣзды, еже бо тѣнокчестное ихъ и единосущѣствное близъ есть невѣществия.

⁸ Боговидные простоты глаголетъ умная существа, невещественная бо суща и несложена всако суть, не суща сѣрастворение стихий. Телеса бо от сихъ, оне же бесплътне.

⁹ «И рекшее» здѣ сиче разумѣй, и како възьмнитсе небесная львовъ и иныхъ безчестныхъ наплньятисе?

¹⁰ Си зраци светихъ херувимъ и от божѣствнаго Езекиила,* и от дивнаго Иоанна въ «Откровении»* написани быше.

¹¹ Животна ина» рече, сирѣчь конь, и мськъ, и таковыхъ, «вещи же безчестнѣйшие», рекше прѣстоли, яко от дрѣвья, и кола, и оружия, и железа, якоже оружие истръженно при Валаамѣ* и еже виде Давидъ, якоже въ «Царствивихъ» реченно есть, въ книзѣ Второй.*

¹² «Страстнѣ» глаголетъ, понеже львообразие яростно нѣчто назнаменуеть, и телца видъ — похотѣвателное, яже страсти и великы суть. Уподобления же глаголетъ уподоблятельная мнѣния. Глаголетъ бо Иезекииль, яко подобие узрѣти прѣстола* и подобие льва,* еже являеть зданновидно мнѣщихсе мычтанье. Сего ради и здѣ реченно бысть «отличная уподобления»: не бо вса подобнѣ зрѣть пророкъ, нъ овѣхъ убо сиче, овѣхъ же сиче. Нъ отлични суть свѣсма, имиже мнется подобни, ничесоже бо льва или телца или прочихъ истиннѣ имуть. Что же являеть отличное, въ прочихъ обрѣщеши.

яко ниже въ божествънные,¹³ яко речеть кто, досадити силы, ниже убо въ низуносна нам страстнѣ выгльблятисе образъ смѣрения.

А яко убо вълѣпоту прѣдложишесе безобразных образы и зраци безрачныхъ, не едину вину речеть кто убо быти юже въ нас мѣру, немогущую непосредствѣ на умная възетисе видѣния и трѣбующую искръныхъ и съестественныхъ възвождений,¹⁴ иже яже мощная намъ ображения прѣдлагають безобразныхъ и пачеестественныхъ видений, нь яко и се таинствъннымъ Словесемъ есть подобнѣйше еже недовѣдомыми и священными гаданми съкривати и невходну многимъ полагаати священную и съкръвенную прѣмиръныхъ умовъ истину. Есть бо не всакъ священънъ, «ни же всѣхъ, — якоже Словеса рѣше, — разумъ».*

Аще ли же неприкладная образописания виновствуеть кто студно быти, глаголе възлагати яже сиче студна суть изьображения боговиднымъ и светѣйшиимъ добротамъ, лѣпо есть къ тому рещи, яко два суть священнаго изьявления образа.¹⁵

3. Овь убо яко подобнѣ подобними происходе священнозрачными образы, ов же отличными образотворенми въ отнудь неуподобленнѣ¹⁶ и неприкладнѣ сътворяемъ. Сего ради и честное прѣсущствнаго богоначелия блаженство изьявителныхъ Словесъ тайная прѣдания когда убо яко Слово^{17*} и Умъ* и Существо възпѣвають, богоподобное словесънство и прѣмудрость Того являюще и вистину суще бытие и иже сущихъ бытия вину истинную, и яко свѣтъ* то наздавають, и животь*¹⁸ наричуть. Таковымъ священнымъ назданиямъ честнѣйшиимъ убо сущимъ и тименныхъ образъ прѣвьсходити нѣкакю мнещимсе, недостатъчествующимъ же и сиче богоначелнаго къ Истинѣ подобия (есть

¹³ Обещавает своимъ тлъкованиемъ указовати кождо, яко ниже възмнѣтисе досажати небеснымъ, ниже насъ въ долѣносная смѣрения выгльблятисе о яже въ агелѣхъ глаголемыхъ животныхъ.

¹⁴ Знаменая, яко бесплътная безрачнаа суть. Егда убо услышиши о Прѣсущствомъ иже «въ зрацѣ Божи сый»,* еже неизмѣнное къ своему Отцу разумѣй. Се бо являеть и «образъ Бога невидимаго»* и еже «видѣвый Мене видѣлъ есть Отца».* Сиче и святой Василие сказуеть въ еже къ своему брату словѣ еже о разньствѣ существа и състава.*

¹⁵ Яко по двѣю образу възпѣвается божество: или яко подобно всѣмъ, вса бо въ томъ съставляются, или яко отлично [на поле рядомъ: неподобно], ничтоже бо есть всѣхъ.

¹⁶ Яко подобными и отличными наздаваются образы и како наздаваются, здѣ глаголетъ.

¹⁷ По чемъ глаголетсе слово и умъ Богъ, вьнегда «Кто разумѣ умъ Господень?»* и вьнегда «И бысть слово Господне къ мнѣ»* глаголетъ и прочая. Словенство же глаголетъ при Бозѣ не яко словесна хошетъ показати Бога яко причествующаа слову, — се бо изьявляеть, — нь яко самословесие есть, Слово сый. Существо же глаголють при Бозѣ, егда рекуть «Азь емь сый» и «Сый посла Ме».*

¹⁸ Яко ниже животь, ни же свѣтъ, ниже умъ, ниже существо истѣйше глаголетсе Богъ, нь винословнѣ [на поле рядомъ: виновствнѣ]. Есть бо и паче сихъ и не яковаа сия.

бо паче всакого сущства и живота, ниединому убо то свѣту начрътающу, всакому же слову и уму подобия того безъссысуждения недостатъчествующимъ). Когда ли же и отличными изьявленми от тѣхъжде Словесъ прѣмирнѣ поетсе невидимо то,¹⁹ и непостижно, и невѣмѣстимо нарицающимъ, и от ихже не что есть, нѣ что нѣсть знаменаетсе. Сие бо, яко мню, и истѣйше есть на томъ, понеже, якоже и скръвенное и священническое прѣдание научи и, еже убо не быти по нечесомъ сущнихъ то истинствуемъ, неразумѣваем же еже прѣсущствное того и недомыслное²⁰ и неизреченное неопрѣдѣление. Елма же убо отречения²¹ при божественныхъ истинна суть, наньречения же неприлична съкрвению неизреченныхъ, ближнѣйше паче есть при невидимыхъ еже отличными назданми изьяшнение.

Почитают бо,²² а не студа исплняют небесная удобрения яже светиихъ священнописания, отличными таа образотворенми изьявляюще и сими указующе вещественныхъ всѣхъ прѣмирнѣ изьшѣдшая. А якоже и нашъ умъ възводит паче неприкладствия отличнѣствѣ, не мню кого от благо-

¹⁹ Яко яже по отречени глаголемая при Бозѣ, сирѣчь: невидимъ, непостижимъ и яже таковаа, — отлична суть, являют бо не что есть, нѣ что нѣсть Богъ. Сиде — и Богословъ Григорие.*

²⁰ «Недомыслное» глаголетъ не забивателно, нѣ еже не разумѣваемо от нѣкого. Неопрѣдѣльнъ же Богъ яко прѣдѣлу ниединому подпадае, нѣ самъ всѣхъ прѣдѣль сый и вса въ себѣ опрѣдѣляе, прѣдѣлу же не подпадаетъ, заеже прѣдѣлы убо от наньреченныхъ слежетсе, наньречения же при Бозѣ неприлична яко лъжуша. Паче бо сихъ Богъ, яко не сый сущство, нѣ паче сущства.

²¹ Не тькмо при Бозѣ, нѣ и при божественныхъ всѣхъ, сирѣчь при по Бозѣ умныхъ всѣхъ, и отречения истиннаа быти глаголетъ, и наньречения неприличнаа. Неприкладнаа бо убо суть наньречения, егда речемъ или Бога, или разумные силы, животъ, или свѣтъ, ни бо животъ таковы нѣкой есть, яко въдыханиемъ и изьдыханиемъ жити, ниже свѣтъ видимый и творей зрѣтисе подлежащимъ, нѣ вышше что сихъ. Отречения же нѣкако при умныхъ ближнѣйшаа. Глаголемъ бо, яко невидимый и яко не подпадаютъ видѣнню разумѣваемъ. Что же есть само то Неявляемое, ниже многоиспытovati, ниже прѣдставляти мнитсе слово. А паче «животъ» и «свѣтъ» мнитсе назнаменовати что есть, и сия нимало являютъ что есть Богъ.

²² Зри, како отвѣща, по что животныхъ память имѣють небесная, рекше образе. Якоже бо иже всѣхъ Богъ ничтоже въ всѣхъ имать въкупобытно, и того ради выльпоту ниединоу въ всѣхъ есть того явително. Нѣ проче инѣмъ къзыньствомъ [*на поле рядомъ*: хытростию] богословимъ, глаголюще, что нѣсть Богъ, еже наричетъ «отличными». Сиде и при небесныхъ силахъ, яже по Бозѣ суть хытростнѣ [*на поле рядомъ*: послѣдѣлѣтне] сьтворише богословци, ниединому умныхъ тѣхъ уподобивше, нѣ от чувственныхъ, ихже наричуть безъчстная, сихъ приемше начрътание, се къ чьсти имъ сьтворшей, да назданновидно и не истинно будетъ сихъ подражание. Аще бо иже львозрачны глаголемы и многоконьны, и многопернати есть и словесьнѣ, и невещствны, како не являнно, яко прѣмирнѣ прѣвъзиде вещьная и от насъ разумѣваемая?

мудрствующиихъ супротивьрещи. Въ чьстная бо убо священноздания лѣпо есть и заблудити,²³ златовидна мнещи имь быти небесная сущьства, свѣтовидьные нѣкаторие мужи и блистающесе благолѣпотми, одѣянные рызами свѣтлыми, и огньнѣ неврѣднѣ²⁴ блистающесе и еликыми иными подобообразными зраци богословие небесные изобрази умове. Егоже да не постраждутъ иже ничесоже видимыхъ добротъ вышше разумѣшен, яже преподобныхъ богословць въиспръпростирательная прѣмудрость и къ неприкладнымъ отличьнствомъ священнѣ сводитсе, не попущаючи еже тимѣнное наше въ студные образи остаемо почивати, въставляючи же горѣнное душе и пострѣкующи злообразиемъ сложенныхъ, яко ниже праведно, ниже истинно мнѣтисе быти, ниже сущимъ зѣло тимѣннымъ, яко сиче студнымъ подобна въ истину суть прѣнебесные и божественные позоры.²⁵ Инако же и се разумѣти потрѣба есть, еже ниже едино от сущиихъ²⁶ быти по всемъ добраго причестия улишенно, понеже, якоже и яже Словесь истина рече, «Вса добра зѣло».*

4. Есть убо от всѣхъ разумѣти добрые позоры и умнымъ и мысленимъ от вещественныхъ наздати глаголемая отличная уподобления, инѣмъ образомъ умнымъ имущимъ, яже човствынимъ инако подана быше. И бо ярость²⁷ убо бесловеснымъ²⁸ от страстьнаго устрьмления бываетъ, и всакого бесловесия испльнь яростновидно ихъ движение. Нѣ при умныхъ инѣмъ образомъ подобаетъ яростное разумѣти, являемо, яко мню, еже мужьствное ихъ словесьнство²⁹ и неумекчаемое имьство въ боговидныхъ и непрѣвратныхъ въдруженияхъ. Такожде похотѣвателное³⁰ убо быти глаголемъ при бесловесныхъ несмотренное нѣко и тимѣнное от естествонаго движения или обычая въ измѣняющихьсе³¹ неудръжателнѣ бываемо пристрастие и еже бесловесное телеснаго пожелания

²³ Се и други помысль, егоже ради таковая уподобления о небесныхъ приеть. Аще бо бы чьстнѣйши приель назданми, сирѣчь златовидные или блистающесе глаголе быти божьственныи силы, всако убо повинулисѣ быше слышещеи, от иже въ чловѣцѣхъ чьстнѣйшиихъ увѣренное приемлюще. Ниня же неприкладные и студные образе привьнесе, да извѣстно вѣдуше, яко нѣ суть таковаа, възичемъ истину сущиихъ.

²⁴ Глаголемая бо огнепалная сущьствия божественная не жежителнаа, нѣ животнаа суть.

²⁵ Позоры — иже съ удивлениемъ зримаа.

²⁶ Яко ниедино от сущиихъ улишенно есть добраго причестия.

²⁷ Яко не простѣ бесловесия испльнено яростновидно движение, нѣ при бесловесномъ естествѣ. Достонть прочисти послѣднее слово книзѣ, егоже рекль есть о видѣни светыхъ херувим, тамо бо и сна вса пространѣ обявленна быше.

²⁸ Достонть знаменати убо, что разумѣвается ярость при бесловесныхъ и что при словесныхъ, и что похотѣвание коихъждо.

²⁹ Знаменати достоить, яко и при аггелѣхъ словесьнство глаголетъ.

³⁰ Яко похотѣние умныхъ рачителство неодръжанно есть о Бозѣ, еже наричетъ Невещьствьнство.

³¹ «Въ измѣняющихьсе», рекше, от студенаго въ теплое, от здравия въ нездравие, от гнѣва въ безгнѣвие, от скръби въ радость.

удръжание, всако животно порѣвающаго на еже по чювству похотѣние. Егда же отличная уподобления умнымъ наложивше похотѣние имъ глаголемъ, рачительство божественно то разумѣти подобаетъ паче слова и ума невещества и неуклонно и несходно желание прѣсуществнѣ чистаго и непрѣльстнаго видѣния и къ оному чистому и кончному сиянию и нельстному и добротворному благолѣпию вѣчнаго вѣистину и умнаго причещения. И еже неудръжателное да разумѣемъ при скоромъ и невзвратномъ и от ничесогоже отсѣшисе могущу ради несмѣснаго³² и неизмѣннаго божественные доброты рачительства и еже отнуднее уклонение на вѣистину Желаемо. Нъ и само то бесловесие же и нечювство при бесловесныхъ убо животныхъ или бездушныхъ вещьхъ улишение слова и чювства искрннѣ нарицаемъ; при невещественныхъ же и умныхъ сущ'ствахъ светолѣпнѣ еже прѣввсходимое³³ ихъ яко прѣмирныхъ исповѣдуемъ нашего прѣходителнаго и телеснаго слова и тимѣннаго и чуждаго бесплѣтнымъ умовомъ чювства.

Есть бо убо не неприкладные наздати небеснымъ зраки и от безчюстнѣйшихъ вещьхъ³⁴ честей, понеже и та от сушааго добра бытие имущи³⁵ по всакомъ ее вещественномъ удобренни уподобления нѣкаа умнаго благолѣпия

³² Несмѣсно глаголетъ чисто и ни въ едино ино упражненное. Иже бо божьственнымъ рачительствомъ съдржимъ, в'сь есть того и въ желаемо тѣмъ воспостираетсе, ни от единого възбраняемъ прѣходителнаго и телеснаго слова. Бесловесие же глаголюще быти въ бесплѣтныхъ сущьствяхъ, не безумие тѣмъ налагаемъ, вьнегда львовь образе, и тельць, и птиць, якоже при орлу, бесловесныхъ образе и знаменія глаголати подобна быти небеснымъ чиномъ, нъ таинствнѣ размѣнное еже по нихъ словеснаго къ еже у насъ назнаменуемъ. Мы бо словесное прѣдставляемъ езычнымъ орудиемъ и гласителными образы, биюще въздухъ езыкомъ, и слову, прѣходещу от насъ въ слышшихъ слухы, от тѣла въ тѣло, якоже глаголетъ божьствнъ Василие въ еже «Вьнемли себѣ» словѣ; онамо же не тако, нъ, въ бесплѣтнствѣ сущь, и въ другъ друзъ вьмѣщающесе и отходеще, всакого слова яснѣйше другъ друга разумѣвания видеще, другъ другу якоже глаголюще, мльчаниемъ слова прѣподають другъ другу.

³³ Прѣходително наше слово произносное, яко от глаголющаго прѣходе къ слышешому: «телесну» же, къ раздѣлению невещественнаго слова, се бо ниже телесно, ниже прѣходително.

³⁴ Безчюстнѣйшу вещь глаголетъ телесовидно всако естество, къ различнымъ видомъ одушевленнымъ и бездушнымъ и прочимъ от Бога удобренное; умное же благолѣпие — яке о Бозѣ глаголемая, ихже смѣренние и тѣнькие образе въ сущнихъ обрѣтаемъ, сирѣчь еже просто быти, еже живѣмъ быти, еже почювати и подобная.

³⁵ Яко убо от Бога и вещь всака бытие имать, ниедино прѣмудрое супротиврещи имать слово. Носит же и сама въ себѣ указание еже от Бога приведесе и украсисе. Всака убо еже от вещи удобрение тѣнко нѣко и сѣнно уподобление и подражание разумныхъ имать. Якоже бо прикладна разумная въ подьетие якоже мощно иже от Бога промыслителныхъ прошьствий, и животь сушаа оживляютсе от иже паче всакого живота Бога, и силы имуть въ благодѣтелство съдѣйствителные, и движение нѣко прѣмирное, сице и вещная вса въкупъ же и от чести промыслъ Божий искрннѣ себѣ приемати прикладнѣ имуть, и оживлятисе, и животь быти могутъ, якоже: «Да изведеть земля душу живу»,* — и пакы: «Да изведуть воды прѣсмикающаяе душъ живыхъ».* Нъ и силы благодѣтелствнне иже

имуть, и мощно есть тѣми възводитисе къ невеществѣннымъ начелообразиямъ, отличнѣ, якоже речесе, подобиямъ разумѣваемомъ и тѣмже,³⁶ не такожде, съгожденнѣ же и искръннѣ на умныхъ же и чювствныхъ свойствохъ опрѣдѣленномъ.

5. Сия же таинствѣнные богословце обрѣшемъ не тѣмко сущимъ небесныхъ удобрений свѣтлотамъ священнѣ наздавающихъ, нъ и самымъ есть когда богоначелнымъ изъявлениямъ.³⁷ И когда убо то от видимыхъ чьстнѣйшихъ³⁸ вспѣвають яко Солнце правды,³⁹ яко звѣзду вьсточну,* вь умъ священнѣ вьсиявающу, и яко свѣтъ, неприкривателнѣ и умнѣ осиявае, когда ли же от срѣднихъ яко огонь, неврѣднѣ просвѣщае,* яко вода, жизннаго испльнения подателна* и, образнѣ рещи, вь чрѣво вьходещи и рѣки истачающи, неурьжаннѣ текущее;* когда же ли от послѣднихъ яко муро благоуханно,* яко ками краеуглннй.* Нъ и звѣрообразие тому налагають и лвово тому и всакого звѣра* свойство възлагають, и пардала то быти рѣше, и медведицу губителну.* Приложу же и еже всѣхъ безчьстнѣйшее быти и

на земли дыхающимъ, якоже являютъ былиями и качества нѣкоторими ползования (*на поле рядом*: Качства, рекше злото, сребро, олово, кумпоръ и ина такова. Сия бо от земле качества суть). И движения же подобно вещная имуть еже вь бытие происходе и тлѣние, и чинь приемлють, иже от Бога наложены и налагаемы. Нъ и просвѣщатисе наста разумныхъ нашьствиемъ силъ, якоже при иже вь вьскресении Господни блистающе аггелю и просвѣщающе около. Имат же сия вещь страждуши, не убо якоже разумна дѣйствующа. Сего ради по послѣднемъ подражателству и уподоблени глаголетсе сия имѣти. Что же есть подражание и уподобление послѣдне вь иже «О божествныхъ именехъ» словѣ изъявихомъ.

³⁶ Аще и тааже имена глаголетъ, нъ не подобнѣ приемлютсе: прѣма естественномъ свойству подлежамаго и опрѣдѣляютсе и разумѣваютсе. Знаменай же, яко всаку вещь не рече разумну, проче и звѣзды бездушны, не бо имуть умъ.

³⁷ Богоначелная же изъявления яже о Бозѣ разумѣвания глаголетъ.

³⁸ Знаменай, кая наричь чьстная, — яко солнце и звѣзды, и кая срѣдня — огонь и воду, и кая послѣдняя, — яко муро, и кая безчьстнаа, — яко звѣры и чрвьие. И яко и при Бозѣ и звѣровиднаа знаменая реченна быше и яже от вещи, и яже чьстная же, и срѣдня, и безчьстнаа.

³⁹ Знаменай же, «солнце правды» Малахиа именуеть. Божествннй же Петръ вь съборномъ его послани: «Дондеже дьнница вьсияеть вь срдцихъ вашихъ»* и прочая. Сия бо есть вьсточнаа звѣзда. Моуси же «Вь купинѣ огонь, — рече, — не пожигаей»,* еже есть неврѣднѣ просвѣщае. Иеремиа же воду глаголетъ: «Мене оставише, источника воды живвие».* И ны же — инаа. И Господь: «Рѣкы ис чрѣва его потекуть воды животннне».* Соломон же вь «Пѣсни пѣснехъ» муро рече: «Муро истьщанно име тебѣ».* Вь 12 же пророцѣхъ Осие и Михеа реченнне звѣры глаголють вь иже о Бозѣ пророчьствуемыхъ. Давидъ же чрвьия себе глаголетъ: «Аз есмь чрвь и не чловѣкъ»,* — от лица Господня.

паче неприкладно мнесе, яко и чрвья видь^{*40} то себѣ наздаваемо, иже о божественныхъ прикладныхъ прѣдаше. Сице вси иже богомудрыи и скръвеннаго въдхнутія пророци несъвършенныхъ и несвещенныхъ прѣчистѣ раздѣляютъ Светая светиихъ и отличное священноздание почитаютъ, яко ниже божественная скръвными благонаручна быти, ниже священныхъ образь⁴¹ *(на поле внизу: образъ — сирѣчь кумирь)* любозрителемъ яко вистинныхъ остати образь и того ради божественная почитатисе истинными отречеными⁴² и яже послѣдними⁴³ искранныхъ подражаній инѣми уподобленми. Ничтоже убо безмѣстно, аще и небесная существия от неприкладныхъ отличнствнннхъ уподоблений наздавають по реченныхъ винахъ. Не бо убо негли ниже мы въ искание убо от недоумѣнія въ възвождение же извѣстнаго ради священныхъ испытанія пришли быхом, аще не еже зловидное⁴⁴ насъ сьмутило бы аггельскаго изъявительнаго наздания, не оставляе нашъ остати въ неприличныхъ образотвореніяхъ, нъ благовѣчнине отрицатисе тимѣннхъ пристрастій и подвиже священнѣ выспрѣпростиратисе, видимыхъ ради на прѣмирные възводе.

Толика убо нами рекошесе вещными и неприкладными священныхъ словесъ аггеловидная образописанія,⁴⁵ прочее же опрѣдѣляти подобаеъ, что то быти священноначелие непшущемъ, что ли же от того священноначелия ползевати имать иже священноначелию удостоившеисе. Наставник же слову будетъ Христос, аще убо мнѣ льза есть рещи, мой, всакого священноначелна-

⁴⁰ Или чрвию себе уподоби, яко не от сѣмена родившусе, якоже мы, нъ сѣмена кромѣ, якоже чрвие, иже не от сѣмене раждаются, нъ от земли или от съгнтія. Еже бо «Азь есмь чрвь, а не чловѣкъ» яко от лица выпльшьшагося Бога глаголетсе, аще и не по божеству приемлемо естъ, нъ по видимомъ плти.

⁴¹ Что образы суть, рекше кумири, прѣдставихомъ уже въ иже «О божественныхъ именехъ» словѣ, въ начелѣ деветіе главизны.

⁴² Яко да почитаютсе божественная и отреченіями, рекше: невидимъ, бесмртнь, неосежимъ и инаа такова. И паки послѣдними подражанми и инаквими уподобленми да почитаютсе. Послѣдними — рекше и чрвию уподобляемъ естъ, и инаа еликаа послѣднѣшя. Инаквѣми ми же, рекше, инако естъ царско име при лвъѣ, и инако при Бозѣ, и инаа таковаа.

⁴³ Послѣдняя подражаній Божиихъ въ сѣдѣтелствѣ глаголетъ яже прѣжде рече «безъчстнѣшящая вещныхъ удобрений». Како же сѣя глаголютсе послѣдне подражаніе и уподобленіе въ иже «О божественныхъ именехъ» словѣ, въ главизнѣ четвертой реченно бысть нами пространѣше.

⁴⁴ Зловидное звѣрообразіе разумѣи и скотовидное, еже о аггелѣхъ глаголетъ Писаніе.

⁴⁵ Добрѣ изобразительная образописанія, яже и прѣдрече, не аггельская, нъ аггеловидная именована, не бо самѣхъ тѣхъ аггель, якоже суть, образы писани быше, нъ изъявленія нѣкаа видотворія бесплтныхъ являютъ, якоже казалъ естъ самъ себе.

го изъявления въдохнутие. Ты же, о дѣте,⁴⁶ по прѣподобномъ еже у нас священничьскаго прѣдания уставоположению, сам же священнолѣпнѣ слыши иже священнѣ глаголемых, божьствѣнъ божьствѣнныхъ учениемъ бывае и, еже въ умѣ скрѣвениемъ светая скутавь от несвещеннаго множества⁴⁷ яко единовидьннаа съхрани. Не бо праведно, якоже Словеса рѣше,* въ свиние поврѣщи еже умьныхъ бисерь чистое и свѣтовидное и добротворное благоукрашение.

⁴⁶ Како «дѣте» наричетъ божьствнаго Тимофеа великы Дионусие достоить възискати. Или убо, яко мню, заеже прѣвъзышьд того лѣти се глаголетъ и любопрѣмудрьствомъ прѣимѣе, яко и привѣпрашатисе от того, якоже являютъ сия въ рукахъ съписанія. Аше бо и прѣжде святаго и божьствнаго Дионусиа вѣрова святы Тимофей, якоже «Дѣянїя светихъ апостоль»* являютъ, нѣ убо вынѣшнимъ наказаниемъ доволнѣйши бѣ великы Дионусие. Или «дѣте» того наричетъ, яко подражае Господа, глаголющаго: «Дѣти, еда что съѣдно имате?»* Или понеже иже по Бозѣ незлобие проходещиихъ «дѣтцу» нарицаху, якоже и Папиа сказуеть въ книзѣ прьвой «Недельскихъ тлькований»* и Климентъ Александрьскыи въ «Пѣстунствѣ».*

⁴⁷ Къ множеству еже единовидно наведе, святая бо единотворить. А яже скврънная и грѣха сущая въ многая раздѣления ради умножаеть. Се бо наричетъ нїня «множество», сирѣчь скврънное.

ГЛАВА 3. ЧТО ЕСТЬ СВЕЩЕННОНАЧЕЛИЕ И ЧТО ВЪ СВЕЩЕННОНАЧЕЛИИ ПОЛЗА. ПРѣДѣЛЬ СВЕЩЕННОНАЧЕЛИЯ¹

1. Есть убо священноначелие, по мнѣ, чинъ священънъ и художество и дѣйство к боговидѣнїю коль мощно уподобляемо и къ даваемымъ тому от Бога осиянїямъ по мѣрѣ на богоподражател'ное възводимо. А яже боголѣпная доброта, яко проста,² яко блага, яко съвршенноначел'на,³ непримѣсна убо есть по всемъ всакого отличьнства, прѣподателна же по достоянїю комуждо своего свѣта и съвршателна въ съвршени божьствнѣйшемъ, по еже къ той иже съвршаемыхъ прикладнѣ неизмѣнномъ образѣ.

2. Мысль убо священноначелия есть еже къ Богу яко мощно уподобление же и съединение, Того имѣе всакого священнаго художьства же и дѣйства наставника и къ тогову божьствнѣйшему благолѣпїю неуклоннѣ убо зримо,

¹ Прѣдѣль священноначелия, — яко священноначелие есть священное удобрение.

² Подобие и равенство и тождество едино и единотворно, заеже просто и несмѣсно и несложно наричетсѣ. Отличьное же и неравное и инакъство и примѣсное и въ прѣложени тимѣнное глаголють. Еже убо Едино Богъ да разумѣваецѣ.

³ Рекше, съвршеннотворителнаа.

яко мощно же изобразуемо и свое ликовники⁴ подобия божествная съвршае, зрьцала чиста и нескврънна, приетьнаа свѣтоначелние и богоначелние заре и убо даемые луче священнѣ испльняемаа, сию же паки обилнѣ въ прочая всиявающе, по богоначелных уставох.

Не бо праведно есть иже священнѣ съвршаемом съдѣйствовати⁵ что отнудь вынѣ своего службоначелнаго священновъчинения, нъ ниже есть инако, понеже божественные самыи свѣтлости желаютъ и къ той священнолѣпнѣ сматрають и въображаются, по коегождо священных умовъ достоянию.

Сего ради убо священноначеліе⁶ глаголей священно нѣко по всемъ являеть удобрение, образъ Богоначелные красоты, въ чинохъ и художествохъ священноначелныхъ яже своего сияния священнодѣйствуе таинства и къ своему начелу яко льза уподобляе. Есть бо коемуждо иже священноначеліе наслѣдствовавшихъ съвршение еже по своей мѣрѣ на богоподражателное възвестисе и, еже всѣхъ божественнѣше, якоже Слова рѣше, «Богу съспѣшникъ»⁷ быти и показати божественное дѣйство⁸ въ себѣ, по еже мощно являемо. Рекше, понеже чинъ священноначелія есть еже овѣмъ убо очищатисе, овѣмъ же очищати, и овѣмъ убо просвѣщатисе, овѣмъ же просвѣщати, и овѣмъ убо съвршатисе, овѣмъ же съвршеннодѣйствовати, коемуждо богоподражателное уприк-

⁴ Ликовники здѣ иже о божественныхъ обращающееся глаголетъ.

⁵ Сия непущю являти, яко не подобаетъ кому иже единому священническому степену съпричтенну вѣще что своего достоянія творити, нъ еже прикладное своему достоянію дѣйствовати и прѣдавати учешу, не убо начинати яже паче достоянія. Сирѣчь — прѣзвитеромъ учити и даръ приносити, не убо и хиротонисати; диакономъ — учити, не убо и крѣстити, не бо дадець Духъ Светы, якоже ниже Филиппъ въ «Дѣяніихъ светихъ апостоль»* диакономъ, нъ ниже приносити. И сице прочии. Нъ и съвршаемимъ прикладная дѣяти, да съхраняетсѣ добрѣ еже от божественнаго Павла «Къждо въ нъже званъ бысть степенъ, въ томъ да прѣбываетъ».*

⁶ Знаменай чинъ и священноначелія накование и яко приходещимъ подобаетъ прѣвѣ очищатисе учениемъ раздѣлительныхъ грѣха потъмненій, таже просвѣщатисе разумомъ богодъхновенныхъ Писаний, яже о богоразумѣни прѣданми, и тогда съвршатисе «паки бытия банею».* Знаменай убо, яко просвѣщение прѣжде крѣщения есть.


⁷ Знаменай, что священноначелникъ съвршение и како Богу суть съспѣшници, по божественномъ апостоль.

⁸ Божественное дѣйство, — сирѣчь Божия дѣла и самому дѣлающу, упрѣмуждрающу, съвршающу и яже подобная въ пѣстунствуемие по силѣ дѣлающу.

ладитесе имать по семь образъ. Божественное блаженство,⁹ яко въ чловѣцѣхъ рещи, непримѣсно убо есть всакого отличьства, испльнено же свѣта присносущнаго, съврѣшенно и нетрѣбователно всакого съврѣшения, очищае, и просвѣщае, и съврѣшенодѣйствуе, паче же чищение свещенное, и просвѣщение, и съврѣшение, паче чищения, паче свѣта, прѣдсъврѣшенно, самослужбоначелие и всакого убо свещенноначелия вина, всакого же свещения по прѣвьсходимомъ изредно.

3. Потрѣба убо есть, яко мню, убо чистещимсе непримѣсномъ съврѣшатесе по всемъ и всакые свобаждатесе неподобныя гнусоты; просвѣщающимъ же се испльнятесе божественнаго свѣта, къ зрительному имѣству и силѣ въ всечистыхъ ума очесѣхъ възводещимсе; съврѣшающимъ же се, от несъврѣшенныхъ прѣчиняющимсе, причестникомъ быти зримыхъ свещенныхъ съврѣшительнаго художьства; чистителем¹⁰ же богатствомъ очищения инымъ прѣподавати своею чистоты; просвѣщателемъ же яко чистѣйшимъ умомъ и къ причестию свѣта и прѣподанию искрѣннѣ имущимъ и всебогатнѣ свещение испльненнымъ луче, иже на нихъ весь пролѣваемый свѣтъ въ иже достойныя

⁹ Божественное блаженство чловѣцкы да речемъ и от чловѣцкихъ вещи, понеже то по себѣ что есть, нѣсть мошно рещи:



¹⁰ Здѣ о свещенноначелницѣхъ самѣхъ глаголетъ, яже прѣжде сихъ о свещенноначелствуемыхъ рекъ, указуе и чины, и како убо чистителие мнѣшии суть, якоже заклинателіе суща, просвѣщателие же прѣвъзышѣшии суть учениемъ, сирѣчь пресвитери и диаконы; съврѣшенодѣйствителие же — иже крѣщениемъ Духа испльняюще Светого, якоже епископы. Глаголетъ же сѣя и долѣ, въ иже «О церковничьскомъ свещенноначелии» словѣ.

свѣта послати; съвршенодѣйствителем же, яко художникомъ съвршителнаго прѣподанія, съвршати съвршаемые всесвещеннымъ учениемъ зримыхъ священныхъ художства. Прочее убо коиждо священноначелническаго удобрення чинъ по своей мѣрѣ възводитсе къ божьствному съспосѣшению, она съвршае благодатию и благодатною силою, яже Богоначелию естествонѣ и паче естества наставшая,¹¹ и от Того прѣсущьствнѣ дѣмаа, и къ мощному боголюбьзныхъ умовѣ подражанію священноначелнѣ изьявляемаа.

¹¹ Яко естествонѣ и паче естества суть къ спасенію просвѣщательная. Добрѣ же чинъ изьясни церковнаго священноначелія, сирѣчь да пръвѣе приходящей къ божьствному крещенію отринуцесе, очищающесе, таже просвѣщаются учениемъ презвитерѣ въ се сътворенныхъ. Таковымъ же быти чистителнымъ, достойнымъ еже прѣподати инымъ светбу. И тако епископомъ проче крестити. Тѣхъ бо нарицеть съвршенодѣйствники. Сѣи подобаетъ чинъ съблюдати.

ГЛАВА 4. ЧТО НАЗНАМЕНУЕТЪ АГГЕЛЬ ИМЕ

1. Священноначелию убо что-любо есть, якоже мню, добрѣ нами опрѣдѣленному, аггельское священноначелие прочее достойно есть възпѣти и яже священная того въ Словесехъ образотворения прѣмирными очесы достоить узрѣти, яко да възведемсе на боговидную ихъ простоту таиньствныхъ ради назданій, и еже всакого священноначелническаго художства Начело да воспоемъ въ боголѣпнѣй чьсти и Службоначелныхъ благодаренныхъ.

Пръвѣе всѣхъ оно рещи истинно, яко благодію вса прѣсущьствное Богоначелие, яже сущих¹ сущьствія съставивѣ, въ еже быти приведе. Есть бо се всѣхъ Вини² и прѣвыше всѣхъ Благодіи свойствно еже къ приобщенію своему

¹ Здѣ вса възкупѣ яже въ сьдѣтельствѣ являеть имени ради сущихъ, и умнаа и видима вса. Вса бо Богъ от не сущихъ сьтвори сего ради и тѣчию, да Того благодіи причестетсе. Приобщет же се промысла ради, яко коеждо прикладнѣ имать, начело бо есть сущихъ сущьству Божий промыслъ.

² Знаменай помысль, егоже ради сущая вса приведе Богъ, — да причестетсе Того благодіи по мѣрѣ коеждо. Се бо являеть еже «Многие обьтѣли у Отца». * Къждо бо по своимъ дѣлѣ причеститисе имать Того благодіи. Сиче и Титъ глаголетъ въ иже «На манихее» словѣхъ.*



сушая призивати, якоже коемуждо сущихъ опрѣдѣленно бысть от своео мѣры. Вса убо яже сушая³ причествуютъ Промыслу от прѣсуществнаго и всевиновнаго Божества изливаемому. Не бо убо была быше, аще не сущиихъ существа⁴ и начела приобщиласе быше. Неживотнаа убо вса еже быти тому причествуютъ (еже бо быти всѣмъ есть еже паче бытия божество), животнаа же⁵ тоежде паче всакого живота животворныи силы, словесная же и умная, тоежде паче всакого и слова и ума самосвѣршителныи и прѣжде свѣршенства прѣмудрости. Явленно же есть, яко близъ тое она сушьствъвь суть елика многашии той причестишесе.

2. Светие бо убо небесныхъ сушьствъвь⁶ доброты паче яже тѣчию сушая, и бесловеснѣ жива, и яже у нас словеснаа богоначелнаго прѣподания въ причестии быше. Умнѣ бо въ богоподражателное⁷ себе въображающе и къ богоначелному подобию прѣмирнѣ зреще и въобразати желающе умны ихъ видѣ, обилнѣйшаая влѣпоту имуть яже от тое причестия, приближнѣ убо суще и присно къ еже горѣ възиматисе, якоже лѣпо есть въ крѣпости божьствнаго и неуклоннаго рачителства въиспрѣпростираеме и начелная осияния невестьствнѣ и несъмѣшеннѣ приемлюще и къ тѣмъ [*над словом знак, и под таким же знаком на поле: осияниямъ*] съчиняеме и умну⁸ имуще всу жизньнѣ. Сие убо суть еже прѣвѣе и многашии въ причестии божьствнааго бываеме и прѣвѣе и многашии изъявительне богоначелнааго съкрѣвенства, тѣмже паче всѣхъ аггельскаго⁹ именованія безмѣрнѣ сподобишесе за еже прѣжде въ тѣхъ бывати богоначелному осиянию и тѣми въ насъ ниспосилатисе яже паче насъ изъявляениямъ.

Сице убо Законъ, якоже богословие рече, аггелыми намъ данъ бысть* и иже славныи же прѣжде Закона и по Закону наше отце аггелы къ божьствному

³ Яко вса сушая Божию промыслу причествуютъ, ниже бо ни въ сущиихъ есть еже не причествуй Божиимъ. Тѣмже неуставно зло, понеже не причествуетъ Богу, по уличени имѣства являемо, нѣ не само прѣобразнѣ суще въ сушьствѣ. Сице пространѣйше рѣхомъ выше.

⁴ Въ сихъ сушая божьствная наричетъ, сирѣчь Светую Троицу, яже зданиямъ сущихъ съдѣтельница и начело, рекше вина, от тѣхъ, иже от тое въ существо пришѣдшихъ, причествоватисе глаголетсе.

⁵ Яко и животнаа причествуютъ промыслу Божию по томъ еже быти. Неживотнаа же суть — сирѣчь камене и вса яже не приходешая въ рождение.

⁶ О сихъ чину знаменай же, яко различна горныхъ сильь сушьствия. Глаголет же «тѣчию сушаа», яже нарече «неживотнаа». (*На поле: не жива*).

⁷ Зри, яко и умнии силы от произволения по вещьшемъ приобшуютсе благому, яко много желающе того. Глаголет бо «себе въображающе», еже есть производително. Прочее не льжно слово, глаголее диавола спаднути съ небесе, прѣврати бо се въ злое от себе.

⁸ Тѣхъ бо существия умъ суть живы. Знаменай же, яко умная вса прѣвѣе причествуютъ Богу. «Изъявительне» же — сирѣчь възвѣстителне.

⁹ Знаменай, что истѣйше аггель и яко прѣвый тѣмъ чинъ глаголетъ имѣти. Еще же и како аггелыми научаваемсе, и како тѣми Законъ данъ бысть, и яко и иже прѣжде Закона и по Законе отце наше аггелы къ божьствному възвождаху.

възвоздаху е, или еже творити достоить¹⁰ научавающей и къ правому истины пути от прѣльсти и жизни несвященни прѣводеще, или чина [у слова стоит значок, и на поле рядом с таким же значком: священнаго] или таинъ прѣмиръныхъ скръвенная видѣния, или божьственная нѣкая пророчески являюще.

3. Аще ли нѣкто речеть и оттуду непосредствѣ¹¹ бывати нѣкоторымъ светиимъ богоявления,* да навикнеть и се прѣмудрѣ от священнѣйшихъ Словесъ, яко само то убо что любо есть Божие скръвенне «никтоже видѣ»,¹² ниже узрѣти имать, богоявления же прѣподобнымъ быше по подобниихъ Богови нѣкоторыхъ ради священныхъ и зрещимъ достойныхъ видѣний изъявленияхъ. Всепрѣмудрое же богословие видѣние оно,¹³ еже въ себѣ написанно являше божьственное яко въ образѣ неизобразуемыхъ подобие, ради видимаго на божьственное възвоядения вълѣпоту наричеть богоявление,¹⁴ яко его ради зрещимъ божьствному бывающу осиянию и нѣчто божьствныхъ имъ научающимъ се.

Сия же божьственная видѣния славнии отци наши навицаху посрѣдствомъ небесныхъ силъ. Или не и еже священное Закона законоположение Словесъ прѣдание, яко от онуду убо глаголет от Бога Моусеови дарованно, яко да убо нас истиннѣ научитъ еже божьственно то быти и священно подизображение.¹⁵ Учить же и се прѣмудрѣ богословие, еже аггелы сему въ ны произити,

¹⁰ «Еже творити» — якоже при Исусѣ Навинѣ и Гедеонѣ и иныхъ,* «Къ правому же пути от несвященни жизни» — якоже при Корнилиу Сътницѣ, пръвый бо от невѣрныхъ езыкъ прѣложисе.* «Чина же священнаго» — якоже при Даниилѣ «тмы тмами»* и Иезекиилу херувимъ,* и Исайи серафимъ явишесе.* «Прѣмирное же видѣние» — якоже при Павлѣ, възхыщенномъ даже до третяго небесе,* и при божьственномъ Иоанна Открывени.*

¹¹ «Непосредствѣ» же — сирѣчь кромѣ аггельскаго служения.

¹² Зри, како тлькуеть речение, глаголемо «Бога никтоже видѣ нигдеже»,* еже истиннѣше мѣню, и вѣде, яко суть писаническаа речения, глаголющая, яко Богъ явися чловѣкомъ, якоже при Адамѣ въ раи, и при Авраамѣ у дуба Мамврийскаго,* и егда въ Содомѣ идѣху,* и Моусеови на горѣ, аще и задняя глаголютсе узрѣти,* и глаголетъ, яко «само то скръвенное Божие никтоже видѣ, ниже узрѣти имать», еже есть существо Его. Или и высочайше, яко никтоже разумѣти или рещи можетъ, или възмощи имать, что есть Богъ. Аще ли же и быше богоявления нѣкимъ светнихъ, разумнѣй, яко по мѣрѣ кждо своее вѣры сподобляшесе нѣкоего видѣния, изъявляющаго ему божество, егоже ради осияние приемаше иже въ нь приходещихъ божьствныхъ разумѣваний.

¹³ «Видѣние оно» глаголетъ, иже, мню, на Фаворѣ божьствный свѣтъ,* иже явися божьствнѣ, и иже въ купинѣ божьствный огонь,* непосредствѣнѣ бывшая. Нъ обаче и сия посрѣдствомъ быше свѣта и огня въ образѣ являемаа прѣма силѣ зрещихъ.

¹⁴ Богоявления быти глаголетъ не ради еже Богу являтисе и показоватисе, еже что любо есть, се бо немощно есть, нь яко божьствнаго осияния светыи сподобляютсе нѣкими священными видѣними и себѣ по мѣрѣ сущиими, ихже аггелыми быти глаголетъ.

¹⁵ Знаменай, яко и Законъ инога божьствнаго законоположения есть подизображение, сирѣчь Христова божьствнаго вычловѣчения. А яко аггелыми дастсе прьво законоположение, являеть и святаы Стефанъ, глаголе: «Иже приесте законъ въ завѣщанияхъ аггель и не съхранисте».*

яко богозаконному чину оно уставополагающому, еже пръввых ради вторая къ божествному възводитисе.¹⁶ И бо не тъкмо при пръвъсходящихъ же и мншихъ умовъхъ, нъ и въ выкупочныхъ съ уставъ опрѣдѣлисѣ отъ всѣхъ прѣсущствнаго Чиноначелия,¹⁷ еже въ всякомъ священноначели пръвнымъ, и срѣднымъ, и послѣднымъ быти чиновомъ же и силамъ и отъ мншихъ быти божествнѣйшимъ учителемъ и руководемъ къ божествному възведению, и осиянию, и причещению.

4. Зру же, яко и еже божествное Исусова чловѣколюбия таинство аггелы прѣжде навикоше,¹⁸ таже тѣми въ насъ разума благодать мимохождаше. Сице бо божествнѣйши Гавриилъ Захариу убо иерарха научи, еже пророкъ быти еже отъ того безъ надежде благодатию божествною раждаемое отроче благолѣпнѣ мирови и спасителнѣ являемаго мужствнаго Исусова богодѣйства,¹⁹ Марию же²⁰ — како въ той будеть богоначелное неизвещаннаго богоздания таинство.* Иный же аггелъ Иосифа наказа, како въистину испльнитисѣ имуть* яже богоданнѣ обещанная прѣдъду Давиду.* Другой же пастыремъ яко многихъ отшъствиемъ и безмльвиемъ очищенномъ благовѣствоваше* — и съ нимъ множество вой небесныхъ — еже многолѣтнее оно прѣдаваху сущимъ на земли славословие.*

Възимамъ же и къ пръвышшимъ Словесъ свѣтоявляениямъ. Зру бо, яко и самъ Исусъ, иже прѣнебесныхъ сущствъ прѣсущствна вина,²¹ къ намъ

¹⁶ Знаменай, како пръвыми, сирѣчь пръвъзшдыши, вторая, сирѣчь мншая, къ Богу възводетсѣ, и — о аггельскихъ разчиненияхъ.

¹⁷ «Прѣсущствное же Чиноначелие» чиновъ тѣхъ Начело и творителну Вину глаголетъ.

¹⁸ Яко яже о вычловѣчени пръвѣ навикоше аггелы, яко являютъ яже по божествномъ Гавриилъ, научышимъ яже о святѣмъ Иоаннѣ, благовѣстившемъ же и Девѣ и яко отъ Духа Светаго зачнетъ выпльщаемаго Бога Слова.

¹⁹ «Мужствное богодѣйствие» Христово вычловѣчение есть, по немже, Богъ сый, въ плоти яже божествная съдѣла. Смотри же, како рекъ здѣ Исуса «мужское богодѣйствие», и заеже убо глаголати «мужствное» явленно, яко съвршень чловѣкъ бысть, «богодѣйствия» же ради — яко Богъ есть и чловѣкъ тѣжде, иже богознаменая Съдѣлавы. По малѣ же глаголетъ, яко «непрѣложнѣ», — прѣбысть бо и еже бѣ присно. И оно же паки зри, како глаголетъ въ святѣй Марии быти неизреченнаго богоздания богоначелное таинство: «богоздание» же глаголетъ явленно, яко Богъ създасѣ, по еже бысть чловѣкъ, по реченномъ: «Слово плоть бысть».* «Богоначелничско» же — яко Бога, Виновнаго и Начела сушаго глаголемыхъ богъ же и праведныхъ чловѣкъ, таинство вычловѣчения бѣ, егоже Бога Исуса прѣдменова.

²⁰ Знаменай сия на несторияне. Не вси же аггелы увѣдѣше таинство смотрения, понеже егда възношаше Господь по страсти, нѣции бѣху, глаголющеи: «Кто есть съ Царь славы?»* Выпрошение бо невѣдѣние являеть.

²¹ Знаменай се — на несторияне и безглавние, яко Исуса «прѣсущствну вину» глаголетъ, заеже Творца суща всѣхъ, и яко непрѣложнѣ глаголетъ Того быти по насъ. Не тожде же и едино сия естество, аще и самъ обѣ. И яко Самъ и Законоположитель и подъ Закономъ, и

непрѣложнѣ²² пришьд, не отместетсе еже от того въчиненнаго же и изволеннаго чловѣколѣпнаго благочинна, нъ благопокорнѣ повинуетсе Отца и Бога аггельми въображениямъ. И посрѣдствомъ тѣхъ възвѣщаетсе Иосифу еже от Отца усмотренное Исусово къ Егупту отшьствие* и паки еже къ иудеом от Егупта прѣшьствие.* И аггельми Того зримъ подь Отечьскими уставоположен'ми въчиняемаго. Оставляю бо рещи, яко въдушю яже священничскими нашими прѣданми изьявленна и о аггелѣ, иже Исуса укрѣпляющемъ²³ или яко и самъ Исусъ по нашемъ спасителномъ благодѣйствѣ въ изьявителный²⁴ пришьд чинъ, «Аггелъ Велика Свьѣта»* наречесе. И бо яко Самъ аггелолѣпнѣ глаголетъ, елика слыша от Отца възвѣсти намъ.*

яко и Ть яко чловѣкъ аггельми заповелѣвашесе въ отшьствии въ Егупт и от того въ възвращении, и Ть есть и аггеломъ сьдѣтель. Тѣмже единъ и тѣжде Христосъ въ двѣю естеству великое смотраения сьдѣла таинство, рече бо се: «Иже въ зрацѣ Божимъ сый, не въсыщениемъ непшева равнѣ быти Богу, нъ Себе истыци, образъ раба приемъ».* Се два зрака: еже бо рече здѣ «не отместетсе», се есть еже «не въсыщениемъ непшева», сирѣчь не неудостои яко чловѣкъ послушати и аггелъ. Благопокорнѣ бо повинуетсе Отца и Бога аггельми подизьображениямъ. Сим бо съ въчины чловѣческому роду послѣдовати.

²² Не бо прѣложисе божественно естество.

²³ Знаменай, яко укрѣпляющаго аггела Господа главизна яже въ Луцѣ носитсе, глаголетъ и великы Дионусие и яко паче написаннѣ въ таинствѣ скрвеннѣ тому прѣданно бысть, и светому Тимофею от апостола Павла. Тогово бо проповѣдание съписа Лука. Являет же се, яко въ таинствѣ приеть от еже рещи: «Священничскими нашими прѣданми изьявленна». Зри же и ино сказание, еже глаголетъ, еже бо рещисе Исаиемъ, «Велика Свьѣта Аггела» именоватисе рожденное отроче, плти его подобати глаголетъ. И почто наречесе аггелъ? Яко Отечь свѣтъ възвѣсти намъ. Спась бо насъ Своею страстию, показа, яко и Отець таковаго бѣ свѣта. Ниже бо яко мнши Отца аггелъ наречень бысть. Къ арианомъ се. **Инако.** Укрепляющаго аггела главизну къ плти пользно есть разумѣвати. И инде бо глаголетъ Благовѣствие по искушенияхъ бо, яко «Приступльше аггелы служажу Ему»,* и яко «утрудисе от путнаго шьствия»,* и яко «възаалка».* Вса бо сия показывают, яко съвршенна въсприеть чловѣка съ того страданми. Нъ речеть кто: «Гдѣ бѣ потреба аггела, Бож'ству ту суцу?» Глаголемъ, яко множайшая Богъ аггельми чудодѣйствуетъ, и сие глаголетъ всако божественное Писание.

²⁴ По еже къ Отцу от того реченномъ: «Явихъ твое име чловѣкомъ».*

ГЛАВА 5. ПОЧТО ВСА НЕБЕСНАЯ СУЩ'СТВИЯ ОТДОЛЪ ОБЩЕ АГГЕЛЫ ГЛАГОЛЮТСЕ

Сия убо есть яко по нас вина аггельскаго въ Словесехъ именованія. Испытати же, яко мню, потрѣба есть, кое ради вини богословци вса убо въкупѣ небесная существа аггеле наричуть,¹ къ изьявлению же приходеще прѣмирныхъ тѣхъ добротъ, чинъ аггельскій особнѣ именують, иже свѣршителнѣ окончаваеи² божественныя и небесныя чины, прѣжде же сего прѣвсходнѣ вчиняюще архаггельская удобрення, и начела, и власти, и силы, и елика сихъ прѣвзышдшая существія, яже Словесъ въдѣтъ изьявительная прѣдания. Глаголем же, яко по всакомъ священномъ удобрени прѣвзышдшеи убо чинове имѣють и яже мншиихъ удобреній осіянія же и силы, непричестныи же прѣвсходителнымъ себе суть послѣдныи.³ Светѣйшии убо прѣвзышдиихъ существъ чины и аггелы наричуть богословци, и бо суть изьявительны и сии богоначелнаго осіянія.

¹ Почто убо единого существа быти всѣмъ светымъ аггеломъ глаголющей церкви, божественный Дионусие многыи именуеть силы? Великий убо Дионусие, Александрскыи епископъ, иже от риторы, въ глыкованіяхъ, ихже створи о блаженномъ Дионусии, иже тому сыменномъ, сие глаголетъ, яко «нерожденное обыче нарицати внѣшняя прѣмудрость всако невидимо естество, такожде и существія състави». От сего, — глаголетъ, яко — по внѣшнихъ реченныи быше светымъ Дионусиемъ таковы гласы иносказателнѣ.

² Послѣдній умныхъ чинъ истѣйше аггелы глаголетъ именоватисе, прѣвзышдшее же инако. В прочей же главизнѣ девять чиновъ таинствнѣ въспоминаетъ, ниня обаче глаголетъ, яко горнѣйши чинове вѣдетъ, елика долныи осіяниемъ навицають, вѣдетъ же и инаа, долнѣйшимъ невѣдомая. Аще ли же и сие есть, обаче роднѣйшимъ именовъ и аггелы есть, егда наричутсе вси умныи чинове. Глаголет же и почто, якоже въ сто и второмъ псалмѣ: «Благословите Господа вси аггелы Его»,* — и въ сто и третьемъ: «Творей аггелы Свое духы»* и прочая. Не супротивьобращает же се слово, мншии бо не именуются горнѣйшиихъ нареченми, и — яко прѣвзышдшиими силами пдвзышдшее учими бывають.

³ Въпросити убо нѣкто иматъ: си небесныи чинове — прѣвзышдшеи, и нижши, и еше мнши — тако быше, яко овъ убо горнѣйши быти, ов же нижши? И глаголемъ, яко и умнаа вса самовластнаа съдѣя Богъ. Аще бо чловѣкъ самовластнѣ бысть от прѣстнаго вмѣшениа и душе сы, колми паче умниа силы, не имущее земльно что или тежко, самовластныи быше? Се бо и божественное прѣдставляеть Писаніе, глаголе диавола от аггельскаго волею испадъша чина, и съ же божественныи мужъ прѣд малѣмъ о аггельскыихъ силахъ, яко: «Умнѣ, бо на богоподражателное себе въображающе и къ богоначелному подобію прѣмирнѣ зреще и въобразати желающе разумни ихъ видъ»,* — от сихъ же всѣхъ показуетсе, ако самоизвольныи и самовластныи суть умныи чинове. Вълѣпоту убо глаголетъ кождо прѣма мѣрѣ своего благаго желанія осіянаетсе божественнымъ разумніемъ. Сего ради и чины наричутсе степеновиднѣ, якоже въ нихъ желанію сущему. Сего ради здѣ глаголетъ, не имуть слова послѣдній чинъ серафимъ или прѣстоле именовати. Знаменай же, почто наричутсе вси чинове аггелы.

Чин же небесных умов послѣднѣй не имуть слова начела, или прѣстоле, или серафиме именовати, ниже бо есть въ причестии прѣвышшихъ силъ. Нъ якоже сѣи иже у нас божествѣнные прѣвосвященники⁴ възводитъ къ вѣдомымъ ему богоначелия лучамъ, сице и иже прѣждныхъ того сушьствѣ въсвещенные силы възводителныи къ божествому суть свѣршителнаго⁵ аггельскому священноначелию удобрения, — аще не еда кто и се речеть еже общая быти⁶ всака аггельская именования по всѣхъ небесныхъ силъ въ боговидное и от Бога свѣтодание мнѣшемъ и прѣмущемъ причестии. Нъ да паче намъ слово благосудно будетъ, да видимъ священнѣ яже въ Словесѣхъ изъясленная святолѣпная свойства⁷ коегождо небеснаго удобрения.

⁴ Яко истѣйше аггелы възводитъ священныи чловѣки на вѣдомыи имъ божественныи луче. **Инако.** Зрительныхъ таиствѣ си испльнившѣ священнѣй Дионусие, глаголетъ, яко убо послѣдни чинъ, нарицаемѣй аггелы, иже въ чловѣцѣхъ священноначелники церковнии пѣстунски наставляють на възведение къ Богу, долнѣйши же чинъ тѣ нашъ пѣстунъ и степенми прѣвыше лежимыи горнѣйши яко мнѣшее тайнонаучавають.

⁵ Сиречь послѣднаго аггельскаго глаголю. Сѣй бо чинъ свѣршаеть долѣсходителнѣ вса удобрения. Знаменай же, яко славить общаа быти всака именования деветихъ чиновъ коумуждо чину, заеже общѣ осияватисе въ боговидное и въ свѣтодание от Бога, аще и не подобнѣ.

⁶ Есть, глаголетъ, общѣ именовати все разумнии и бесплѣтныи чины и по иномъ образѣ, сирѣчь, по боговидномъ, еже есть по къ Богу приближению, поелико мощно коумуждо ихъ. Тѣмже убо все прѣмирнии чины боговиднѣхъ нарицати; и ино же приобщение имѣти всѣмъ тѣмъ, еже свѣтлѣйшаго осияния от Бога дарование, аще и прѣма коумуждо мощно — или мнѣше, или вещьше — осияние даетсе. Въ иже же «О божественныхъ именехъ» словѣ рече, яко божественныи едини глаголютсе всакого чина чиноначелници.

⁷ Знаменай же, како свойства глаголетъ яже коегождо чина мѣры.

ГЛАВА 6. ЧТО ПРѢВО НЕБЕСНЫХЪ СУШЬСТВѢВЪ УДОБРЕНИЕ, ЧТО СРѢДНЕ, ЧТО ПОСЛѢДНЕ

1. Еликаа убо суть и какова прѣнебесныхъ сушьствѣвъ удобрения и како яже у нихъ священноначелия свѣршаютьсе, единому извѣстнѣ вѣдѣти глаголю божествителному тѣхъ Службоначелию (*рядом маргиналий*: божествителное Службоначелие Богоначелие глаголетѣ); къ симже и тѣмъ разумѣти свое силы же и осияния и свое священное и прѣмирное благочиние. Немощно бо намъ вѣдѣти¹ яже прѣнебесныхъ умовъ таинствѣя и светѣйшая ихъ свѣршения, аще не, негли речеть кто, еликаа тѣми насъ яко своя добрѣ вѣдущими Богоначелие

¹ Яко единъ Богъ, иже и боготворей тѣхъ, вѣсть извѣстнѣ тѣхъ же и тѣхъ службы; и самы же вѣдетъ себе и яже тѣхъ. Мы бо ни едино извѣстнѣ еже въ тѣхъ вѣмы, развѣ еликаа от божествнаго научихомсе Писания.

науци. Прочее мы убо ничесоже самодвижнѣ рещи имами; елика же аггельскихъ видѣний отъ священныхъ богослов'ць узрѣшесе, сия навикше, мы, яко мощни есмы, да изложимъ.

2. Вса богословие небесная существа деветь нарекло есть изъявительными именованми.* Сия божествный нашъ священнослужитель² (*внизу на поле без какого-либо значка*: священнослужителя глаголетъ или светого Павла, или светого Иерофеа) въ три разлучаетъ троичская удобрения.³ И прьво быти глаголетъ еже о Бозѣ существо присно и близъ тому и прѣжде иныхъ непосредствнѣ⁴ съединитисе прѣданное. Светѣйшии бо прѣстоле* и многоочите и многокрилате чинове, херувимъ еврейскимъ гласомъ и серафимъ именованна, по всѣхъ прѣвѣсходещемъ приближении о Бозѣ непосредствнѣ присѣдѣти рече прѣдаватисе Словеснимъ изъявлениемъ. Троичское убо се удобрение яко едино и въкупочиньно и въистину прьво священноначелие славный нашъ рече наставникъ, егоже нѣсть друго божествнѣйшее и прьводѣльными Богоначелия осиянми непосредствнѣ приближнѣйше. Второ же быти реже еже отъ властей и господствъ и силъ⁵ съвръшаемое, и третие послѣднихъ небесныхъ священноначельствъ, еже аггель же и архаггель и начель удобрение.

² Священнослужителя убо своего обыче нарицати или божествнѣйшаго апостола Павла, или светого Иерофеа, якоже въ иже «О божествныхъ именованехъ» словѣ речесе. Ниня же никого иного мно глаголати тому, развѣ светого Павла. Ниединого бо бѣ се иного развѣ того, иже даже до третияго небесе достигшаго и яже о сихъ навикшаго.

³ Прьво троичско се и боговидно чиновачелие есть смысльнѣ и достойнѣ Богу зрей разумѣти отъ Иезекиила, иже глаголетъ прѣстоль прьвы, на немже явисе Богъ, таже абие ближня херувимъ;* отъ Исаие же светѣйшии серафимъ, окрѣсть стоеще Бога, зрѣхусе.* Сия же являютъ еже паче всѣхъ горнѣйшее при Бозѣ ихъ покоище. Изъявляютъ же се немалъ сия подобнѣ и въ «Открывении» светого Иоанна, апостола, еуаггелиста и богослова.*

⁴ «Непосредствнѣ» реченно бысть, понеже нѣсть иный чинъ прѣжде того. Знаменай же, яко прѣстоле, рекше многоочитая и многопернатаа херувимъ и серафимъ, глаголетъ горнѣйшаа быти всѣхъ силъ.

⁵ Прочее же двѣ троичсѣ умныхъ чиновачелии отдолѣ горѣ събираеть, прьва бо суть господствя, таже проче силы, также власти. Съ же власти прьвыи вчинивъ, срѣдние приеть господствя. И третие служебные троице прьваа начела, таче проче архаггелы, и послѣдни аггелы. Ниня же убо не сиче тѣхъ въспомену, въ прочей главизнѣ, нѣ отдолѣ горѣ приемъ именоваль есть. Апостоль убо въ еже «Къ Римляномъ»* и въ еже «Къ Ефесиомъ»* въспоминаеть нѣкоторихъ аггельскихъ чиновъ, не сѣи же чинъ сповѣдуеть. Являютъ же велики Дионусие, яко въ тайнѣ сия прѣдасть святимъ божествный апостоль.

ГЛАВА 7. О СЕРАФИМЪХЪ, И ХЕРУВИМЪХЪ, И ПРЪСТОЛЪХЪ, И О ПРЪВОМ, ИХЪ СВЕЩЕННОНАЧЕЛИИ¹

1. Сьй мы и приемлюще² светиихъ священноначельствъ чинъ, глаголемъ, яко всако небесныхъ умовъ именованіе сказаніе имать коегождо богоданнаго свойства.³ И светое убо серафимъ именованіе рѣше иже яже евреи вѣдуше или еже «пожигателе» изъявляти, или еже «сыгрвателие», а еже херувимъ — «множество разума», или «излитіе прѣмудрости».

Вьлѣпоту убо пръвое небесныхъ священноначельствъ от прѣвышшиихъ сушьствъ священнодѣйствуетсе, чинъ имѣе всѣхъ высочайши,⁴ еже о Бозѣ непосредствѣ присѣдѣти и пръводѣльная богоявленія и съвршенія въ тѣ яко приближнѣ начелничствнѣ съходити. «Сыгрвателие» убо именуется и прѣстола и «излитіе прѣмудрости» изъявительнымъ боговидныхъ ихъ имьствъ именованьемъ.⁵ Иже бо приснодвижное быти⁶ убо ихъ о божественныхъ и непрѣстаемое и еже теплое и скорое и прѣгоршее всѣхъ приближнаго и неисходнаго и неуклоннаго приснодвиженія и еже иже мьншиихъ възводителнѣ и силнѣ уподобителное яко вьстопляе она и възгарае на подобную топлоту и еже палителнѣ и всесъжигателнѣ очистителное, и неприкривателно и неугашаемо имѣе такожде присно свѣтовидно и просвѣщателно свойство всакого несвѣт-

¹ Паки надъписание отдолъ на высочайшая въсходитъ, третии бо серафимъ, втори херувимъ, и пръви прѣстола. Супротивъ обратнѣ убо надъписа.

² «Приемлюще» глаголетъ, рекше «любеще» или «о семъ усрѣдствующе».

³ Знаменай, яко всако име разумныхъ знаменій объемлетъ чину свойствнаго дѣйствія, якоже светыхъ серафимъ и херувимъ сказанія имень являють.

⁴ Безъ какого-либо знака, указывающаго место, къ которому относится маргиналий, на поле рядомъ начинается следующая, частично утраченная, запись: Пръвое небесныхъ священноначельствъ, рекше службѣнство, или стояніе, или чинъ паки отъ тѣхъ пръвыи и прѣвышшихъ сушьствъ отъ серафимъ и херувимъ и прѣстола священнодѣйствуетсе.

⁵ Понеже боговидное имьство глаголетъ при божественныхъ умовехъ, не подобаетъ непшевати великаго Дионусіа добродѣтели сие умніе яко случай, заеже и въ насъ тѣмъ прибывати глаголати, яко ино въ иномъ подлежащемъ, рекше качество прибывшее. Случай бо и подлежаемо отонудъ отврженное есть, яко и всако сложение и вещи безъобразное отонудъ изврженно есть. Аще бо бѣ ино въ иномъ, сирѣчь случай въ подлежащемъ, не бы убо живо было по себѣ существо оно, ни же обожатисе по себѣ якоже мощно можаше единого ради чина, яко ино въ иномъ съхраняемо. Яже убо сихъ реченія имьства самоосуществленна суть, не убо яко случай въ подлежащемъ, невещствнаго ради. Сего ради велики Дионусій долъ, въ иже «О церковномъ священноначелии» словѣ, въ главизнѣ четвертой, осуществленна быти глаголетъ имьствія яже въ нихъ.

⁶ Знаменай, яко божественныя силы по имьству имуть боговидное. Имьство же есть качество прѣбывателно. Отсууду убо являетсе, яко самовластны суть, въ имьствѣ добродѣтели имуще. Се пространѣше прѣдставляеть Аммонъ Андрианополскы* въ иже «О въскрѣсеніи» отъ того на Оригена* писанныхъ словѣхъ.

лаго тмтворения отгонително суще и потрѣбително серафимъ именованіе изъявителнѣ учить. Херувимское же еже разумно быти ихъ и боговидное, и еже прѣвышшаго свѣтодана приетное и зрительное въ прѣводѣльной силѣ богоначелнаго благолѣпія, и прѣмудротворнаго прѣподанія испльненное, и причестное обилнѣ къ вторимъ излитіемъ дарованныя прѣмудрости. А еже прѣвысокихъ и прѣвзетихъ прѣстолю⁷ еже всакого несмѣснѣ изетисе долѣшствааго смѣренія и еже въздвигателнѣ прѣмирнѣ горѣносное⁸ и всакого послѣднства неклонителнѣ горѣприсвоенное и о иже вѣистину Вышнемъ вѣми силами неколѣбательнѣ и благостойнѣ присѣдимое и богоначелнаго нашѣствія въ бестрасти всачѣсцѣмъ и невеществи приетное, и еже богоносное⁹ и богоугоднѣ на божѣствная подѣтия възлѣтаемо.

2. Сие убо еже имень ихъ яко по насъ изъявление. Реши же достойно естъ, кое священноначеліе ихъ непщумемъ. Всакого бо убо священноначелія мысли богоподражателнаго боговиднїя прилежателно и неклонителнѣ быти, и еже раздѣлїтисе всакому священноначелничскому строенію въ причестіе¹⁰ священно и прѣподаніе¹¹ чищенія несмѣснаго и божѣствнаго свѣта, и служѣбнствнаго художѣства доволно уже от насъ рещисе непщю. Нїня же достойнѣ рещи молюсе прѣвышшїихъ умовъ, како еже въ тѣхъ священноначеліе Словесы изъявляетсѣ.

Прѣвымъ¹² существомъ, иже по существотворномъ ихъ Богоначелїи присѣдѣща и якоже въ прѣддвѣрїи того вѣчиненна, всакїе суть невидимыя

⁷ Толкованіе на нижнемъ полѣ безъ какого-либо значка-указанія, къ какому мѣсту текста оно относится: Прѣвысокихъ прѣстолю именованіе учить еже быти имъ изетимъ всакого долѣснаго смѣренія и прочаа, яже глаголютсѣ тѣмъ имѣти я.

⁸ Горнѣйше естъство и по Бозѣ отъ Того вѣчиненное являеть прѣстолю ничтоже на тимѣнна вѣнимающимъ, якоже назнаменуеть еже ничесоже тѣмъ имѣти долѣшствааго смѣренія, нь еже къ Богу вѣсходное, горѣноснѣ внемлюще. Добрѣ же приведе «прѣмирнѣ», рекше бесплнѣнѣ и невеществнѣнѣ и умнѣ, рекше мыслнѣнѣ. Да не убо възнепщюеши еже «въздвїзательное» путь быти телесны, приведе еже «невеществнѣнѣ».

⁹ Знаменай, яко и иже свѣтыхъ прѣстолю чїнь богоноснѣнѣ рече, яко носе [зачеркнуто красными чернилами: на томъ] почиваемаго мыслнѣнѣ Бога. Зри убо, понеже и блаженный Василїе Кападокійскїй* богоноснѣнѣ рече плоть, смотри достоитъ, како рече. Нь убо плть самого Господа по съставу съединисе самому Богу Слову, сего ради и еже плть носити тѣ глаголетсѣ отъ отецъ и плть облѣщи. Что убо безмѣстнѣ, аще и плть тогова глаголетсѣ богоноснаа, яко носещи Бога Слова по съединенїи нерастоятелномъ, тогова плть и глаголемаа и бывши истѣйше и поистинѣнѣ? Си же, по благодати имуще въ себѣ Бога, неизреченнымъ словомъ и недомыслною мыслїю, богоносны и си сего ради глаголютсѣ.

¹⁰ Яко прѣвѣ причествуютъ прѣвїе силы Богу, и тако прѣподають мнѣшимъ бывшее въ нихъ осїаніе.

¹¹ Яко всакого мѣчтанія вещнаго неприетны суть и непрїмѣсны всакому сниженїю.

¹² Сїце събирай се: «Прѣвымъ существомъ свое непщевати достоитъ быти имъ и по всемъ подобовїдно священноначелїе, иже по существотворномъ ихъ Богоначелїи присѣдѣща, и яко въ прѣддвѣрїи того вѣчиненнаа, всакїе видимїе и невидимїе бывшее силы суть прѣвѣзшїихъ».

и видимые прѣвъзъшдшей бывшее силы, свое непщевати достоить быти и по всемь подобовидно свещенноначелие. Чиста убо та достоить непщевати¹³ не яко несвещенныхъ скврнь и гнусоть свободьннаа, ни же яко тименныхъ неприетна мычаний, нь яко всякого сънижения несмѣснѣ высочайшая, и всякого мншого свещения по прѣвъзъшой чистотѣ всѣхъ боговидныхъ силъ прѣвосѣдателнаа, и своего приснодвижнаго и самодвижнаго¹⁴ по боголюбзнаго непрѣложению чина неклонителнѣ зѣло дрѣжещаасе, и еже на худъшая по нѣчесомь умьнение отнудь невѣдушаа, нь непадаемо присно и непрѣдвижимо имущаа своего боговиднаго свойства несмѣсное присѣдание. Зрителнаа¹⁵ же паки не яко чюствьныхъ знаменый или умнихъ видителие,¹⁶ ни же яко различиемь свещеннописаническаго видѣния на божьствное възводимая, нь яко всякого невеществнаго разума высочайшимь свѣтомь испльненнаа и добротворные и начелные доброты прѣсущьствнаго и триспѣтнаго зрѣния, яко лѣпо, насыщеннаа, Исусова же приобщения¹⁷ такожде удостоеннаа не въ образѣхъ свещеннозданныхъ зрачнѣхъ въображающихъ богоназданое уподобление,¹⁸ нь яко выистину тому приближаемаа въ прѣвъмь причестии разума богодѣльныхъ Его свѣтъ, и убо яко еже богоподражателное тѣмь прѣвъсочайше дарованно бысть и приобщаются по еже тѣмь мощно въ прѣводѣлнѣй силѣ¹⁹ богодѣйствьнымь Его и чловѣколюбнымь

¹³ Яко не тъкмо божественные силы саме скврнь и гнусоть свободны суть, нь и всякого мычания вешнаго неприетны суть, и непримѣсни всякого умьнения, и еже на худъшее умьнение никакоже вѣдуше. Сие же разумѣи не яко по естеству непрѣложни суть, нь, самопроизволны суще, ради еже на благое зѣлнаго желанія въ благое уклоншесе, прѣбьше сие, имьство якоже имуще еже непрѣдвижимо. Единь бо по естествѣ непрѣложьнь Богъ, сие же аще сие съдѣлани быше, не би убо испаднуль диаволь. Нь и сии все единаго и равнаго чина. Еже бо от естества благое умьнения не имать.

¹⁴ Самодвижение глаголетъ светы съ быти движение ихъ, — яко неизмѣнно и непрѣложно такожде же имущее. Движения же суть при тѣхъ яже непрѣстаннаа въразумѣвания дѣйствія, умове бо суть немльчныи. И знаменай еже «по боголюбзнаомь непрѣложное», и прочти четвертьтоу главизну иже «О божественныхъ именехъ» слова и 8 главу настоещаго слова.

¹⁵ Знаменай, како глаголютсе зрителни светы чинове си и яко не знаменми или видѣнми Писания богоразумие имуть, якоже мыи.

¹⁶ Зрителие глаголютсе иже таинь видителие. Сия же светымь знаменателнѣ глаголемими о Бозѣ чюствьными откриваютсе, еже при горныхъ силахъ нѣсть разумѣти. Знаменай же реченное «трисвѣтлое видѣние» вмѣсто «трисъставно светое Божество».

¹⁷ Исусова же приобщение причестие славы и неизреченние свѣтлости тѣла Христова глаголетъ, съ плтью бо съсѣдитъ Отцу.

¹⁸ Знаменай же, яко еже къ Господу Исусу уподобление богоздателно есть, сирѣчь съдѣлуетъ богы уподобляемие, — и како непосредствѣнѣ и кромѣ знамени чины си уподобляются Христу, от того се примьшен.

¹⁹ Знаменай, яко и прѣвозданныи суть силы сие и добродѣтели Господа Исуса Христа яко силы сие имуть.

добродѣтелемъ. Свършеннаа же такожде не яко различия священнаго въ сказателномъ художествѣ сияющаа, нь яко прѣваго и прѣвсходимаго обожения испльненаа по прѣвсочайшемъ яко аггеломъ богодѣйствъ художствѣ. Не бо иными светыми сущѣстви, нь от самого Богоначелия прѣвосвещенствуема²⁰ въ еже на то непосредствѣнѣ въспростиратисе всѣхъ прѣвсходешою силою и чиномъ и въ всечистомъ и по всемъ неклонителномъ присѣдеще и къ невеществному и умному благолѣпию, яко праведно, въ видѣние приводетсе и яже богодѣйствѣ художествѣная словеса²¹ яко прѣваа и о Бозѣ суща навикають от самого службоначелия прѣвсочайше священначелствуема.²²

3. Сие бо богословци явѣ сказують еже убо мнѣшиимъ небесныхъ сущѣствъ добротамъ от прѣввѣшьдшихъ благодобротнѣ научаватисе²³ богодѣинимъ художествамъ, всѣхъ же прѣввѣшьшимъ от самого Богоначелия, яко праведно, ученми осияватисе. Нѣкоторые бо убо ихъ въводитъ от прѣввѣихъ священнѣ навикающе, еже «Господа быти небеснымъ силамъ»^{*} и «Цара славы»^{*} иже на небеса чловѣколѣпнѣ възнесеннаго,²⁴ нѣкые же къ самому Иесу недоумѣвающесе и еже о насъ Тогова богодѣйствия²⁵ художество навикнути желающе и тѣхъ самому Иесу непосредствѣнѣ научавающу и прѣводитнѣ тѣмъ изьявляющу Свое чловѣколюбное благодѣйствие. «Азь бо, — рече, — глаголахъ правду и судъ спасения».²⁶ Дивлю же се,²⁷ яко и яже прѣнебесныхъ

²⁰ Знаменай, како глаголютсе свършенны божествны чины си. Сказателное же различие художество глаголетъ изьяшнение и тлькование священнаго прѣдания, егоже трѣбують и мнѣши чинове, якоже напрѣдъ глаголетъ, много же множае чловѣци. Кромѣ бо тлькований, сказающихъ многоразличную прѣмудрость светиихъ зрѣний, не мощно сия разумѣти ни же намъ, ни же мнѣшиимъ прѣввѣихъ трѣхъ чиновѣ. Тѣмъже глаголетъ, яко убо подвѣшьдшими чиновы коиждо прѣвы священноначелствуеъ тькмо и не инаа сила. Горнѣйшихъ же сихъ удобрений священноначелиемъ Богъ священноначелствуеъ единъ, и не инаа сила.

²¹ Понеже бо всакихъ горнѣйши суть и ничтоже имуть прѣввѣшьше, елико въ иныхъ силахъ, вѣлѣпоту от Самого Бога единого прѣвы, яко горнѣйши, научаеми суть божественному разуму.

²² На поле рядом: Священноначелствуема — сирѣчь тайно учима.

²³ Знаменай еже «научаватисе»: явлет бо не по естествѣ быти имъ таковыми.

²⁴ Знаменай на василияне, рекше несторияне,^{*} — яко възнесисе по еже чловѣкъ Христосъ Иесу Ть есть Господь умныхъ всѣхъ и Царь славы, яко учими навикають от глаголющихъ: «Възмете, врата, кнезы ваши»,^{*} — и выпрашающе: «Кто есть съ Царь славы?», — и паки слышше: «Господь силамъ»,^{*} — и прочая. На безглавние же и евтихиане,^{*} яко аще и Господь силамъ, нь убо плть и явленъ чловѣкъ, яко и къ странному удивлятисе прочимъ начеломъ.

²⁵ Добрѣ богодѣйствие нарече еже о насъ сьмотрение. Божия бо бѣху яко вьистину дѣла вса, яже въ сьмотрени Господни: рождество светое, исцѣления, яже при страстехъ знаменая и вьскрѣсение.

²⁶ А еже «Азь бо глаголахъ правду и судъ спасения» Исаи суть, и зри, како сия разумѣ.

²⁷ Речение снче сложи: «Дивлюсе, како прѣваа сущѣствъ прѣнебесныхъ, яко срѣдняа, богоначелныхъ осияний желають». «Посрѣдѣвскриляемаа» же рече яко не къ крайнее высотѣ възлѣтаемаа, нь срѣды касающасе разумѣний. «Недоумѣвати же се» назнаменуеъ еже глаголати: «Кто съи приходей от Едома?»^{*}

сущьствъ пръваа и толико всѣхъ прѣвсходяща богоначелныхъ осияний яко посрѣдѣвскриляема²⁸ благоговѣйнѣ желаютъ. И бо не Самого Бога выпрашають.²⁹ «Почто ти оброщенны суть ризи?»,* — къ самѣмъ же недоумѣваются прѣвѣ, показующе убо, яко навикнути желаютъ и богодѣйствѣнаго разума желаютъ, не прѣдваряюще же иже по божественномъ прошествии даемаго осияния. Прочее убо прѣво небесныхъ умовъ священноначелие от самого Службоначелия прѣвосвященствуемо въ еже на то непосредствѣнѣ простиратисе всесветѣйшаго очищения, непреступнаго свѣта, прѣждесъвършения съвършеннодѣйствія по мѣрѣ се испльняемо очищается и просвѣщается³⁰ и съвършеннодѣйствуется всакого убо снѣжения несмѣсно, прѣваго же свѣта испльнено и прѣводатнаго разума и художества причестникъ навръшаемо.

Свъкупив же и се да реку убо не нелѣпостнѣ, яко и чищение³¹ есть и просвѣщение и съвършение еже богоначелнаго художества причещение, неразумия убо рекше очища по чину даемымъ разумомъ съвършенныхъ навиченый, просвѣщае же собою божественнымъ разумомъ, егоже ради очищаетъ яже не прѣвѣ узрѣнна елика ниня изъвляютсе высочайшаго ради осияния и съвършае паки тѣмъже свѣтомъ еже по имѣству художествомъ свѣтлѣйшихъ вичений.

4. Сие убо есть яко по моемъ художествѣ прѣвое небесныхъ сущьствъ удобрене еже «окръсть Бога»^{*32} и при Бозѣ непосредствѣнѣ стоей и

²⁸ На поле рядом частично срезанная запись: «Посрѣдѣвскриляемаа», рекше не велми прѣдръзавающе сами на увѣдѣние, ни же паки небрѣгуще о томъ, нь благоговѣйнѣ желаютъ.

²⁹ Зри, съ количѣмъ страхомъ и благоговѣниемъ всѣхъ высочайши чины яко срѣдны, а не прѣвы выпрашають другъ друга прѣво яже въ Исайи: «Кто сын, приходей изъ Едома, оброщениемъ ризамъ его от Восора»,* — и тогда якоже повелѣваемы от Бога къ Нему глаголють: «Почто Ти оброщенны суть ризи?»

³⁰ Знаменай же, како глаголетъ очищатисе, и просвѣщатисе, и съвършеннодѣйствоватисе божественнымъ чиномъ.

³¹ Знаменай, что чищение при умовѣхъ и что неразумие. По имѣству художество есть прѣбывателно и неотъемлемо осияяемаго разума постижение.

³² Понеже и стоещая, и окръсть Бога ликующая непосредствѣнѣ прѣвая сия чиноначелия глаголетъ, достоить изъявити, како и стоитъ, и движутсе, якоже въ лику окръсть Бога. И убо от Исайе узрокъ приеть, иже глаголетъ: «И серафимъ стояху окръсть Его, шесть крыль единому» и прочая; наводитъ же: «И двѣма лѣтѣху».* Какъ бо стоеща лѣтѣху окръсть? И да разумѣтсе сице. Всакий умъ, от всѣхъ виновнаго Бога всиявъ, понеже от Съдѣлествовшаго и всия, глаголете о Томъ якоже о сроцѣ движатисе, движению не мѣстному нѣкому сущу, нь разумному и живому. Есть же окружно ума движение таково. Все еже разумѣваей или умъ сый разумѣваетъ, или яко причествуе ума. Иже убо умъ сый прѣвѣ разумѣваетъ, а еже причествуе уму вторѣ разумѣваетъ. По семь убо, по еже умъ сый разумѣваетъ, движатисе глаголетсе убо. Окружное же умышляетсе движение сие, по еже възвращаетсе и въ себѣ бывае сице, себе разумѣти иматъ и иже прѣжде того, от Негоже всия, яко убо от Бога възхотѣвшаго произложень бывъ; о томъ, вмѣсто о Божиемъ желани и любви, якоже о сроцѣ, будетъ. Не бо съединяютсе вторая прѣжднымъ ихъ, нь ликованию нѣкоторому бываемо уподобисе. Раждаема бо быти въ своемъ желаютъ отродъ Родившаго

протѣ и непрѣстаннѣ ликъствуе въ вѣчнѣмъ Его разумѣ по прѣвысочайшемъ яко въ аггелѣхъ приснодвижнѣмъ присѣдѣнии, многа убо и блаженная зречистѣ видѣния, и простими и непосредственными зрамаи осияваемо, и божественные пище исплняемо,³³ многа убо приводатнымъ излитиемъ, единые же неразличнѣ и единотворнѣ богоначелническаго гощения единствомъ, многаго же приобщения Божия и съдѣйствія удостоенно еже къ Тому яко же мощно уподоблениемъ добрыхъ имѣствъ же и дѣйствъ, многая же божественныхъ прѣвсходителнѣ вѣде и богоначелнаго художества и разума въ причестии, поеже есть лѣза, бываемо. Сего ради и пѣния тогова богословіе сущиимъ на Земли прѣдало есть, въ ихже священнѣ является еже прѣвысочайшаго осияния прѣвсходителное. Овы бо убо того чювьствнѣ рещи, «яко гласъ водъ многъ»,* выплюють: «Благословленна слава Господня отъ мѣста Его!»,* — овы же³⁴ многопѣтое и честнѣйшее възываютъ богословіе: «Светъ, светъ, светъ Господь Саваофъ, исполнь вса земля славы Его!»* Сия же прѣвысочайшая прѣнебесныхъ умовъ пѣснословія уже убо въ иже «О божественныхъ пѣсняхъ»³⁵ якоже мощно изъявихом и речесе о сихъ въ онѣхъ яко по насъ доволнѣ, отъ нихже въ възпоменути довлѣеть явити толико въ настоюще врѣме, яко богословными художествомъ прѣвое удобрение яко

зреть. Еже бо убо въ разумѣни къ прѣжднимъ того обрашаемо окружнаго движения мысль вводити. Понеже убо въздѣ есть Богъ, яже въздѣ Тому съпослѣдующая еже хотѣти присно Того разумѣвати, о семъ радуютсе и ликуютъ, якоже веселиемъ. Глаголетсе убо умъ въ себѣ быти и къ себѣ спѣшитисе. Еже убо въ себѣ есть и является бесмртие, стояние имать. По еже бо быти, еже есть бесмртно быти, стояти разумѣвается; по еже же къ себѣ тѣшатисе двизатисе, не хотѣ разлитисе како въ извѣния его и вещная разумѣния. По убо самодвижнѣ, не стоитъ, нѣ движитсе; по сущствѣ же присно такожде имушемъ стояние, нѣ не движение имать. Есть убо и по ествствѣ коемуждо умовъ устрѣмление, еже къ Богу желаніе и еже о Немъ, якоже о сротѣ, окружное ликованіе, якоже круга о знамени, рекше о сротѣ, отъ ниеже състависе. И бо и по ественной нужди коеждо сущиныхъ еже о Бозѣ ликуетъ ликованіе, еже быти желаетъ Виновнаго. Сице убо о всѣхъ Цари вса суть и Его ради вса и Онъ все добрыхъ виновнѣ. А еже рече непосредствнѣ прѣвая о Бозѣ ликъствовати, яко не имуше нѣчто прѣжде тѣхъ, является, яко втораа и третія, сирѣчь чювственная, посрѣдствомъ прѣжднихъ о Бозѣ, якоже речесе, по мѣрѣ ликъствуютъ.

³³ Умная видя убо суть и свойства бытий раздѣльныхъ въ бесплѣтнствѣ же, и еже мѣста не трѣбовати невещствная суть, да вмѣстѣтсе, якоже телеса вса. Идѣже бо тѣло, и мѣсто.

³⁴ Како подобаетъ разумѣти мѣсто при Бозѣ, Писанию въздѣ глаголющу неопрѣдѣлно быти Божество и еже «Небо прѣстоль Его, Земля же подножие ногама Его»,* и пакы: «Постави удолия мѣриломъ и Землю гръстію»,* — и пакы: «Аще поиду на небо, Ты еси ту, аще ли съниду въ адъ, ту еси».* Кое убо мѣсто Иезекииль умысли Богови? Глаголемъ, яко мнѣшаясе намъ неудоумѣвателная Богъ иже Того искушимъ отъ всего движения изъявляетъ. Глаголетъ бо божественное Писаніе: «Аще заповѣды Мое съблюдетъ кто, Азь и Отець приидеа и обытѣль въ немъ сътворива».* Тѣмже убо и умние силы, и светинихъ душе и всѣхъ хранещиныхъ заповѣды, мѣсто наричутсе убо вѣлѣпоту Божие и покоище. И индѣ глаголетъ: «Почи Духъ Мой на нихъ».*

³⁵ Знаменай, яко и друго съписаніе ему есть: «О божественныхъ пѣніяхъ».

лѣпо осияно бывше от пръвые богоначелные Благости, сее яко благовидно свещенноначелие и сущимъ по немь проче прѣподасть, оно съкращеннѣ рещи сповѣдуе еже честному самому и прѣхвалному и всехвалному Богоначелию праведно благословнѣ быти от богоприетныхъ яко мощно пѣтисе и воспѣватисе умовь³⁶ (сии бо суть яко боговидныи божествная «Мѣста» богоначелничскаго, якоже Словеса рѣше, «покоюща»)³⁷ и уже яко Единица есть и Единая Трисъставнаа от прѣнебесныхъ сущьствъ даже до послѣднихъ земле посилаючи благостный свои на ва сушая промысль яко вакаго сущства прѣначелное Начело и Вина и всѣхъ прѣсущьствьныхъ неодръжныимъ объетиемь³⁸ обдъръжещи.

³⁶ Реченное яко: «Кый храмъ съзидете Ми, глаголетъ Господь, или кое мѣсто покоищу Моему?»* — являеть не глаголатисе о чювствномъ нечесомъ, нь о божьствныхъ сихъ умовѣхъ. Или и сице: всхотѣ Богъ назнаменати, яко не описанно есть Божество. И инако: яко въ самѣхъ слышешихъ не бѣ Богу мѣста покоищнааго невѣрия ради ихъ, якоже глаголетъ въ Благовѣствияхъ Господь: «Сынъ же Чловѣчскый не имать, гдѣ главы поклонити».*

³⁷ Не тъкмо, рече, Трисветое пѣние являеть и иже «от мѣста Его» Бога славословеши гласъ, еже прѣподаватисе и мньшиимъ чиномъ разумѣвати и воспѣвати Бога, нь и ино нѣчто назнаменуеть къ симъ. Сие же являеть речение, глаголемо; и убо и одну и единицу трисъставнаго глаголемъ быти Бога и промышляти всѣми от провнихъ и даже до послѣднихъ земле, съдъръжеша всѣхъ неодръжимъ, сирѣчь не телеснымъ съдъръжеша, нь божьствнымъ промысломъ прѣсущьствнѣ. А яко есть же една и единица, понеже и Евагрие непреподобный въ второй сѣтници, въ главизнѣ третней, глаголетъ се: «Тѣ есть убо единица, понеже Божьство просто и нераздѣлно есть. Сего ради единица, и единица бо, числьническы рещи, проста и несложна есть. Една же сего ради, понеже и къ себѣ съединенна есть Светая Троица еществнѣ, и съединяеть всѣхъ иже Тою приближающихся, по реченномъ въ Благовѣствияхъ: „Да будутъ си едино, якоже и Мы едино есмы”».*

³⁸ «Неодръжимое объетие» глаголетъ изетий вакаго и несъвькупляемый къ съдъръжимымъ промысль Божи и съдъръжание.

ГЛАВА 8. О ГОСПОДСТВѢХЪ, И СИЛАХЪ, И ВЛАСТЕХЪ, И О СРѢДНЕМЪ, ИХЪ СВЕЩЕННОНАЧЕЛИИ

1. Прѣити же достоить ниня намъ на срѣднее небесныхъ умовъ удобрение,¹ господствя она прѣмирными очесы якоже мощно видециимъ и яже выистину силнаа видѣння божьствныхъ властей и силъ. И бо коеждо²

¹ На поле рядом:



² На поле сбоку: Яко именованье ихъ знаменаеть, что есть свойство ихъ.

иже паче насъ сущьствъ именованіе³ яже богоподрѣжательная ихъ изъясляеть боговидная свойства. Светиихъ бо убо господствъ изъясвительное именованіе мно являти непорабощаемое нѣко и всакого смѣреннаго умьненія свободное възвожденіе ниединимъ мучителскихъ⁴ отличьствъ ниединѣмъ образомъ отнудь прѣкланяемо, то свободнолѣпнѣ⁵ яко непреложно⁶ господство всакого охуждательнаго работворенія прѣвѣсходе, несъходно умьненію всакому и изето всакого отличьствія сущаго господства и господоначелія⁷ непрѣстанно желеае и къ того господствому начрътанію якоже мощно и себе же и яже по немъ боговиднѣ прѣтварае, къ ниединому суетному мнещиихсе, нѣ къ вѣистину Сущему отнудь обращенно и Господоначелнаго присно благовидѣнія въ причести по еже мощно тому бывше.

Светыихъ же силъ⁸ крѣпкое нѣко и непоколѣбательное мужьство въ всѣхъ яже въ томъ боговидныхъ дѣйствахъ, къ ниединому подьетию даемыхъ тому богоначелныхъ осіаний немощнѣ изнамагае, крѣпцѣ на богоподобное възводи-му, не недостатч'ствуеетъ своего немужьствомъ боговиднаго движения, нѣ неклонителнѣ зре въ прѣсущьствую и силотворную Силу и тое образъ силовиднѣ по

³ В конце главы: Яко именованіе ихъ назнаменуеть, что свойство ихъ.

⁴ На поле рядом: Мучителски насъ телесныя вещи, яко телеснѣхъ сущиихъ, къ телеснымъ привлечеть. Господствъ же ниедино отъ отличныхъ подобствъ можетъ ихъ прѣклонити.

⁵ Здѣ сьгрѣшеніе нѣко еллинскихъ любопрѣмудрѣць благочестивнѣ отсѣцаеть, иже особыныя три силы нѣкоторыя неумекчанныя нарекоше, произъшдѣшее въ бытіе отъ нѣкоторыхъ прѣждьныхъ ихъ трехъ силъ, не убо же отъ Бога свѣтомъ сьдѣянными особнѣ. И глаголють неумекчательныя [здесь зачеркнуто красными чернилами: и нераслабленнымъ] бытіе сие мьньше произведшиихъ та умныхъ силъ, скутавающе и якоже супротивеще и дрѣжательне прѣждьныхъ ихъ и себе еже не выпасти въ тину и немощнѣше по семь произведшиихъ та, по еже трѣбують дрѣжати себе нападаеміе. Сія убо яко выкратцѣ яже онѣхъ. Великий же Дионусіе прѣмудрѣ супротивнаа вса имъ глаголетъ, отъ Бога бо тѣмъ сьдѣтельски настати глаголетъ, Егоже и изображение имуть въ господствія, якоже и мы, и по подобію сьзданны бывше. Симъ же еже непрѣклонное въ всако сниженіе словомъ господства имѣти глаголетъ, сѣкуше и якоже рассѣдающе и не оставяюще дрѣжатисе къ чувствьнымъ похотѣніемъ, не убо же прѣждьныя скутавающе. Чувствна же и телеснаа работлѣпни глаголетъ и несвободни и суетную славу. «Работворенія» же вмѣсто «работлѣпнѣя», понеже не оставяють вѣистину сущая разумѣвати, нѣ сводеть отъ неклонителныя тврѣдости на суетныхъ подклоненіе. Отличіе же пакы наричетъ яже вещная, яко николиже прѣбываема въ томъждьствѣ, нѣ присно прѣлагаемаа.

⁶ На поле рядом: Знаменай, яко всака умна сила не умькчательнѣ и непрѣложнѣ къ худьшему имать.

⁷ На поле рядом: Господоначеліе глаголетъ Божество, яко всакого господства начело и вина есть.

⁸ На поле рядом: Светыхъ же силъ именованіе, еже есть свойство.

еже мощно бывше и къ той убо яко начелосилной силнѣ обращенно, къ вторим⁹ же силодателнѣ и боговиднѣ происходе.¹⁰

Светых же властей¹¹ еже въкупочинно божественныхъ господствъ и силъ, благоудобренное и нескврънное о божественныхъ подьетияхъ благочиние и еже въчиненное прѣмирные и умние власти¹² не мучителскы на хужьдшая властными силами приемлющу, нѣ неудръжателнѣ на божествна съ благочинствомъ възводиму же и яже по нем боговиднѣ възводещу, и къ властотворному¹³ начеловластияу якоже лѣпо уподобляющу и то, якоже мощно аггеломъ, въсиявающу, иже въ томъ благоудобреними чинми и властные силы.

Сия имѣе боговидная свойства, срѣднее небесныхъ умовъ удобрене¹⁴ очищается убо и просвѣщается и съвршеннодѣйствуете по имже речесе образъ от богоначелныхъ осияней, выдаваемыхъ ему въторѣ пръввымъ священноначелничскимъ удобрениемъ и срѣднимъ онѣмъ¹⁵ второявитилнѣ¹⁶ послаемыхъ.

2. Сего ради иже другимъ глаголемы приходити въ други аггель слухъ знамение да сътворимъ иже издалече бываему и прохождения ради утънчаваему¹⁷ въ второе съвршения.¹⁸ Якоже иже художный о свещенныхъ нашихъ службахъ¹⁹ глаголють,²⁰ яже самоявленная божественныхъ съвршения иже

⁹ *На поле рядом:* Знаменай, како въздѣ глаголетъ пръввышшимъ силамъ прѣподавати своихъ сущимъ по нихъ.

¹⁰ *В конце главы:* Знаменай, как въздѣ глаголетъ пръввышние силы прѣподавати своихъ сущимъ по нихъ и силы укрѣпляти мньше ихъ. Въмы же, яко и Даниила пишеть* аггель укрѣпляей, и иные, и всѣхъ же еже вещьше — и самого Господа нашего Исуса Христа, заеже и чловѣкъ, — якоже от Луку въ Благовѣствию лежить.*

¹¹ *На поле рядом:* Светых же власти именованіе мно являти еже въкупочинно и проча по редо.

¹² Къ горѣ лежещимъ и сия да съчиняются, от онуду бо еже «мно, являти власти именованіе».

¹³ Яко власти елико тѣмъ праведно, яко аггеломъ сущимъ, умние силы сущимъ по нихъ прѣподають.

¹⁴ Како и чимъ очищаются и просвѣщаются и съвршеннодѣйствуютъ срѣдныи чинове, и яко иматъ Писаніе, яко иный аггель иному прѣпосилають божественная знаменія.*

¹⁵ *На поле рядом:* Средним онѣмъ, сирѣчь пръввымъ от Бога чиномъ, еже посрѣдѣ Бога и чина иже есть по првомъ чину.

¹⁶ Яко срѣдними съвршения тнччайшая иже пръвосвѣтнѣ от Бога дѣйствуемыхъ, иже пръвви суть от Бога, срѣдни же къ иже по нихъ чиномъ.

¹⁷ *На поле рядом:* «Утънчаваему» глаголетъ не от своего ему ослабления, нѣ от умьнення приемлющихъ. Се бо казуеть еже рещи «второе съвршения», — сирѣчь еже тнччае съвршати вторая.

¹⁸ *В конце главы:* «Утънчаваему» рече не от своего ему ослабления, нѣ от умьнення приемлемыхъ. Се бо являеть еже рещи «второе съвршения», — сирѣчь еже тнччае съвршатисе вторимъ противъ мѣрѣ своей.

¹⁹ По еже въ Захарии,* и Даниилѣ,* и Иезекиилѣ* пророцѣхъ лежещемъ.

²⁰ Знаменай, яко свещенне сия прѣдаше великому Дионусию. «Самоявленная» же нарече пръввие божественные силы, понеже от себе божественная приемлють осиянія. Прочие бо силы не собою божественные приемлють дары разума, нѣ прѣвъзвѣдшимъ.

инѣми боговидныхъ причестий быти съвършенейшая, сице мно и аггельскихъ чиновъ непосредственное причестие иже пръвѣ о Бозѣ выспръprostituиаемыхъ явленѣйше быти иже посрѣдствомъ съвършаемыхъ. Тѣмже и от священничкаго нашего прѣдания²¹ съвършителние и свѣтодѣйствѣние и очистителние силы прѣвы умове именуется мнѣшим, яко тѣхъ ради на всѣхъ прѣсуществоное начело въводимомъ и службоначелничскихъ очищений и просвѣщений и съвършений въ причестии по еже тѣмъ льза бываемомъ.²² Се бо есть отнудъ Божьственнымъ Чиноначелиемъ богоподобнѣмъ възаконенно — еже прѣвыхъ ради вторая богоначелныхъ причестовати осияний. Обрѣщещи же се и многаши богословци изъявленно. Егда бо божественное и Отче чловѣколюбие Израиля възвратителнѣ о священномъ его спасени наказавъ и томителемъ и свережимъ языкомъ въ исправление издавъ, отнуднимъ промыляемыхъ на лучшее прѣведениемъ и от заплѣнения пушаетъ, и къ прѣвому чловѣколюбнѣмъ възращаше благострада нию, зрѣть богословць единыхъ, Захариа, единого прѣвыхъ, яко мно, и при Бозѣ аггель (обще²³ бо, якоже рѣхъ, есть по сѣмъ еже аггельскаго именования) от Самого Бога навикшаго еже о семь «Утѣшителная», якоже рече, «словесесе»,* другаго же мнѣшихъ аггель къ усретению прѣваго прѣдидушаго, яко къ осияния подьетию и приобщению, таже от того божественнѣмъ свѣтъ яко от священноначелника навикшаго и еже научити богослова повелѣваемаго, яко «Зѣло велми населитсе Иерусалимъ от множества люди».* Другой же богословца Иезекиила²⁴ и от самого глаголетсе всесвещеннѣ навикнути херувимъ прѣвышшаго прѣславнаго Божества. Израиля бо, якоже речесе, Отче чловѣколюбие наказания ради на большее прѣводе правдою боголѣпною от повинныхъ разлучити неповинные оправди. Сие же навичаетъ прѣвы по херувимѣхъ, иже о чрѣслѣхъ самфиромъ прѣпоясьнѣ,* иже одеждею,²⁵ даже до ногъ сходещею, по знаменію архиерейскомъ одеянь. Прочимъ же аггеломъ, иже сечива имущимъ,

²¹ Знаменай, яко священничское прѣдание есть еже о чиновъ умовъ вѣдѣти.

²² *На нижнемъ поле:* Указъ реченному, яко вторая от прѣвыхъ научаваются — от Захарии пророка.

²³ *Передъ началомъ слова — значокъ (две киноарные точки), и на поле у такого же знака киноарью написано:* посрѣдѣ.

²⁴ Добрѣ рече Господь в пророцѣ Иезекиилѣ, яко: «Разлучите от праведныхъ грѣшныя»,* — се бо и въ Благовѣствіяхъ является сътворь, егда овце от козлищъ раздѣли.* Се съглашаетъ и въ семь Ветхийъ Заветъ Новому.

²⁵ Знаменай, яко аггелу убо се знамение наложити повелѣнну «подиру, рекше одежду, даже до ногу съходещую», и поясъ о чрѣслѣхъ, — образъ подобнь священнику. Аггеломъ же, секири въ рукахъ имущимъ, иже сказуетъ томителную нѣку силу. Яко от сего разумѣвати намъ къ хотещому съвършити дѣлу и иже аггель видъ въображаетсе, еже разумѣти дльжни есмь и о серафимѣхъ и херувимѣхъ и иныхъ силахъ, яко прѣма своему чину и изъображение имуть. Еже бо Трисветую пѣснь глаголющей многоличннии изъображаются,* сказающе Слово, яко неумльзаемо есть и много тѣхъ пѣтиє. Сице и о прочинихъ разумѣи.

божественное чиновачелие повелѣваетъ²⁶ от прьваго навикнути еже о семь богосудство. Овому бо убо рече посрѣдѣ проити Иерусалима и дати знаменія на челѣхъ²⁷ неповиннымъ мужемъ, аггеломъ же:²⁸ «Идете въ градъ въслѣдъ того и сѣцѣте, и не пошедите очима вашима», «къ всѣмъ же, на нихже есть знамение, не приближитесе».

Что убо нѣкто речеть о рекшомъ аггелѣ Даниилу: «Изиде слово?»* Или о прьвомъ томъ, огонь от срѣди херувимъ приемшемъ?* Или еже сего излишное въ благочинное аггельское указание, яко херувимъ влагаеть огонь въ руки въ светую одежду облѣченнаго? Или о възвавшемъ божьствѣнѣйшаго Гавриила²⁹ и рекшимъ ему: «Скажи оному видѣнне?»* Или еликаа друга от священныхъ богословць реченнаа быше о иже небесныхъ священноначельствѣ боговидномъ удобрени,³⁰ къ немуже еже у насъ священноначелия благочиние по силѣ уподобляемо аггельское благолѣпие яко въ образѣхъ имать, въображаемо тѣмъ и възводимо къ прѣсущьствьному всакого священноначелия Чиновачелию?

²⁶ Киноварю на верхнемъ полѣ: О благочинии вторихъ къ горнѣйшимъ.

²⁷ Знаменай, яко божественное изображение от оногo провъзвѣстисе еже вѣрнымъ на челѣ животворному наложитисе знамению и снабдѣтисе от губителя. Нь тогда убо аггелы въ образѣ священникъ се творити повелѣнны быше неповиннымъ, — поясъ бо и одежда до ногъ сходещи священнолѣпны священникъ являеть образъ, — ниня же и мы себѣ, вѣрныхъ, крестное знамение на челѣ изображающе, убѣгуемъ врага. Се и друго уподобление Ветхаго къ Новому.

²⁸ Знаменай, яко си суть троичсци чины умьныхъ силъ. Прьваа троица: прѣстола, таже херувимъ, потомъ серафимъ. Втора троица: господствія, силы, власти; сия и срѣдняя глаголютсе. Третья троица: начела, архангелы, аггелы. Общѣ же именовъ вси аггелы.

²⁹ Знаменай, яко и Гаврииль нѣсть горнѣйшихъ силъ, нь мыншихъ.

³⁰ Знаменай, яко подражание горняго таинствьнаго священноначелия яже въ Церкви бываемаа дньс. И бо священники знамение налагають животворещаго креста приходящимъ къ таинству за еже раздѣлити тѣхъ от невѣрныхъ и да врага убѣжетъ. Инако же и чинъ съхраняетсе въ светѣй Церкви: еже бо творити повелѣсе уподиакону не творити иже суть мынши; и еже творитъ священникъ не творитъ диаконъ; и, просто реши, къждо имать подобную ему службу. Общѣмъ же именовъ все причѣтници и службьници наричутсе, якоже и аггелы. Здѣ подобаеть разумѣти, како речесе божьствимъ Стефаномъ: «Иже приесте законъ въ чинохъ аггельскихъ и не съхранисте».*

ГЛАВА 9. О НАЧАЛѢХЪ, И АРХАГГЕЛѢХЪ, И АГГЕЛѢХЪ, И О ПОСЛѢДЪНИМЪ, ИХЪ СВЕЩЕННОНАЧЕЛИ

1. Оставше есть намъ въ видѣнне священно удобрени еже аггельскаа затворае священноначелиа еже от боговидныхъ начель, и архаггелъ, и аггель удобраемо. И прьвая убо реши нужно мню, по еже мнѣ мощно, светыхъ ихъ

именований изъясления. Изъявляет бо еже убо небесныхъ нечель именованіе еже боговиднѣ начелничское и владычствное съ чиномъ священнымъ и начелничскими подобия силами, и еже къ прѣначелному Начелу и самѣхъ свѣсма привращати, и другыя начелничскы водити, и еже къ самому оному яко мощно въобразатисе наелотворьному Начелу являти же прѣсущ'ствное Того чиноначелие¹ начелничскихъ благоудобрениемъ силъ.

2. Светиих же архаггель² единочинно убо есть небеснымъ начеломъ.³ Есть бо тѣхъ же и аггель, якоже рѣхъ, священноначелие едино и удобрение.⁴ Обаче понеже нѣсть священноначелие не и пръвые и срѣднее и послѣднее силы имѣе, иже архаггель светы чинь общителнѣ священноначелничскою срѣдою краевъ касается. Светѣйшимъ бо начеломъ приобщаетсе и светымъ аггеломъ,⁵ — овѣмъ убо, яко къ прѣсущ'ствьному Начелу начелничскы обращаетсе и къ тому яко мощно въобразаетсе, и аггеле съединеннотворить по благоудобрительныхъ его и въчиненныхъ и невидимыхъ владычствияхъ,⁶ овѣмъ же, яко и пророчьскаго чина, богоначелничская осияния священноначелнѣ пръвыми силами подъемле, и аггеломъ сия благовиднѣ възвѣщае, и аггелыми намъ являе, по священной коегождо иже божествнѣ осияваемыхъ мѣрѣ. Аггелы⁷ бо, якоже прѣдѣ рѣхом, накончателнѣ съвршають вса небесныхъ умовъ удобрения, по послѣднемъ яко въ небесныхъ суц'ствахъ⁸ имуще аггельское свойство и паче от насъ изъяснителни прѣждныхъ аггелы свойствнѣйше именуемы елико и о явленнѣйшемъ имъ есть священноначелие и паче къ миру близъ.⁹ Пръвое бо убо прѣвысочайшее, якоже речесе, удобрение, яко Съкръвенному пръвовъчинителнѣ приближаесе, скръвенвиднѣ достоить разумѣти священноначелствовати второму, второ же, еже съвршааетсе от светыхъ господствъ, и силь, и властей, начелом и архаггелом и аггелом священноначелию

¹ Самого же начелотворнаго Начела изъясляетъ прѣсущ'ствное чиноначелие съ начель чинь.

² О архаггельской добротѣ и что являеть.

³ Светыхъ же архаггель именованіе единочинно убо есть.

⁴ Знаменай еже съборное, яко всако священноначелие имать пръвые и срѣдние, и послѣдние силы, сирѣчь трѣ троичьски чины.

⁵ Како божественны архаггелы сущимъ прѣжде тѣхъ и иже по тѣхъ причествуютъ.

⁶ Слова «по благоудобрительныхъ... владычствияхъ» были сначала пропущены писцом, а потомъ приписаны на поле столь же крупно, какъ основной текстъ.

⁷ Яко послѣдны чинь аггель и прѣудобреньнъ.

⁸ Яко послѣдны чинь небесныхъ силъ паче достойны есть аггелы нарицатисе, яко приближаесе чловѣкомъ, имже и яже божьствная навицають чловѣци.

Послѣдни тройчески чинь
 —————
 начела архаггелы аггелы

⁹ Яко прва троица въторой священноначельникъ есть, и втора третьей, третья же иже в чловѣцѣхъ священникомъ.

наставникъ есть, къ прьвому убо священноначелию изьявленнѣйше,¹⁰ а еже по немъ скрвенѣйше; начель же, и архаггелъ, и аггелъ изьявительное удобрение, еже в чловѣцѣхъ священноначелиямъ другъ другомъ наставникъ быти,¹¹ да будетъ по чину еже къ Богу възвождение, и обращение, и приобщение, и съединение, и убо и от Бога вѣмъ священноначелиямъ благолѣпнѣ выдаемое и общѣ приходимо съ благоудобрениемъ священнѣйшимъ прошьствие. Сего ради богословие еже у насъ священноначелие аггелъми въдало есть¹² кнеза иудейскымъ людемъ, Михаила именуе,* и аггелы езыкь другихь. «Положи» бо Вышни «прѣдѣлы езыкомъ по числу аггелъ Божиихъ».*

3. Аще ли кто глаголетъ: и како иже еврейски люде възвождахусе сами на богоначелная сияния? — достоить отвѣцати, яко не яже аггелъ правая приставления виновствовати подобаетъ еже иныхъ езыкь на не суще боги заблуждения, нь самѣхъ онѣхъ, своими устрьмленими от еже на божьственное праваго възведения отпадшихъ¹³ самолюбиемъ и гръдиною и иже тѣмъ мнещиихъсе богоподобьствъ достойною чьстною.¹⁴ Се свѣдѣтелствуютсе и сами еврейски люде пострадати.¹⁵ «Разумъ бо Божий, — рече, — отринуть еси и вслѣдъ сердца твоего ходилъ еси».* Ни бо понужденну имама жизнь, ни же ради промышляемыхъ самовластия божественны свѣти промышлятелнаго сияния изнаемають.¹⁶ Нь еже умныхъ очесь прѣвращение прѣисплъненные отчьские благости свѣтодание или отнудь непричестно творить и къ тѣхъ ожесточаянню непрѣподатно,¹⁷ или причестия творить различна, мала или

¹⁰ Како ова убо скрвеннѣйшаа, ова же явленнѣйша священноначелия.

¹¹ Знаменай указъ от Даниила, сирѣчь послѣднѣи чинъ наставникъ быти иже у насъ священноначелия.

¹² Како аггеломъ благимъ пристоещимъ езыкомъ, едины Израиль въдѣше Бога. Коиждо бо езыкь аггела иматъ, удостоенна ему, якоже иудее Михаила,* егоже и от послѣдняго чина светыхъ аггелъ глаголетъ.

¹³ Не от приставленьныхъ аггелъ вына бываетъ, рече, нь от своего къ неподобнымъ устремления.

¹⁴ Знаменай, яко кждо себѣ виновнѣи и блага и зла.

¹⁵ Не яко Богъ Израила избралъ есть единого, нь яко Израиль единъ восхотѣ послѣдовати Богови. Сице бо и сказание рѣчи назнаменуеть «Умъ, зрей Бога».* Тако разумѣти длъжни есмы яже въ пѣсни Моусеовѣ реченна: «Бысть честь Господня уже дѣло мѣрно Иаковъ»,* — еже являетъ Израила. Не Богъ бо Израила тѣкмо любяше, якоже и апостоль многаши яви, рекъ: «Еда нѣсть Богъ и езыкь? Ей, и езыкь, понеже единъ Богъ».* Нь Израиль пръвѣе иде вслѣдъ Бога, понеже послѣди отступивъ и тѣ отгнасе. Самовластное бо имуще чловѣци, егда хотеть твореть Бога съ собою.

¹⁶ Еже здѣ глаголетъ свѣтый отецъ Дионусие, се и при слънечномъ свѣту бываемое видѣти, при свѣтлѣхъ убо вещей свое прѣподание творещу, при дебелейшихъ же не подобнѣ, нь или свѣса непрѣподатнѣ, или тнѣцъ. Еже убо здѣ вешное разньство творить, се при божьственнѣмъ осияни неравньство самовластнаго съдѣлуеть устрьмления.

¹⁷ Зри, како глаголетъ насъ самѣхъ виновнѣхъ быти еже приети осияние божьственное, или мало или много того приети, или отнудь ничтоже того приети, егда къ тому ожесточанны будемъ и окаменны. Рече убо въ Еуаглияхъ Самъ Господь: «Можеть Богъ от камня сего въздвигнути чеда Аврааму».* Еже бо намъ жестоко и немощно, се Богови мощно.

велика, тънка или свѣтла, единие и простие, и присно такожде имущие, и прострътие источничские луче.¹⁸ Понеже якоже и иныимъ языкомъ (отъ нихже и мы възникнухомъ, на яже всѣмъ готовѣ въ прѣподание¹⁹ прострътую богоначелнаго свѣта безмѣрную же и обилную пучину),²⁰ не чуждии нѣции наставници бѣху бозы, едино же всѣхъ Начело и къ тому възвождаху послѣдующихъ коегождо языка священноначелствующей аггелы, Мелхиседека достоить разумѣти священноначелника суща боголюбезнивѣйшаго не иже не сушихъ, нь вѣистину сущаго вышняго Бога. И бо не простѣ Мелхиседека богомудрый не боголюбезнаго тъкмо, нь и священника нарекоше,* яко да умъ имущимъ явѣ покажутъ, яко не тъкмо самъ къ вѣистину существу Богу възвождашесе,²¹ късему же и иные яко священноначелникъ наставляше на истинно и единно богоначелие възвождения.

4. И сие же твоему священноначелничскому разуму да въспоминаемъ, яко и фараону*²² отъ иже егуптеномъ наставника аггела, и вавулонскому кнезу* отъ своего, еже всѣхъ Промысла и Господства попечителное и властное въ видѣннихъ възвѣщашесе; и языкомъ онѣмъ иже вѣистину Бога угодници наставници бѣху,²³ въображенныхъ аггельскихъ видѣннй изьявления иже аггель близъ священнымъ мужемъ, Даниилу* и Иосифу,* отъ Бога аггельми открьвеннаго. Едино бо есть всѣхъ Начело и Промысль,²⁴ и николи же достоить

¹⁸ Знаменай паче здѣ обушати неподобное нѣкихъ и нерасудное ненаказание, еже смѣють глаголати божьствная сия съписания Аполиinarieва* бысть, ни же отъ лицъ, ихже въспоминаеть помышляюще древнее мужа, нь лъжное надписание глаголюще еже Дионусиа име, ни же яко ниня отъ идолослужения рече себе възвратитесе, а паче Аполиinarie не отъ таковыхъ бѣ.

¹⁹ Яко Богъ, естествомъ сы благъ, готова Себе подаетъ всѣмъ въ еже причеститесе светые Его и просвѣтити душу. Проче еже отъ насъ ищете, еже како пожелѣемъ причеститесе разума Его, да покажетесе самовластное. Не бо виновнь злыхъ Богъ, еже есть отъ Того разлучение.

²⁰ Събрание сие сице: «понеже яко и языкъ иныхъ не чужди нѣции наставници бѣху бозы, едино же всѣхъ Начело». И тако друга посрѣдѣ да рекутесе. Да отколе есть едино Начело, къ Тому възвождаху аггелы языки, имже кождо приставленъ бѣше.

²¹ Знаменай яже о Мелхидеку, (!) яко священноначелнику вѣистину и аггельскимъ наставлениемъ иже вѣистину сущаго Бога познавша. «Послѣдующихъ» же рече самоизвольнаго ради и непонужденнаго.

²² Знаменай, яко аггельми, глаголетъ, яже въ снѣхъ быти видѣннимъ фараону и Навуходоносору, и яже сихъ явленія, рекыше сказанія.

²³ Иосифъ убо егуптеномъ, Даниилъ же вавулоняномъ наставникъ бѣше (слова «наставникъ бѣше» *приписаны писцомъ на поле*), аггеломъ же наставникомъ языкъ сихъ, свѣтъ Божи открывающимъ имъ и видѣннй.

²⁴ Знаменай реченія Моусейскихъ пѣсни: «Егда раздѣляше Вышни языки, ихже расшѣя сыны Адамовы, постави прѣдѣлы языкомъ по числу аггель Божиихъ. И бысть честь Господня люде Его Иаковъ, уже достояннй Его, Израиль».* Не бо подобаетъ, рече, мнѣти раздѣлити въ иные боги или аггелы языки, не бо удостоятелнѣ случисъ Богови Израиль убо, инымъ же аггеломъ особнѣ, яко не служити имъ въ иномъ чесомъ Богови. Якоже, принеси да речемъ, овзы языкъ овому зи (*так!*) аггелу отлучисе и удостоисе быти, и нѣсть что Богови о языку его брѣжение, или не служить и упражняется въ иномъ чесомъ къ Богу

непщевати иудеи убо достоителнѣ наставнику быти Богоначелию, аггелом же особнѣ — или въкупочстнѣ, или богопротивнѣ — или богомъ нѣкоторимъ наставникомъ быти инымъ языкомъ. Нѣ и слово оно* по сей священнѣй мысли достойное разумѣти не яко раздѣлившу Богу съ иными боги или аггелы еже о насъ владычество и Израиль языконачелникъ и языководникъ быти удостоившусе, нѣ яко тому убо единому всѣхъ Вышняго Промыслу все чловѣкы спасителскы иже своихъ аггелъ горѣпростираетелными руковожденми раздѣлившу, единому же потомъ отъ всѣхъ Израилю на еже сущаго Господа свѣтодание и разумѣние обращшусе. Тѣмъже богословие еже убо себе удостоити Израилю въ сущаго Бога угождение изъявляе, еже «Бысть честь Господня»²⁵ рече. Показуе же еже и тому въ равнствѣ прочинихъ языкъ датисе нѣкоему светихъ аггелъ въ еже тѣмъ единое всѣхъ Начело разумѣти, Михаила²⁶ рече иудейскыи водити люди, явѣ научае еже единъ быти всѣхъ Промыслъ, всѣхъ невидимыхъ и видимыхъ силъ прѣсущствнѣ прѣвьше сѣдещъ, всѣмъ же иже коегождо языка приставленнымъ аггеломъ на тѣ, яко на свое начело, послѣдующихъ волею²⁷ елико по силѣ горѣвъзводещимъ.

иже языка аггелъ. Нѣ ни же въкупочстнѣ или богопротивнѣ приеть Богъ съ языкъ и къждо отъ аггелъ свой языкъ, якоже въ Исайи реченно бысть, яко диаволь яже къ сѣвѣру гори, сирѣчь, языки, рече въ себѣ имѣти и противитисе Богови и быти подобнѣ Вышнему.*
 Вся бо работна Богу, и всѣхъ Тѣ Самъ начелствуетъ, нѣ вѣдущихъ Того прѣдпочитаеъ. И сего ради и Тѣ глаголетсе тѣми начелствовати, нѣгли аще имуть и аггела приставленнаго, якоже Израиль Михаила. И како всѣхъ начелствуете Богъ наипаче Израилевъ глаголетсе Богъ и Израиль Тоговъ? Глаголемъ, яко Богъ всѣхъ есть Богъ, приближающихъ же се Тому и Тому единому поклоняющихся глаголетсе праведнѣ ихъ Богъ. Прочи бо, идолы почитающе, иныи твореть себѣ боги.

²⁵ Добрѣ сказуеъ еже: «Бысть честь Господня Израиль, удостоенна Ему». Подобаше убо, понеже Израиль единъ увѣдѣ Бога, тому единому отъ Господа посѣщатисе и отъ аггелъ Его. Нѣ и въ семь показуеъ безъмѣрная и неислѣдованная милость Божия, яко и мнещимсе не быти чести Его особна аггела приставилъ есть хранителя языка. «Всияваетъ бо солнце Свое на праведние и неправеднии».* И пакы: «Иже не хотей смерти грѣшнику, яко възвратитисе и живу быти ему».* Нѣ речеши: Како имущей аггеле, отъ Бога данныи въ еже наставляти и водити тѣхъ, отступише отъ Бога живаго и поклонилсѣя идоломъ? — Глаголемъ, яко всака нужда отъ иже въ Бога зрещихъ отгнасе и вмѣстовъведесе еже самоизвольное. Аще кто изволить съ Богомъ быти и хранитисе отъ аггела, и въчиняетсе под нимъ. «Господь бо, — рече, — съвьсть путь праведнихъ».* И пакы: «Юнь бѣхъ и бо състарѣхъсе, и не видѣхъ праведника оставленна».* Аще ли же кто супротивное изволить, не понуждаеъ отъ аггела се творить. Сие бо житие и скотовидно паче [недостаеъ перевода словъ: καὶ οὐκ ἀποτροαίρετος — для нихъ оставлено место]. Того ради и о Израилѣ рече, егда сьгрѣши и телца сьтвори: «Разумъ бо Божи отринувъ еси и въслѣдъ сердца своего ходилъ еси»,* — сирѣчь свое хотѣние прѣдпочль еси.

²⁶ Яко и Израиль и честь Господня бысть, нѣ убо и тии особна своего имаху аггела Михаила.

²⁷ Сие рече самовластнаго ради и непонужденнаго.

ГЛАВА 10. ПОВЬСПРИЕТИЕ И СЪБРАНИЕ АГГЕЛЬСКАГО БЛАГОЧИНИЯ

1. Събрасе убо нами, яко еже убо старейше иже о Бозѣ умовь одобрение от Службоначелничьскаго¹ осияния священноначелствуемо въ еже на то непосредствѣнѣ воспостирати скръвеннѣйшимъ и явленнѣйшимъ Богоначелія свѣтоданиемъ² очищается и просвѣщается и съвршеннодѣйствуете. Скръвеннѣйшимъ убо яко умнѣйшим и паче простѣйшимъ и сѣдинотворнѣмъ, явленнѣйшимъ же яко пръводатнымъ и пръвоявленнымъ и съборнѣйшимъ и паче въ то яко въ чисто изливаемо, от того же паки по мѣрѣ второ, и от втораго третие, и от третяго еже у насъ священноначеліе по самомъ томъ благоудобренаго чиноначелія уставѣ въ съчланени божествнѣмъ и мѣрѣ къ всакого благоудобрения прѣначелному Начелу и Концу, священноначелнѣ възводитсе.

2. Изъявителіе же вси суть³ и вѣстници прѣжднихъ тѣмъ: старѣйши⁴ убо Бога движущаго, по мѣрѣ же прочи, иже от Бога движемыхъ. Толико бо еже всѣхъ прѣсущствное съчланение коегождо словесныхъ же и умныхъ священнаго благоудобрения и вчиненнаго възвождения промысли, яко и самому священноначелствѣ коемуждо чинѣ священнолѣпны положи. И всако священноначеліе зримъ въ пръвые, и срѣдние, и послѣдние силы раздѣленно, нь и само то коегождо особнѣ рещи одобрение тѣми божественными съчланенми раздѣли. Тѣмъ же и самыи божествнѣйшее серафимъ богословци глаголють⁵

¹ «Службоначелничьскаго», — рекше, Наставления и Вины тѣхъ съвршения.

² Знаменай, яко здѣ явѣ сказуеть, кое ради вини чинове небесныхъ силъ сиче суть, рекше: овъ убо пръввысочай бысть, овъ же срѣдны, овъ же послѣдны. Глаголетъ бо о горнѣмъ чину, иже есть прѣстоы, серафимъ и херувимъ, яко от самого божествнаго разума осияваюте, заеже непосредствѣнѣ на тѣ простиратисе и не имѣти еже прѣдвараемо. Сиче от Службоначелія самого божествнаго очищается, и просвѣщается, и съвршается. Аще бо би тако създанъ былъ, яко пръввы быти, ни же чищения, ни же просвѣщения трѣбовалъ би, тако създанъ бывъ, яко и достоинъ бысть пръваго чина. Инако же, зри, что глаголетъ по малѣ божествны сѣ мужь, яко «скръвеннѣйшимъ паче свѣтоданиемъ» просвѣщаются пръввы чины, зане умнѣйши и Богу приближнѣйши паче иныхъ, скръвеннѣйшаго сподобляющесе сияния, и ти скръвеннѣйши суть и къ Богу паче иныхъ простирателны. И от сего бо есть разумѣти веще самоизвольное ихъ. Аще бо не веще отъ мнѣшнихъ себе простирали би и умни бывали, не бы убо приближали се Богови [на поле добавка: веще]. Приблизивше же се Тому волею, болше очищаются, и просвѣщаются, и съвршаются, сирѣчь «дѣйствуютъ съвршенная», рекше яже о Бозѣ. И сие мню Писанию гадаюшу: «Приступите къ Нему и просвѣтитесе, и лица ваша не постыдѣтсе». * Сиче и о прочныхъ силахъ разумѣй, яко конждо по своей мѣрѣ зреть Бога. Сие и явленнѣйше глаголетъ на конце главы сие.

³ Яко вси аггелы яже от прѣжднихъ себе въ тѣхъ носиме свѣте къ мнѣшнымъ изъявляютъ. Обще же о всѣхъ есть еже «изъявителіе» речесе. «От Бога же подвиженныхъ» рече о пръвомъ серафимѣ чиноначеліи. (Здѣсь же киноарный маргиналий: «Вѣстници» рекше аггелы).

⁴ Старѣйши Бога изъявителне суть, а срѣдни — пръвыхъ, а послѣдни — срѣднихъ.

⁵ Чесо ради о серафимѣхъ божествное пѣтиє рече възивати другъ къ другу? — Заеже пръввымъ възвѣщати къ вторымъ божествная таинства.

другы къ другу възивати,* явъ въ семь, якоже мню, сказающе, яко богословьныхъ разумений прьвы вторимъ прѣподають.

3. Да приложим же убо и се не нелѣпотнѣ,⁶ яко и въ себѣ коиждо небесный же и чловѣчскый умъ свое имать и прьвие и срѣдние и послѣдние⁷ чины же и силы къ реченнымъ коегождо свещенноначелниихъ осияний своимъ възвожденіямъ по мѣрѣ изьявляемые по ихъже къждо въ причестии бывають по еже тому подобно же и мощно прѣчистаго очищения, прѣисплненнаго свѣта, прѣдъсвьршеннаго свьршения. Есть бо ничтоже самосвьршенно или нетрѣбователно повсемъ свьршения, развъ еже въистину самосвьршенно и прѣдъсвьршенно.

⁶ От простѣйшихъ бо учений, еже мѣла напоение нарече апостоль,* къ срѣднимъ, и от сихъ къ болшимъ, рекше свьршенныхъ пищъ, восходе, послѣдни являють чинъ и силу. Есть же и инако яже по мѣсту разумѣти, и прьво убо реши еже къ прѣвсходимому выспрьрострѣти, срѣдне же — еже въ себѣ съобращание, послѣдне же — еже мыншее възводе, еже и паче при аггелѣхъ достоить разумѣти.

⁷ Знаменай, яко коегождо нас умъ прьве, и срѣдне, и послѣдне чинове имать въ еже разумѣвати о Бозѣ. Три чины сие достоить разумѣти сие, яко всаки умъ имать существо, по немже прьво есть; таже и силу, по нейже крѣпцѣ удовляемъ есть; кончнее же дѣйство, по имже, своя дѣе, благочествуеть. Сия и въ прочей главизнѣ сказуеть. Тѣмже отсуду явъ и несупротивьрчнѣ есть приети, яко истиннѣ прѣдъ малѣмъ писахомъ. Се бо како рече: «Коиждо небесны и чловѣчскы умъ прьваа, и срѣдня, и послѣдня имать възвождения, по ихъже къждо въ причести бывають божественныхъ и свещенноначелническихъ осияний». Прьвѣй убо — яко равнѣ чинъ рече чловѣкъ и горныхъ силъ; и ниединаго от чловѣкъ вѣмы — ни же пророка, ни же правѣдника, — не потрѣбовавшаго особнии вины въ еже приближитисе Богови. Зри, что бо глаголетъ иже до третияго небеса dospѣви, яко: «Удручаю тѣло и порабошаю, еда како, инымъ проповѣдавъ, самъ неискусънъ буду».* Таже явленнѣ здѣ глаголетъ самовластное и аггелъ, и еже своего имъ устрьмления желание. Да же никтоже и от зѣло любопольливихъ любовьспритсе, изьявително рече, яко ничтоже нетрѣбователно и самосвьршенно, сирѣчь от себе свьршенно, развъ единъ Богъ. Тѣмже чловѣци и аггелы прѣдспѣния и свьршения трѣбують.

ГЛАВА 11. ПОЧТО ВСЕ НЕБЕСНЫЕ СИЛЫ И СУЩЕСТВА ОБЩѢ СИЛЫ НЕБЕСНЫЕ ГЛАГОЛЮТСЯ

1. Сим же опрѣдѣленномъ, оно достойно есть разумѣти, кое ради выни вса въкупѣ аггелъская существа силы небесныя нарицати обыкохомъ. Не бо есть реши, якоже при аггелѣхъ,¹ яко всѣхъ есть послѣднее удобрение светихъ силъ и убо послѣднихъ светолѣпныхъ осиянію яже надълежещиихъ

¹ «Не бо есть реши, якоже при аггелѣхъ», — силы бо вторие и срѣдние суть троице, по господствѣхъ въчиняеме. Тѣмже не яко послѣднимъ тѣмъ сущимъ, вси чины нарекошесе силы, якоже при аггелѣхъ.

сущствъ удобрення причествують, послѣдняя же пръввыхъ николиже, и сего ради небесныи убо силы вси божественныи умове именуется, серафимы же, и прѣстола, и господствія никакоже, непричестни² бо послѣдни прѣвысокихъ суть съборныхъ свойствъ. Ангелы бо, и прѣжде аггель архагелы,³ и начела, и власти, по силахъ от богословія вчиняемыи, обще многаши от нас вкупѣ иныимъ светыимъ сущствамъ небесныи силы наричутсе.⁴

2. Глаголем же, яко общѣ при всѣхъ приемше небесныхъ силъ именованиемъ не сълитие нѣко коегождо удобрення свойствомъ ввыводимъ, нь понеже въ три раздѣлишесе⁵ еже о тѣхъ прѣмирнымъ словомъ вси божественныи умове: въ сущство, и силу, и дѣйство, — егда же вса, или нѣкотора тѣхъ неназирателнѣ⁶ небесная сущства⁷ или небесныи силы наричемъ,⁸ сие — въторорѣчнѣ⁹ о нихже есть слово изъявляти насъ — достоить непщевати¹⁰ от коегождо ихъ сущства или силы. Ни бо надълежимо свойство иже добрѣ нами раздѣленныхъ светыхъ силъ и мнъшиимъ свѣсма съвкупляти сущствомъ — въ разорение несълитнаго аггельскихъ удобрення чиноначелія. По многащномъ бо нами правѣ отданнѣмъ словѣ прѣвъзъшъдая убо удобрення излишнѣ имуть и яже мнъшиихъ священнаи свойства, послѣдня же,¹¹ яже старѣйшихъ

² Яко яже послѣднихъ имуть надълежешии, а яже прѣвсходешихъ не имуть послѣдныи. Сиче и выше речесе, — понеже пръвы убо съборнѣ имуть осияние, послѣдни же отчести, якоже проца глаголетъ. Сиче и въ Церкви есть обрѣсти: священникъ бо можетъ творити вса яже мнъшиихъ, рекше диаконѣ и прочиихъ, диакону же яже священникъ нѣсть повелѣно творити. Ако убо еже у насъ священноначеліе подражаетъ небесный чинъ, рѣхомъ выше. *(К этому месту с помощью значка сделана сноска на нижнем поле: От «не бо есть рещи» сопротивление есть даже до «съборныхъ свойствъ», и оттуду начети недоумѣние до еже начети светому рѣшение, идѣже рече «глаголемъ же»).*

³ Послѣдни бо чинъ начель, и архагелъ, и аггель есть, и обаче и ти силы суть, егда именуется.

⁴ Какъ глаголютсе силы.

⁵ Знаменай, како убо глаголетъ, яко въ три раздѣляются аггельсци чины: въ сущство, и силу, и дѣйство. И от сего глаголютсе общѣ «силы небесныи». Аще бо ихъ кто и сущство и дѣйство речеть, не сьгрѣшитъ, суть бо сущство и дѣйство. Нь обаче вси чины и умове по семъ «силы небесныи» наричутсе.

⁶ «Неназирателнѣ» — рекше простѣ и невънимателнѣ.

⁷ Яко въ приказни да речетсе сущство убо рещи огня естество, силу же того просвѣщателное, дѣйство же еже и силы закончаніе, рекше просвѣщателно и жегущее.

⁸ Въкупоименно есть име «силы»: глаголетъ бо се сиче и особны чинъ, сирѣчь второе срѣдняго троичьскаго удобрення, и обще вси чины, яко силу имуше нѣку.

⁹ «Второрѣчнѣ» — рекше второю рѣчию, поеже вси силы глаголютсе.

¹⁰ «Достоить непщевати» извънь да разумѣтсе.

¹¹ Мнитсе нѣкакъ здѣ глаголати, яко по достоянію аггельскаго удобрення съдѣтелскыи вчиненна быше, не явъ же се прѣдставляеть. Горѣ бо, въ пръвой сее главизнѣ, явленнѣ еже тѣхъ желаніе и разумѣние глаголетъ вини тѣхъ прѣвысокаго ихъ чина. Сего ради яко и очишатисе и просвѣчатисе и сьвршатисе рече тѣмъ. Есть убо начънъшу рещи и сиче благочестивѣ, яко Богъ, провидѣ въ тѣхъ желателное движение, и тѣхъ чины достойныи ихъ приведе, от ихже не убо речеть кто тѣхъ мощи отпасти, заеже имство нѣко стежати къ благому зѣлнаго ради въсхотѣнія и желанія. Аггеломъ же, сирѣчь послѣднему удобре-

надлежащая отнудствия не имуть,¹² отчести въ та пръводатнымъ осияннймъ пръвыми по мърѣ къ тѣмъ изъявляемомъ.

нию, мощи нѣгли и къ хужьшему пръвратитисе. Рече бо тѣхъ и близь мира сущихъ, от нихже мно и диавола некогда быти, прѣжде отпадения. Аще ли кто сихъ съвршённѣше вѣсть, прошу навикнути.

¹² Знаменай, како по чину аггельская удобрения Сьдѣтелнѣ приведеннаа быше.

ГЛАВА 12. ПО ЧТО ИЖЕ ВЪ ЧЛОВѢЦѢХЪ СВЕЩЕННОНАЧЕЛЬНИЦИ АГГЕЛЫ ГЛАГОЛЮТЬСЕ

1. Ищет же се и се умнихъ словесъ любозрителми: аще бо непричестны прѣвысокихъ отнудствѣ суть послѣдныи, кое ради вины иже у насъ священноначелникъ «аггель Господа Вседръжителя» от Словесъ именовасе.*

2. Есть же не супротивно слово, яко мно, прѣдопрѣдѣленнымъ. Глаголем бо,¹ яко всее и прѣвсходещее старейшихъ удобрений силы недостатъчествуютъ послѣдны, честние бо и по мърѣ причествуютъ по единомъ всѣхъ съчланенномъ и съвзномъ приобщени. Рекше светихъ херувимъ чинъ причествуетъ прѣмудрости и разума высочайшаго,² а яже подь тѣми сущѣствѣ удобрения причествуютъ убо и таа прѣмудрости и разума, отчести же обаче яко прѣма онѣмъ и мнѣшее. И еже убо отнудъ въ причести прѣмудрости быти и разума обще есть всѣмъ боговиднымъ умнихъ, а еже приближнѣ и пръвостнѣ, или вѣторичсѣ и умьненнѣ, нектому общнѣ, нъ якоже коемуждо от своее мѣри опрѣдѣленно есть.³ Сие же и о всѣхъ божествьныхъ умовѣхъ не убо кто сьгрѣшнѣ опрѣдѣлнть. И бо якоже пръвы излишнѣ имуть мнѣшихъ светолѣпная свойства, сице имуть послѣдныи яже пръвыхъ, не убо же подобнѣ, нъ умьненнѣ. Ничтоже убо, яко мно, безмѣстно, аще и иже у насъ священноначелника аггела богословие наричетъ, иже по силѣ своей причествующаго аггель пророчскаго свойства и къ изъявителному ихъ уподоблению, якоже мощно чловѣкомъ въспростираемаго.

¹ Знаменай, яко аще и горныхъ силъ отнудства недостатъчни суть послѣдни, нъ убо честние причествуютъ прѣмудрости же и разума и тии.

² Что всешня прѣмудрость и причестие, и что отчести прѣмудрость. А еже «по силѣ своей» произволителну силу достоить разумѣти здѣ.

³ Знаменай, яко еже «опрѣдѣленно есть» не сказуеть здѣ тврьдую нѣку и непрѣступну нужду, якоже мнозы обыкоше глаголати, нъ еже «опрѣдѣленно есть» — вмѣсто еже «въчиненно есть», по опрѣдѣленной нѣкой мѣрѣ силе.

3. Обрѣщещи же,⁴ яко и богы богословие наричетъ небесная и паче насъ сущ'ствия и иже у насъ боголюбивыи и свещенные мужы,* а паче богоначелному скръвенству прѣсущствнѣ всѣхъ прѣизету же и прѣвыше сѣдешу, и ниединому⁵ от сущиихъ тому подобнѣ именоватисе истиннѣ и свьсма могущу. Обаче елика умныхъ же и словесныхъ къ соединению того елико по силѣ отнудь горѣобращаютьсѣ и къ божествннмъ его осияннмъ якоже мощно непрѣстаннѣ горѣпростираютьсѣ еже по силѣ, аще подобаетъ рещи, богоподобиемъ и божествнаго вѣкупоимения сподобляютьсѣ.

⁴ Како бозы глаголютьсѣ аггелы же общимъ именовъ и боголюбивы чловѣци, — по еже «Азь рѣхъ: бозы будете».*

⁵ Како, и коими, и по чесомъ божествннхъ имень сподобляютьсѣ.

ГЛАВА 13. ПОЧТО ОТ СЕРАФИМЪ ГЛАГОЛЕТСЕ ОЧИСТИТИСѢ ПРОРОКЪ ИСАЙА

1. Принеси уже и се по силѣ да смотримъ, чесо ради къ единому Богослов'ць серафимъ послатисе глаголетсѣ.* И бо недоумѣватисѣ¹ кто имать, яко не от мнѣшиихъ нѣкой аггелъ, нѣ самы иже старейшимъ сущ'ствамъ вычтеньни очищаетъ пророка.

2. Нѣци убо рѣше, яко по малѣ отданномъ всѣхъ умовъ приобщения прѣдѣлѣ не единого иже при Бозѣ прѣвостоятелныхъ умовъ именуеть Слово на богословца очищение приити, нѣкоего же от иже намъ надѣстоещиихъ аггелъ яко свещеннодѣйствьника пророку очищения серафимъ вѣкупоимениемъ нарещи ради пожигателнаго реченныхъ сьгрѣшени² отражения и очищенному на божествное послушание възгорѣния, и Слову единого от серафимъ простѣ рещи глаголють не от иже при Бозѣ присѣдещиихъ, нѣ иже намъ надѣстоещиихъ чистителныхъ силъ.

3. Инъ же николи же безмѣлстно что подаст ми отвѣщание о настоещемъ противлени. Рече бо, яко свое чистителное свещеннодѣйство великы онъ (кто-либо бѣ видѣние сѣтворивы аггелъ³ въ еже научити божествннмъ

¹ Понеже противно реченное мнитсѣ реченьнымъ. Рече бо прѣжде сихъ, яко нижшая от прѣвышшихъ тѣмъ, не убо же от горнѣшиихъ научаютьсѣ, рекше трети чинъ от срдѣняго и срдни от всѣхъ вышшаго. Възискано же о семь бысть, и различнѣ раздрѣшисѣ.

² Яко нѣ навикнути божествная, аще не будетъ прѣвѣ грѣхомъ отпушение, ибо серафимъ «пожигатель», рекше «сьгрѣватель», сказуетсѣ.

³ Знаменай, яко божествная пророкомъ видѣния надѣстоещее имъ аггелы глаголетъ, творещее въ мѣчтаннѣ приводити мнѣшиихсѣ видѣти. Гадания бо и образе, не убо же нагы вещи и сущ'ства, зрѣху.

богословца) на Бога⁴ и по Бозѣ на прьводѣйствно священноначелие възложи. И еда когда убо се слово истинствуе? Глаголаше бо иже се рекый, яко богоначелная сила, на вса приходещи, выходит и скрозѣ всѣхъ neodръжанно проходить* и всѣмъ паки ест невидима — не тъкмо яко всѣхъ прѣсуществнѣ прѣизреднаа, нь яко скрвеннѣ на вса посилающипромышлятелная ея дѣйствия. Нь убо всѣмъ умным по мѣрѣ является и свое въкупѣ свѣтодание въручаючи старейшимъ существамъ, тѣми яко прьвыми въ мьншаа себе благоудобреннѣ прѣподаеъ, по коегождо удобрения боговидном умѣрени.

Или да явленнѣйше реку⁵ и присними приказными, аще и недостатчными Бога, всѣхъ прѣизетаго, обаче намъ явленнѣйшими. Солнечние луче прѣподание⁶ въ прьвую вещь благопрѣподатнѣ выходит, всѣхъ свѣтлѣйшую, и тою свѣтлѣ всияваеъ свое зарѣ; приходе же къ дебелѣйшимъ вещемъ, тънчайше иматъ прѣподателное явление от ихже просвѣщающихсе вещи къ свѣтодания проходителному имьству неустроения, и помалу от сего къ свѣсма немалъ непрѣподатно скутаваеъ.⁶ Паки огньнаа топлота⁷ паче себе прѣподаеъ въ приетнѣйшая и къ тое подобию благопослушная и благоводимаа, къ супротивьобразним же или противнымъ существамъ или ничесоже, или тънкъ нѣкой иже от огньнаго дѣйства слѣдъ являеъ. И еже сего множайше, яко къ не сьроднымъ иже искрннѣ къ той имущими приходит, прьвѣе, аще случитсе, възгарателна творещи яже къ възгорѣнию благопрѣложная, и тѣми или воду, или друго что иже от не удобъ възгараемыхъ по мѣрѣ сьгрѣвающи.⁸ По томжде убо естьствнаго благочиния словѣ пачѣ естества

⁴ Зриши ли, яко иже научавающей аггелы открывениямъ пророки сие творааху, възводеще тѣхъ прьвообразнѣ убо на Бога иже всѣхъ вьистину виновнаго, вторичнѣ же на иже по Бозѣ прьвые умове положением и боговиднѣ начелники еже о Бозѣ священноначелия. Сия напрѣдъ учить. Знаменая же, яко вса Божий промыслъ проходить ськрвеннѣ и яко и долнѣйши аггелъ въкупоименнѣ серафимъ именуеъ по приобъщителном прѣдѣлѣ. Вси бо Божию осиянию приобъщуютсе, нь по достоянию коегождо мѣри.

⁵ Како божествная осияния въ овѣхъ убо явленнѣйшая, въ овѣхъ же тънчайшая прѣподаютсе, от притче сказуете.

⁶ Приказнь сия и выше прѣдложисе. Прьвую же вещь глаголетъ стькло и подобная, якоже и дебелейшую, рекьше храме, и врьтепе, и яже подобная.

⁷ Добѣ уподобляеъ Богу огнь, глаголетъ бо Писание: «Богъ же огнь поядей есть»,* — и яко ово убо того сьгрѣваеъ, ово же пожигаеъ, сие и Богъ приходещихъ къ Нему просвѣщаеъ, невѣрующихъ же пожигаеъ, — иже не съ вѣрою приходещихъ и приближающихсе Ему.

⁸ Естествонаа глаголетъ чювьствная и видимая. Достоить вѣдѣти, яко въ умныхъ добродѣтели нѣ суть по случаю, якоже въ нас, нь Богъ убо ест живаа добродѣтель и самосьвршеннаа и нетрѣбователная, яко прѣсуществнѣ вьсуществисе и прѣподателнѣ приходитъ въ яже от тое яко от вини сущее бывшаа умнаа. Источникъ убо добродѣтели оживляющее и обожающее по еже мощно причествующихъ Богъ. Нь обаче въ прошьствие промыслителнѣ приходе въ сущьствленная от Того умнаа, врьхъ и сьвршенение по сем быти умовъ не изгубляеъ, понеже естествонѣ тому ест, не по случаю убо умове, якоже мы,

еже всакого благоудобрения видимаго и невидимаго Чиноначеліе своего свѣтоданія свѣтлость прѣвоявляющѣ въ богатихъ излитіяхъ высочайшимъ существамъ являеть; и тѣми яже по тѣхъ существія божествной лучи приобшуютсе. Та бо разумѣвше прѣвая Бога и божественные добродѣтели прѣвсходителнѣ желающе и прѣводѣтелие быти, якоже мощно, богоподражателные силы и дѣйства сподобляютсе и яже по нихъ существія сама къ уподобленію елико по силѣ боговиднѣ горѣпростирають, обилнѣ тѣмъ прѣподающе въ та пришѣдшее заре, и паки она мнѣшимъ, и въ коемждо прѣво сущему по немъ прѣподаеть дарованнаго и въ вса по мѣрѣ промыслѣмъ приходещаго божествнаго свѣта.

Есть убо въсѣмъ просвѣщающимсе начело еже просвѣщатисе Богъ убо естествомъ и вѣистину сущи яко свѣта⁹ существо и самому еже быти и зрѣти виновнѣ. Положением же и богоподражателнѣ по чести прѣвсходимо сущему по немъ коемждо въ еже божественнымъ свѣтовомъ тѣмъ въ оно приходити.¹⁰ Убо прѣвысокое небесныхъ умовъ удобреніе яже прочіихъ всѣхъ аггель существія по еже лѣпо по Бозѣ начело непшуютъ всакого священнаго богоразумія же и богоподражания, яко онѣми въ вса, и въ насъ, богоначелному осіянію прѣподаему. Тѣмъ же и всако священно и богоподражателное дѣйство на Бога убо яко виновна възносетъ, на прѣвыіе же боговидные умове яко на прѣводѣйственые божественныхъ и учителие.¹¹ Проче прѣво светихъ аггель удобреніе паче всѣхъ имать огньственое свойство и излитое богоначелные прѣмудрости прѣподаніе и разумное прѣвысокаго божественныхъ сияній художства и прѣстолское свойство¹² въспрыпрострѣтое

имуть добродѣтель, разумъ от ухыщрения, рекше, или учения, или правду, или целомудріе въздрѣжания ради, или мужество от благосложения тѣла и жилъ. Не бо якоже ино въ иномъ въ сихъ добродѣтель, нѣ еже своя дѣйствовати и непрѣстанно простиратисе къ Богу и въ себѣ — се въ нихъ богоподражателнаа добродѣтель. Чинъ же обаче якоже иному въ иномъ съхраняють, якоже еже «живеть въ мнѣ душа твоя», — вмѣсто еже учения прѣподаніе: случай же въ подлежащемъ есть, еже нѣсть онамо, несложна бо и невеществна она.

⁹ Богъ, сущи вѣистину естествомъ начело есть въсѣмъ просвѣщающимсе и Виновнѣ и самому еже быти въ всѣмъ сущимъ и зрѣтисе. Положением же, рекше не естествомъ, нѣ положением и богоподражаниемъ, начело суть прѣвышшая существа мнѣшимъ существамъ.

¹⁰ Знаменай, яко по Бозѣ начело всакого добродѣтели суть горнѣйши умове, имиже прѣвыими имама Божіе осіяніе.

¹¹ Знаменай, яко по свойствѣ огньствни горнѣйши умовъ суть.

¹² Добрѣ сказуеть, что суть прѣстола небесныхъ умовъ еже отврѣзненно о Бозѣ разумные имѣти. Прѣстолское же рече свойство удостоятелнѣ данное светымъ прѣстоломъ начело.

богоприетие изъвляющее. Мьнших же существ удобрения¹³ огньствьные, прѣмудростние, разумние, богоприетние силы причествуютъ, умьненнѣ же, и къ пръввымъ зреще и тѣми яко богоподобная прьводѣлнѣ сподобленними на боговидия мощное възводима. Реченная убо светая свойства, ихже въ причести пръввыми яже по тѣхъ существия быше, самѣмъ онѣмъ по Бозѣ яко священноначелникомъ налагають.

4. Глаголаше убо¹⁴ иже сия рекыи видѣние убо оно подьети богословцу единѣмъ иже надстоещихъ намъ светыхъ и блаженныхъ аггелъ и от просвѣщателнаго его руководства на священное оно видѣние¹⁵ възвестисе, по имже зрѣше прѣвысокая существия, яко въ образѣхъ рещи, под Богомъ и съ Богомъ и о Бозѣ сѣдешаа и еже всѣхъ и тѣхъ прѣнеизреченнѣ изредное прѣначелное коньчньство¹⁶ по срѣдѣ подвьшдшиихъ силь прѣвыше сѣдеше. Навыцаше¹⁷ же убо зримыми богословъ, яко по всакомъ прѣсущствьномъ прѣвьсхождении не съсужденнѣ прѣвыше сѣдять Божество всакие видимые и невидимые силы и убо яко всачскихъ есть изредно яко по всемъ ни же пръввымъ сущиихъ существомъ подобно, къ симже и еже всѣхъ то и Начело и Вина существотворна быти, и сущиихъ нераздрѣшнаго Прѣбытия неизмѣнное Създание, от Негоже и еже быти, и еже благо быти, и самѣмъ тѣмъ прѣвьшшиимъ есть силамъ. Таже яже тѣхъ светѣйшиихъ серафимъ навицаеть боговидные силы, священному убо ихъ именованию огньствьное назнаменающу, о немже мало послѣ мы речемъ, якоже намъ мощно сповѣствовати яже на боговидное огньствьные силы възвождения, криль же¹⁸ шестосугубнаго священноустроения еже на божество въ пръввихъ, въ срѣднихъ, въ послѣднихъ разумѣниихъ раздрѣшенное и прѣвысокое въиспрѣпрострѣtie. Нѣ и еже безмѣрожно ихъ и многоличное зре¹⁹ священны Богословъ и еже крилы скутавати²⁰ еже под ногами и еже

¹³ О мьншихъ чинохъ, како пръввыми причествуютъ къ божьствнымъ сияниямъ.

¹⁴ О рекшемъ рече, яко не серафимъ бѣше явивисе Исаяи, нѣкой долнѣйшиихъ аггелъ. О сей бо славъ подвижитсе, еюже прѣд малѣмъ являеть въ начелѣ главизны, идѣже рече «Инь же николиже безмѣстно» и прочая.

¹⁵ Понеже шестокрилата зреть серафимъ. Аще и от долнаго аггела явление научаваше, нѣ на серафимско видиние възвождахусе.

¹⁶ Имаѣт бо слово въ пророчствѣ сице, яко: «Стояху окрестъ Его».*

¹⁷ Зри, что научаваше Исаяи, егоже наричетъ светый Богослова, яко невѣдомо Божество и горнѣйшимъ силамъ, и яко ничтоже от сущихъ подобно Тому. Сия же навицаеть пророкъ по очищени свои сьгрѣшений, о нем же мало послѣди рещи имама.

¹⁸ Рече бо горѣ, на конци десетие главизны, яко всакый умъ, и чловѣчскый, и првие, и срѣдние, и послѣдние имаѣт чины. Вьлѣпоту бо рече шесть криль имѣти силамъ, да убо двѣма покривають лица, срѣдними жы ноги, прочими же къ Божьству възлѣтати, еже рече самъ прѣвысокое горѣпрострѣtie. Знаменай же, что еже многоножное и многоличное серафимъ и почто покриваються нѣди. Знаменай же, како възводитъ шестокрилата светиихъ серафимъ.

¹⁹ На внутреннемъ поле рядомъ безъ какого-либо знака: Навыцаше изъвьнь.

²⁰ Скутавати, рекше покривати.

выше лица видѣние, и еже въ срѣднихъ крилѣхъ приснодвижение къ умному зримыхъ възвождашесе разуму, изъявляемые тому прѣвысокихъ умовъ многошъствныи и многовидныи силы и священнаго ихъ благоговѣинства, егоже имуть прѣмирнѣ о высокыхъ²¹ и глыбокихъ въ яростное²² и сверепое и неприступное испытание, и въ умѣрении богоподражателныхъ дѣйствъ непрѣстаннаго и высоколѣтаемаго приснодвижения. Нѣ и богоначелное оно и многочестное пѣтие²³ тайно навицаше, въображающаго видѣние аггела по силѣ Богослову прѣподающаго своего священноразумия. Учасе же убо того и сему, яко чищение²⁴ есть како-любо очищеннымъ еже богоначелныи свѣтлости и чистоти якоже мощно приобшение. Сие же,²⁵ от самого Богоначелія изредными винами²⁶ въ всѣхъ священныхъ умовехъ прѣмирнымъ скръвенствомъ²⁷ службодѣйствуемо, сущимъ о себѣ яко прѣвышимъ силамъ изъявленнѣше нѣкакъ есть и паче себе изъявляеть²⁸ и раздаваетъ,²⁹ при вторихъ же, или послѣднихъ, или нашихъ разумныхъ силахъ, якоже от того каяждо по боговидномъ растоитсе, тако свѣтлое свое сияние събираетъ къ своего скръвенства единствому невѣднью. Всиявает же на коегождо вторихъ прѣвыми. И аще подобаеть въкратцѣ рещи, прѣвѣе от скръвенства къ явленю ведетсе прѣвыми силами.

Сему убо Богословъ учашесе от свѣтоводителнаго его аггела — еже очищение и всакая богоначелничская дѣйствія, прѣвыми сущствы всиява-

²¹ «О высокыхъ» — заеже покривати лица, «глыбокихъ» же — заеже покривати ноги, срѣднихъ же ради умѣрение являеть.

²² Яростное и сверепое испытание, рекше желателное и устрѣмительное въ еже испытovati яже о Бозѣ, неприступное же — заеже не простиратисе выше мѣры въ высокая.

²³ Еже есть «Светъ, светъ, светъ». Назнаменует же, яко и аггелъ по мѣрѣ своеи силы приемлетъ божественное осияние и тѣ прѣподаеть пророкомъ елико вымѣщаютъ, а не елика тѣ вѣсть.

²⁴ Что есть чищение и како въ умныхъ бываетъ от Бога.

²⁵ Чищение рекше, или приобшение.

²⁶ Не бо яково есть при чловѣцѣхъ чищение, таково есть и при бесплътныхъ.

²⁷ О самомъ томъ Богоначеліи рекше, сирѣчь о Бозѣ.

²⁸ Чищение явѣ.

²⁹ Смотрити подобаеть, яко разньствовати глаголетъ не малѣ въ боговиднѣи всакой бесплътной силѣ, много бо имуть боговидное горнѣйши умове, мнѣше же прочии, поелику и чинъ трѣбуеть прочихъ умовъ, даже до послѣднихъ, вещь же и послѣднихъ наше душе, понеже и всѣхъ умовъ много недостатчствуеть яже въ насъ душа. И божественное убо осияние събранно нѣкакъ паче и съскутанно зритсе прѣма рекше въ дългость растоянню еже къ Богу приближения, събрае образомъ нѣконимъ само то осияние свое изъявление къ единнному и простому егову невѣднью. Невѣдомъ бо есть Богъ не различія ради събраний [рядом — *маргиналий*: събрание разумнѣи здѣ еже от любопрѣмудрѣцъ глаголемо] недовѣдомо намъ, нѣ по единенству нѣкоемъ и прѣма яже у насъ по коемждо и отнудъ непостижномъ неразумнѣи.

ющая въ вса прочая раздаватисе по коегождо къ боготворьнымъ причествиямъ мѣрѣ. Тѣмже и огньствѣ³⁰ чистительное свойство серафимомъ вѣлѣпоту по Бозѣ наложи. Ничтоже убо безмѣстно, аще очищати богословца серафимъ глаголетсе. Якоже бо Богъ очищаетъ всѣхъ въ еже всакого очищения быти вина, паче же (приближнейшею бо прииму приказнию), якоже бо иже у насъ священноначелникъ³¹ своими служители, или священници очищаетъ, или просвѣщаетъ, тѣ глаголетсе очищати и просвѣщати иже тѣмъ освещенномъ чиномъ на того възлагающимъ своя священная дѣйствія, сице и свое чистительное художество и силу, еже чищение богословцу съдѣлуе ангель на Бога убо яко виновна, на серафимъ же яко на пръвѣдѣльнаго священноначелника възлагаетъ, якоже убо кто да речеть съ благоговниемъ аггельскимъ иже отъ того очищаемаго научаетъ, яко «еже въ те отъ мене³² службодѣйствуемаго чищения начело убо есть прѣзито и существо, и съдѣтель, и виновьнъ иже и прѣвая сущствія³³ и къ еже быти приведе, и еже о немъ присѣдениемъ съдрже и съхраняе непрѣложна же и непрѣпадаема и самъ подвиже на прѣвая своихъ промыслительныхъ дѣйствѣвъ причестія (се бо иже симъ ме уче рече³⁴ еже серафима изъясляти послание*), священноначелникъ же³⁵ и по Бозѣ наставникъ, еже прѣвѣйшихъ сущствѣвъ удобрение, отъ негоже еже очищати азъ боговиднѣ наученъ быхъ. Съ убо есть иже мною тебе очищаетъ, имже своя промыслительная дѣйствія отъ скрѣвенства и въ насъ произведе яже всакого вина и съдѣтель чищения».

Симъ убо онъ научи ме, тебѣ же азъ прѣподаю. Твоего же убо есть умнаго и расудительнаго художества или единою реченныхъ винъ раздрѣшитисе недоумѣния и сию прѣдпочисти отъ иные яко лѣпо и благословно и негли истинно имущую, или отъ себе что суще истинному съродное изобрѣсти, или

³⁰ Знаменай, яко огньственое свойство серафимъ есть и како, аггелу очищающу, серафимъ речесе очищати, и прѣжде сихъ Богъ, — по образу и притчи иже у насъ чищения.

³¹ Знаменай, яко священници мнши священноначелника суть, и яко ино просвѣщати и ино очищати, и яко ино служитель и ино священникъ, и яко священникомъ, очищающимъ или просвѣщающимъ священноначелникъ глаголетсе сия творити.

³² *Маргиналий*: Аггелово обычайнотворие.

³³ Яко Богъ, иже всѣхъ подобнѣ умныхъ съдѣтель есть. Тѣ и прѣвая сущствія съдржити и съблюдаютъ къ непрѣвращению и непрѣпадению. Непрѣложнѣхъ же подобаетъ тѣхъ разумѣти по ономъ, по иже суть, сиречь въ бесмъртное, въ животь, по имже въсущствившесе, въ еже быти свѣтъ. Сихъ ради бо и непрѣложни осуществнѣ и въ еже непрѣвращатисе въ странная похотѣванія, а заеже и самовластнѣмъ сущимъ, Богъ съдржити ихъ и съхраняетъ. Еже бо къ Богу въиспрѣпростиратисе тѣхъ есть умнаго произволения, а еже присно о семь удовольятисе, заступления есть Божия. Вса бо трѣбователна Божие помощи.

³⁴ *Киноварный маргиналий*: Посрѣдѣ.

³⁵ Якоже да бы очищаетъ аггель Исаию сия пакы тому глаголаше о серафимѣхъ. Починаетъ же яко отъ аггела въображаемо глаголаніе, идѣже есть аггелово обычайнотворие.

от иного научити, Богу явъ даюшу глаголь и исходатающимъ³⁶ аггеломъ,³⁷ и любоаггельнымъ намъ открыти свѣтлое паче, аще мощно есть и мнѣ паче рачителное видѣние.

³⁶ Яко Божия дания (исправлено черными чернилами на «даяния») происходатають аггелы.

³⁷ Смотри, яко, Богу даюшу намъ «глаголь въ отврѣзене усть»* наших, аггелы происходатають, явъ яко о насъ молещесе.

ГЛАВА 14. ЧТО НАЗНАМЕНУЕТЪ ПРѢДАННОЕ АГГЕЛЬСКОЕ ЧИСЛО

И сие же достойно есть, яко мню, умнаго смотрения, яко Словесье еже о аггелѣхъ прѣдание «тисуще тисушь»* быти¹ рече «и тмы тьмь»,* иже у насъ коньчая чисель въ себѣ възокружае и многовьсугубляе и сихъ ради явъ изьявляе намъ бесчисльные небесныхъ сушьствьвь чины. Многа бо суть блаженная воинства прѣмирныхъ умовь, немощну² и смѣренную прѣизышьдшая иже у насъ тименьныхъ числь мѣру, и от единого разумливаго³ опрѣдѣляема еже въ тѣхъ прѣмирнаго и небеснаго разумѣния и художьства, еже богатѣ тѣмъ дарованнаго от богоначелничьскаго безмѣрноразумнаго прѣмудротворения, всѣхъ выкупѣ сущихъ прѣсушьствьвь сущаго Начела и Вини сушьствотворные силы и объемителнаго накончания.

¹ Сия же въ Даниилѣ реченна быше. По безмѣрномъ, а не по числѣ.

² Немощную мѣру нарече чловѣчко число прѣма аггелѣхъ. Рече бо се и инымъ нѣкоимъ. Близньемъ именовъ, иже слѣпъ бѣ, девятьдесеть и девять овць убо быти аггелы, едину же погыбшую — нас, чловѣкы.

³ Знаменай же, яко и самымъ аггеломъ глаголетъ разумителнѣ, а не учителнѣ, вѣдѣти опрѣдѣления, сирѣчь еже колико небесныхъ сушьствьвь есть число, от Бога и въ семь просвѣщенномъ.

ГЛАВА 15. КЫИ ИЗЪОБРАЗИТЕЛЬНЫИ АГГЕЛЬСКИХЪ СИЛЬ ОБРАЗЫ: ЧТО ЕЖЕ ОГНЕВИДНОЕ, ЧТО ЕЖЕ ЧЛОВѢКОВИДНОЕ, ЧТО ОЧИ, ЧТО РУКЫ, ЧТО УШИ, ЧТО НОЗДРЫ, И ПРОЧАА ГЛАВИЗНЫ ПОДОБНѢ

1. Принеси проче упокоивше наше, аще мнитсе, умное око, еже о единствьныхъ и высокыхъ видѣнияхъ аггелолѣпотные крѣпости на раздѣленную и многочестную широту многовиднаго аггельскихъ зракторений различия съшьдше, пакы от тѣхъ яко от образъ на простоту небесныхъ умовъ възвратнѣ възидемъ. Да будет же тебѣ прѣдразуменно, яко яже священнообразныхъ образъ тлькователная сказанія таяжде есть, егда небесныхъ

сущьствъ удобрення сзешенноначелствующая изъвляють и паки свешенноначелствуемаа и послѣдняя свешенноначелствующая, свешенноначелствуемаа же пръвая и тежде, якоже речесе, пръвые и срѣдние и послѣдние имущая силы, ниединому безмѣстному слову въводиму по такомъ же сказаний образѣ.¹ Аще бо убо свешенноначелствоватисе и ѣкоторимъ от пръвыхъ глаголали быхом, таже тѣмижде свешенноначелствовати, и пръвая паки, свешенноначелствующая послѣдними, свешенноначелствоватисе от самѣхъ онѣхъ свешенноначелствуемыхъ, въистину безмѣстна вещь и съмушения многа испльненнаа. Аще ли же таяжде свешенноначелствовати же и свешенноначелствоватисе глаголемь, некомужде тѣми же или от тѣхъжде, нь самому коемуждо свешенноначелствоватисе убо от пръвыхъ, свешенноначелствовати же послѣдними. Не нелѣпотнѣ² убо кто речеть яже въ Словесехъ свешеннозданная изобразенія таяжде естъ егда мощи и пръвымъ, и срѣднимъ, и послѣднимъ силамъ искрѣннѣ и истиннѣ налагати. И еже къ горнымъ убо обратителнѣ въиспръпростиратисе, и еже въ себѣ неклонителнѣ съобращатисе своихъ суще хранителныи силы, и еже о вторихъ³ причестителнымъ прошьствиемъ промыслѣние тѣмъ въ причести силы быти всѣмъ нелъжнѣ прикладъствуетъ небеснымъ существомъ, аще и овѣмъ убо прѣвсходителнѣ и отнуднѣ, якоже многаши реченно бысть, овѣмъ же отчести и умьненнѣ.

2. Достоить же начети слово и изискати прѣвѣе образъ тлькователная сказанія,⁴ кое ради вины богословие не малъ паче всѣхъ обрѣтаеся почитае огньственное свешеннописание. Обрѣсти бо то имаши не тькмо кола огневидна* наздаваемо, нь и животнаа огняна,* и мужи, яко огнь блистаемые,* и въ самѣхъ небесныхъ сущьствахъ множьства углей огня полагаемо,* и рѣкы неодръжимимъ шумомъ огнепални.* Нь и прѣстола глаголетъ огньныи быти,* нь и самыи прѣвысокыи серафимъ пожигателе суще от именованія изъвляеть, и огня свойство и дѣйство тѣмъ отдаеть, и свѣсма горѣ и долѣ огньственное почитаеъ изреднѣ образотворие.

¹ Горѣ бо рече, яко горнѣше силы свешенноначелствуютъ сущими по тѣхъ, и срѣдние послѣдними, и послѣдние ихъ иже въ чловѣцѣхъ свешенноначелници. Ни бо рече, яко съи чинъ и начелствуетъ сущими по немъ, и начелствуется отъ тѣхъ, нь сиче рече, яко пръвый чинъ (*так!*) начелствуетъ сущими по немъ, начелствуетъ же се сущими прѣжде его. Сиче и о прочнихъ достоить разумѣвати.

² Не безмѣстно глаголетъ иже въ словесехъ Писанія образе всѣмъ небеснымъ силамъ налагати, яко всѣмъ рекше быти высокымъ и спасителнымъ и разумнымъ, аще и не подобнѣ, нь овѣмъ убо прѣвсходителнѣ, овѣмъ же мнше.

³ И нелъжнѣ прикладъствуетъ всѣмъ небеснымъ существомъ еже быти тѣмъ въ причестии промыслѣтѣлныи силы въ общемъ прошьствии еже о вторихъ, въ еже промышлати о нихъ по причестию, якоже рѣхъ, промыслѣтѣлныи силы.

⁴ Знаменай, почто въ аггельскихъ образованияхъ еже огньственное паче приемлетсе и почто яже о небесныхъ огнь яко множае глаголетъ Писаніе и яко серафимъ пожигателіи глаголютсе.

Еже бо убо огньство изьявляти мно еже небесныхъ умовъ боговидное. Свещенни бо богословци прѣсушествное и безобразное существо въ огнѣ многаши исписують, яко имущу многая богоначелничьскаго, аще подобаетъ рещи, свойства, яко въ видимыхъ образѣхъ. Чювьствны бо огнь⁵ есть убо, якоже рещи, въ всѣхъ и скрозѣ всѣхъ несмѣснѣ проходить, и изеть есть всѣхъ, и свѣтль сушь, въкупѣ и яко скръвень, невѣдомъ самъ по себѣ, не прѣдлежащей вещи, въ нейже явить свое дѣйство, неодръжим же и невидимъ, самодръжательнъ всѣхъ, и яже въ нихже аще будетъ, къ своему приводе дѣйствию, измѣнительнъ, прѣподатливъ себе всѣмъ како-либо приближающимсе, обнавлятельнъ животною теплотою, просвѣщательнъ неприкривателными сиянми, неурьжаньнъ, непримѣсьнъ,⁶ расудительнъ, неизмѣннъ, горѣноснъ,⁷ скоростьвнъ, высокъ, ниединого трыпе долѣснога сънижения, приснодвижнъ, такождедвижнъ,⁸ подвизательнъ иныхъ, объемительнъ, необъемлемъ, нетрѣбовательнъ⁹ инога, утаителнѣ възрастительнъ себѣ и къ подъемлющимъ вещемъ изьявляе свое величство, скоръ, сильнъ, въ всѣхъ сушь невидимо, небрѣгомъ небыти мнесе, съ трением же якоже нѣкоимъ възисканиемъ естествонѣ и искрѣннѣ вьнезапу являемъ, и паки непостижнѣ отлѣтае, неумняемъ въ всѣхъ богатныхъ его прѣподанияхъ. И многа убо кто обрѣсти иматъ огня свойствня искрѣнна елико въ чювьствныхъ образѣхъ богоначелничьскаго дѣйствня. Се убо вѣдуше, богомудрны небесная существия от огня наздавають, являюще ихъ еже боговидное и якоже мощно богоподражателное.

⁵ Естествослобие дивно о огни. Огнь зримъ въ всемъ рассянъ, несмѣснѣ же, сиречь не вѣмѣшенъ сущимъ въ нихже есть, «скрозѣ вса же проходить». Сиречь не якоже вода явленно, иже къ земли творить смѣшение, сие и огнь: попадае все и изнурае, изеть же есть, рекше прѣвсходитъ все по изетомъ съставѣ явѣ по еже сильнъ. «Невѣдома» же того «и скръвенна» наричетъ, яко бывае убо въ вещехъ нѣкоихъ, невяляемъ же кромѣ сътрения или кромѣ вещи приетние дѣйства его показуемъ и по семъ «неодръжим и невидимъ». Подобнѣ и прочая огня свойства достоить зрѣти, яже съ отецъ по благочестивѣ възводѣ же и мысли приетъ о Бозѣ же и аггельскихъ естествохъ. Знаменай же, почто Господь Богъ яко огнь видѣнъ бысть многаши и по чесомъ уподобление огня къ Богу.

⁶ Знаменай изречение о чювственномъ огнѣ, рекше похвалу. Расуждаетъ бо и раздѣляетъ вещи, сирѣчь олово отъ серебра, и споения раздрѣшаетъ. Неизмѣннъ же по еже мощнъ прѣбывающу подлежащому, сирѣчь самому существу огньному, не прѣлагающусе въ страдание, яко по еже быти тому округлу, или краеугльновидну, еже есть въ земляныхъ обрѣсти, или пострадати яже въздуха, рекше растлѣтисе въскуренный ради и недугъ многаши нанести, или одобелѣти, или якоже вода прѣложение приети.

⁷ Николиже бо на долняя приходитъ, нъ горѣносимъ есть.

⁸ *Маргиналий*: Подобно движнъ, неизьменуетъ бо се движение его.

⁹ Яко нетрѣбовательнъ инога огнь, а паче трѣбуеть нечесого подлежащаго въ възгорѣние. Нъ не се глаголетъ, нъ яко огнь не смѣшается иной стихии, ниже растварается, якоже вода съ землею. Тѣмъ же и въ стихияхъ единосущствьна того нѣди нарекоше.

3. Нь и чловѣкообразнѣхъ¹⁰ тѣхъ написують умнаго ради и еже къ въиспрѣ имѣти зрительныи силы, и еже образ¹¹ правостное и простое, и еже по естествѣ начелное и владычствное, и еже по чювьствнѣмъ¹² мнѣше, елико къ прочимъ бесловесныхъ животь силамъ, прѣвьсходително же всѣхъ по богатой ума силѣ и по словесномъ художествѣ прѣвьсхождениемъ, и по естественомъ душе непорабощенномъ и недръжимомъ.

Есть же и по коемъждо,¹³ яко мню, телеснаго нашего многочестия образе прикладныи изьобрѣсти небеснымъ силамъ, глаголющемъ очесъ убо изьявляти силамъ еже къ божествнымъ свѣтомъ чистѣйшее възмаяние¹⁴ и паки еже гладкое и водное и не стрѣпотно, нь остродвижное, и чистое, и распрострѣтое бестрастнѣ подьетие богочелныхъ осияний;

а яже обонаний расудительныи силы — еже паче ума благоуханнаго прѣподания, якоже мощно, въсприетное, иже таковыхъ въ художествѣ расудительное и свѣсма отбѣгателное;

а яже ушю силы — еже причестное и разумнѣ подьемителное благоначелнаго въдъхнутя;

а яже въкусныи — еже умныхъ пищу испльнение и еже божественныхъ и питателныхъ излитий¹⁵ подьемителное;

а яже осезательныи — еже естествнаго или врѣдителнаго въ художествѣ разумителное;

въжди же и обрѣви — еже богоприетныхъ разумѣний хранителное;

¹⁰ Почто и чловѣкообразны наздаваются аггелы.

¹¹ «Еже образ правостное и простое», зане, право и горѣ зре, чловѣкъ ходитъ, а не по землѣ сьгръченнѣ, якоже проча животна.

¹² Знаменай различие чювствну бесловесныхъ животныхъ къ чювству словесныхъ нас. Бесловесна бо убо все чювствна суть, егоже ради и състоетсе, безумна сущаа. Въ нас же мало есть еже чювствно, не бо тѣмъ състоимсе, нь умнаго ради, тѣм же и по смерти еше есьмы, душа умна суще. При аггелех же ни же мало есть чювствныхъ, нь образъ дебелъ яже у насъ. **Ино.** Мнѣ же еже въ чловѣцѣхъ по чювствномъ глаголет, не яко инымъ животнымъ вѣщая чювствия имущимъ, нь крѣпчайшаа и скорѣйшаа въ почутие находимихъ. Гадание же се приемлетъ еже о аггелѣхъ не приематисе по всемъ истиннѣ сущиимъ иже въ насъ чювствными, прѣвьсходит бо помногу излишне умние силы, якоже и чловѣкъ умнимъ прѣвьсхождениемъ и помысломъ бесловеснаго естества прѣвьсходитъ.

¹³ Что очи умнихъ сказуеть, и что ноздри, и что уши, и что въкусъ, и что осезание, и что въжде и обрѣви, и что младость, и что зубы, и что рамена, и что мышце, и что прѣси, и что плещен и ноги, и что лъгкое криль, и прочая.

¹⁴ Въ сихъ естестволовитисе свойство телеснаго ока, по възвождени же сия прѣлагаеть, якоже и прочая чловѣцскихъ удъ, въ видѣние яже въ аггелѣхъ естественныхъ силъ.

¹⁵ Излитие разумѣй прѣнеизреченное прѣмудрости излитие, по реченному: «Излъю от Духа Моего на всаку плоть»* и прочая. Прѣходит бо божествный разумъ от Бога умними силами на божественны чловѣкы по коегождо мѣрѣ.

младостни же и юношеский возраст — еже возвращательные присноживительные силы;

зубы же — еже раздѣлительное выдаемаго пищеаго съвършения (коежде бо существо умно дарованное тому от божественѣйшого съединно разумѣние промыслительною силою раздѣляетъ и множить¹⁶ къ меньшого взводителному подобию);

раменѣ же, и мышце, и паки руки — еже творително, и дѣйствительное и скорое;

паки же сердце¹⁷ знамение быти боговидные жизни свою животную силу благовиднѣ въ промышленяемая расщѣвающие;

прѣси же паки изъявляти еже неумекчаемо и хранительное,¹⁸ якоже при подлежащемъ срѣци животворнаго прѣподания;

плещи же — еже събрательное оживляемыхъ всѣхъ силъ;

ноги же — еже движательное и скорое и текущее на божественная шествительнаго приснодвижения. Тѣмже и пернатие¹⁹ богословие светихъ умовъ изобрази ноги. Крыло бо изъявляетъ взводительную скорость и небесную и еже къ въспрь и небесную, и еже къ въиспрь путитворное, и еже всякого нижняго, заеже горѣнно, изето. Крыль же лѣгкость — еже по ничесом же земльное, нъ все несмѣснѣ и не тегостнѣ на высоту взводимое;

а еже нагостно и необуленно — еже отпущенное и благораздрѣшное и неодождимо, и очищае от вѣнѣшняго²⁰ приложения, и еже къ простотѣ божественной якоже мощно уподобляемое.

¹⁶ Всака, рече, умнаа сила иже бываемы въ ту божественны разумъ умножаетъ, сирѣчь сказуетъ къ еже разумѣтисе от насъ, сказующи видѣнная, якоже въ Даниилѣ обрѣсти имаше, егда сказоваше сему аггелъ снъ, егоже видѣ.*

¹⁷ Знаменай, яко прѣдсѣдасе въ насъ срѣце, якоже въ окружени шесталномъ: прѣжде вьнутрь чрѣта бываетъ, потомъ коло окружениемъ бываетъ, такъ и срѣце прѣвѣ жизнь приемле. Понеже и по божественномъ Васили прѣвѣ зиждетсе срѣце, таже, якоже от сроке, рекше от забодения еже въ крузѣ, все тѣло сътвораетсе, тѣмъ же всуть животь простиратисе въ тѣлѣ. Аще бо естествна топлота оживляетъ тѣло, аще ли духъ, аще ли кровь, всѣмъ симъ источникъ есть срѣце. Сего ради и нѣкоимъ възьмнесе все еже оживлятелное въкупѣ и образомъ нѣкоимъ здѣ прѣвѣ паче създае, а паче всуду въ тѣлѣ суще, и не дрѣжимо мѣстомъ, ни же описанно въ мѣстѣ, ни же одрѣжимо тѣломъ. Тако убо и о невидимыхъ чинохъ, или въздѣ, или особѣ службѣнѣ промышленныхъ. Образомъ бо въ срѣдѣ и срѣца мѣстомъ да разумѣваютсе ти, всѣмъ мнѣшимъ сияние истакати по мѣрѣ кождо, якоже бо срока источнику жизни създашесе. А паче неудождими суще и неописуемы мѣстомъ, или честию телеснѣ, ихже съдрѣжетъ промышленяти от Бога вчинены.

¹⁸ Речение сие сложи: «хранительное животворнаго прѣподания», таже — «якоже при подлежащемъ срѣци».

¹⁹ Почто пернати ноги аггеломъ, да покажетъ еже самодвижное, и еже къ Богу горѣ простирательное, и къ земльнимъ непричестное, елико въ еже страстнѣ въ тѣхъ быти, понеже явишесе и на земли аггелы. По страстномъ непричестни земльнимъ, а не по явленыхъ, явише бо се многаши.

²⁰ Вѣнѣшняго приложения — рекше пищу и одежду, имиже яже у насъ съдрѣжетсе.

4. Нь понеже паки проста и «многообразнаа прѣмудрость»^{*21} и непокръвенныхъ одѣваеть,* и сьсуды нѣкоторые даеть носити тѣмь,* принеси и яже небесныхъ умовъ священная одѣяния и орудия, по еже намъ мощно скажемь.

Свѣтлой* убо ризѣ и огненной* назнаменовати мню еже боговидное по огннѣм образѣ и еже просвѣщательное небесныхъ ради покоищъ, идѣже свѣтъ и по всемъ умнѣ сияе, или разумнѣ²² осияваемо, светительской²³ же еже къ божественнымъ и таинственнымъ видѣніямъ приводителное и еже все жизни освещенное;

поясом же* еже родныхъ имъ силъ хранителное, и еже съвкупленному имьству²⁴ въ себѣ съединеннѣ съобращатисе, и округъ съ благоудобрениемъ непрѣпадаемѣмъ тождѣствомъ въ себѣ съобращатисе,

5. паки же жьзломь* — еже царское и владичьствное и правостная вса съвршае;

копиямъ же и секирама* — еже безаконей раздѣлительное и еже расудительныхъ силъ острое, и дѣйствное, и сильное,

²¹ «Многообразная прѣмудрость Божия»* — сие речение апостолско есть. И почто многообразичну ту рече божественный мужь? А паче многообразичное и многокзъннѣе при злодѣи приемлем, инако же и здѣ велики Дионусие просту и многообразичну ту рече, мнит же се обою противно. Глаголемъ убо, яко просту Прѣмудрость сего ради рече, да явить еже несложное Бога, и еже инединаго сугубства трѣбователно, ни же бо от учений прѣмудрь Богъ, нь самовещна Прѣмудрость есть. А еже многообразичное, заеже въ многыи разума виды прѣобразуетсе ради осияваемыхъ немощи. Прѣвосвещенникъ бо есть великъ състражде нашимъ немощемъ.* Или и сице. Проста убо глаголетсе прѣмудрость Божия прѣжде съмотрения, яко вса яко Богъ съдѣла и въ сущиихъ тѣгда правдицѣхъ Свою неприкръвеннѣ показуе силу, якоже при Моусеи и Авраамѣ и прочихъ. Егда же съмотрения таинство* съдѣяе, многообразична вьлѣпоту нареченна бысть. Чловекъ бо бывъ и под Закономъ бывъ, и пострадавъ, и въ мртвѣхъ явисе, сице плтью и сущюю тою немощию обличи всакого врага и ада побѣди, сущиимъ онамо дръжимомъ въскрсение даровавъ. Се есть еже различное Тогови прѣмудрости, яко немощи ради удоуль мнещиимсе врагомъ.

²² И въ иже «О божественныхъ именихъ» словѣ, въ 4 главизнѣ, пространѣ сказасе, что «умно» и что «разумно». Ниня же самъ велики Дионусие изъявляетъ: «умно» убо оно быти, еже разумѣвае, еже вьлѣпоту и вьсиявае свѣтъ глаголетсе, «разумно» же то еже разумѣвай, еже есть и осияваемо. И, въкратцѣ рещи, яже прѣвъзышъдшая сущестия умнаа, мьншая же «разумнаа», и прѣвъсходе есть умъ умно. **Инако.** Умнѣ осиявае — божественно естество, разумнѣ же — осияваемо аггелско.

²³ Знаменай, что светительска одежда въ Езекиилѣ* и Даниилѣ*.

²⁴ Рѣхомъ выше, что есть имьство при бесплѣтныхъ. И прочѣти въ 7 главизнѣ съвкупленное же и нерасходимо разумѣний, — сими являетъ отецъ въ божественныхъ сиянияхъ и своемъ въ благомъ Бозѣ прѣбывателномъ тождѣствѣ съобращающимсе всегда.

землемѣрителным²⁵ же и дрѣводѣлскимъ съсудомъ* — еже основательное, и здательное, и свѣршателное, и еликаа инаа възводителнааго и обратилнааго суть вторихъ промысла.

Есть же егда и иже въ насъ богосудьствъ суть образы, яже наздаваемаа светнихъ аггель орудия,²⁶ овѣмъ убо сказающимъ исправительное наказание или томительную правду, овѣмъ же напастей свобождение, или наказания коньць, или прѣваго благострадания повѣсприетие, или приложение иныхъ дарований, малиихъ или великихъ, чювьствныхъ или разумныхъ. И свѣсма не убо недоумѣтсе зрительны умъ искрѣннѣ уприкладьствити невидимымъ видимая.

6. А еже и вѣтры тѣхъ именовати,²⁷ скорость ихъ изьявляеть и на вса не малъ безлѣтнѣ²⁸ проходимо летѣние, и еже съвыше на долняя,²⁹ и паку от долнихъ къ выспрь ходимо движение, выспрьпростирае убо вторая къ прѣвысокой высотѣ, подвиже же прѣвая къ приобьщителному и промыслителному мнѣшиихъ прошьствию. Речет же убо кто въздушнаго духа³⁰ вѣтрное именование и еже боговидное небесныхъ умовъ изьявляти. Имат бо и се богоначелничьскаго дѣйства образъ и указъ (якоже въ «Образномъ богослови»³¹ по четворостихийнихъ тлькователныхъ сказаниихъ нами многими указанно бысть) по естества подвизателном и скорѣмъ и неурьжаньномъ хождени и невѣдомѣмъ намъ и невидимомъ скрѣвенствѣ двизательныхъ начель и скончаній. «Не бо вѣсы, — рече, — откуда гредеть и камо идеть».*

²⁵ О съсудѣхъ землемѣрителныхъ въ Иезекиилѣ* и Даниилѣ.*

²⁶ О мѣчи же в Царствяхъ и о сръпѣ въ Захарии пророцѣ.

²⁷ Лежешее въ Давидѣ мною тому въспоминати: «Ходей на крилу вѣтрную»,* — негли Христова възнесение сказующу, понеже и на прѣдѣ отецъ облачное тѣмъ наздавати видѣние глаголетъ, заеже рещисе: «Облаци преше Его от очию ихъ».*

²⁸ «Безлѣтнѣ» вьлѣпоту рече, при чювьствныхъ бо истѣйше въ лѣтѣ и къснѣйшая, при бестелесныхъ же и умныхъ безлѣтнѣ и единнѣ и некъснѣ что свѣршеннодѣйствуетсе. Не побаеть убо лѣто при умныхъ именовати.

²⁹ А еже от съвыше на долняя, — якоже при Иаковли лѣствици.*

³⁰ Друго видѣние вѣтрѣ именованія, въздушный бо духъ вѣтрѣ глаголетъ.

³¹ Знаменай и ино съписание тогово быти необрѣтаемо же. Четворостихийна же тлькователнаа сказанія еже четырехъ съставъ възводное иноглаголаніе рече. Образе же, яко мнитсе, паче четырехъ съставъ онамо зрениемъ сказаль есть. Знаменай же, како сказуетъ «Духъ идѣже хоцеть дихаетъ»,* — носимими рѣчми, еже есть яко неурьжимъ, яко скорь, яко невидимъ. Сими указует, яко не о Святомъ Дусѣ глаголетъ, нь о вѣтрѣ прѣноснѣ рече от Еуаггелиа, еже тамо о Святомъ Дусѣ се здѣ о вѣтрномъ дусѣ, — да покажетъ и въ семъ прикладномъ богоначелнаго быти действия изьображение и умнихъ силъ.

Нь и облака тѣмь видѣние богословіе състраяеть,* знаменуе въ сем священныи умове съкрывеннаго свѣта прѣмирнѣ испльненныи,³² пръвоявленное пръвоявление съкрывеннѣ приемлемыи и сие обилнѣ въ вторие второявителскыи и подобнѣ посилаемыи и убо яко плодное тѣмь и животворное и растительное и съврышительное естъ по умномъ дъждерождени, еже приетное нѣдро³³ влажными дъжды на оживляемая зачетія призываемом.

7. Аще ли же и мѣды* и илектра и каменнии многомастных* видѣ богословіе небеснымъ существомъ налагаеть, илектронъ убо, яко златовиднѣ, вкупѣ и сребровиднѣ, являеть негнилостную, яко въ златѣ, и неизънуряемую и неумаляемую и чистую свѣтлость и свѣтлостную, яко въ сребрѣ, и свѣтовидную и небесную зару.

Мѣдию же по отданныхъ словесехъ или еже огневидное, или еже златовидное да въздаеться.

Камень же многомастныхъ видѣннѣмъ изъявляти да непщуется, или яко бѣлимъ еже свѣтовидное, или яко чръвенымъ еже огневидное, или яко русѣмъ еже златовидное, или яко зеленемъ еже юношское и растушее, и по коемждо видѣ обрѣщещи възводителное изобразителныхъ образъ сказание.

Нь понеже сия по силѣ нами доволнѣ реченна быше, непшую, да прѣидемъ на священное сказание небесныхъ умовъ священнообразнаго звѣрообразя.

8. И убо льва^{*34} образъ изъявляти да непщуется еже владичьствное и крѣпкое и неумекчателное и еже къ съкрывенствию неизвещателнаго Богоначелия елико по силѣ уподобляемое умныхъ стопъ прикрывениемъ и таинствнѣ неизводнымъ съкрывениемъ еже по божьствнѣмъ осияни на то выспрѣпростираетелнаго шьствия;

а еже вола^{*35} — еже крѣпкое и младостное и умныи бразды распстраняе въ подьетие небесныхъ и родотворныхъ дъждей, и роговомъ еже блюстное и неудръжимое;

орла же^{*36} — еже царское и высоконосное и скоролѣтаемое, и еже къ силотворной пищи острое и бдителное, и текущее, и благокызньное, и еже къ

³² «Прѣмирнѣ испльненныи» — якоже бо облакъ призываетъ морскую воду и пролѣваетъ ту на лице земли, по реченномъ: «Призываетъ воду морскую и изливає ту на всако лице земльно», * — сиче и умове, приемлюще свой разумъ, облакъ образомъ въ мнѣе простирають.

³³ Приетное нѣдро юже дъжде подьемлемую именоваль естъ землю, тѣми свое раждающую плоды.

³⁴ Знаменай естествоное льва здѣ. Глаголютъ бо, яко ловещихъ утаитисе хоте, ходе, опашию запираеть свое слѣды, да не увѣдетъ их. Тѣмже и о Бозѣ реченно бысть: «Въ мори путь Твой, и стъзи Твои въ водахъ многахъ, и стопы Твои не познаютсе», * — якоже бо путь въ водахъ не снабдитсе, ни же стопы львовы, сиче ни же Божия шьствия.

³⁵ Что назнаменуеть образъ вола.

³⁶ Что же — орла, скоролѣтателно бо животно орль.

обилной и многосвѣтлой лучи³⁷ богоначелническаго слнцопрострѣтя въ очесьь силахъ благомошными горѣпрострѣтиями непрѣткновеннѣ правѣ и неклони- телнѣ зрительное;

а еже конь^{*38} — еже благопокорливое и благобрѣзное; и бѣлимь сущимь еже свѣтлое и яко паче божествнаго свѣта сьродное; чръным же сущимь — еже скръвенное; чръвеним же — еже огневидное и силное; смѣсим же от бѣлаго и чрънаго — еже гредущею силою краевь сьсвезател- ное, и пръвая вторимь, и вторая пръвыимь обратителнѣ или промыслителнѣ сьвькупляе.

Нь аще не слова сматрали быхом мѣру и яже по чести реченныхъ животныхъ свойства и вса яже телесная ихъ наздания, уприкладьствили убо быхом не нелѣпотнѣ небеснымь силамь по отличныхъ подобьствияхъ, ярость- ное убо ихъ въ умное мужство, егоже послѣдне есть ярость уподобление, паки же похотѣвателное въ божествное рачение и, сьвькупивь рещи, вса яже бесловесныхъ животныхыхъ чювствия же и многочестия въ невещствная небес- ныхъ сущьствь разумѣния и единствыные силы възводеще. Довлѣют же умь имушимь не сия тькмо, нь и единаго неистѣзьявительнаго образа тьлкование въ ближнихъ подобнообразное сказание.

9. Да смотрит же се и еже рѣкы^{*39} рещисе, и кола,* и колеснице* сьединенна небеснымь сущствомь.

Огньные бо убо рѣкы* назнаменуютъ богоначалние дъжде, обилное тѣмь и неоскудное течение дающее, и животвориваго крѣмителные рождения; колес- нице же⁴⁰ — сьпреженное вькупочиньныхъ приобщение; кола же⁴¹ крилата убо суще⁴² — въ яже напрѣдъ невьзвратнѣ и неклонителнѣ шьствующе, юже правь и управлень путьшьствителнаго ихъ дѣйствия силу, на тьжде неклони- телный и праворасѣцателны путь всакого ихъ умнаго течения прѣмирнѣ исправ- леннаго.

Есть же и по другомь възводѣ сказати умныхъ кольь образписание. Наречение бо имь бысть, якоже рече Богословь, «гельгель».*⁴³ Изьявляет же се по еврейскомь глась «прѣваляния и открьвенія». Огньствѣнаа и боговидная

³⁷ Глаголет же слово орловомь раждаемыхъ искрѣня от таимичишныхъ сице раздѣляти: аще възреть отврзенама очима къ солнцу, искрѣня суть, аще ли ни, яко таимичишнаа измещутсе от гнѣзда. Сице убо и иже не могы чистѣ на Солнце правды възрети таимичищ тогова разума обрѣтаетсе.

³⁸ Знаменай, что назнаменуютъ кони бѣлы, ирны, чръвены, смѣсны.

³⁹ Что огньные рѣкы.

⁴⁰ Что колеснице.

⁴¹ Что кола.

⁴² Кола же, невьзвратнѣ и неклонителнѣ правь и управлень путьшьствителнаго ихъ дѣйствия на тьжде неклонителны и праворасѣцателны путь шьствующе, всакого ихъ умнаго течения прѣмирнѣ исправленнаго назнаменуютъ силу.

⁴³ Знаменай, что знаменуеть «гельгель» въ пророцѣ Иезекиилѣ.

кола прѣваляния убо имуть въ тождѣство Благо присно обращателнымъ движениемъ, открвения же — скръвенныхъ изьявлениемъ, и иже о нижнихъ възвождениемъ, и еже высокыхъ осияний въ мншая сводителнымъ посланиемъ.

Оставшееся намъ въ сказание еже о радости⁴⁴ небесныхъ удобрений слово. И бо неприятны отнудь суть юже у насъ страстные сладости, сьрадовати же се Богу глаголютсе изгыбшихъ обрѣтениемъ по боговидномъ⁴⁵ удобствѣ и свободномъ отрадствѣ, и еже о промыслѣ и спасении иже къ Богу обращающихся благовиднѣмъ и обилнѣмъ веселии и благострадании⁴⁶ ономъ неизреченномъ, егоже въ причестии многаши быше и мужие священныи⁴⁷ по богодѣйственныхъ божественнымъ осияниямъ нашъствияхъ.

Толика ми и о священныхъ назданихъ реченна да будутъ, извъстнаго ихъ изьявления недостатчѣствуемаа, ползующа же, яко мню, къ еже не смѣреннѣ намъ остати въ образныхъ мычтаняхъ.

Аще ли же и се речеши, яко не всѣхъ прочихъ аггельскихъ въ Словесехъ сильь или дѣйствѣ или образъ сьтворихомъ память, отвѣщаемъ яже истиннаа, яко ихже убо прѣмирное художество не увѣдѣхомъ,⁴⁸ и паче о сихъ мы иного свѣтонаставника трѣбуемъ и учителя, а яже яко реченнымъ единосильнаа оставихомъ, мѣру слова промысливше и еже паче насъ скръвенство мльчаниемъ почѣтше.

Коньць иже «О небесномъ священноначелствѣ» слову Дионусиа Ареопагита,⁴⁹ епископа Афинскаго, къ Тимофею епископу.

⁴⁴ Како глаголютсе радоватисе небесная и само Божество.

⁴⁵ Свободно бо их, и отраднѣ, и удобно, и бестрастно, и блаженно веселие есть.

⁴⁶ «Благострадание» же яко от иже у насъ приемъ рече. Сказует же се оно «благострадание» еже благо всегда имѣти и невѣдно устаменение.

⁴⁷ Сия же не могут се разумѣти, якоже суть, развѣ аще не удостоившимисе такому сьвршению, яковимъ убо и быти подобаетъ мужем, якоже светый сь глаголетъ священникъ, яко и божественныхъ осияний сподобитисе о сущихъ въ разумѣ и въ еже къ Богу чистомъ выспрьпрострѣтии. От таковыхъ бо осияний обожаемъ умъ въ имствѣ бываетъ аггельские сладости и сушаго въ нихъ несъмущения и тишины, по нейже благоудобствуе и отрадствуе прочее умъ, яко въ свободномъ покои бывъ, о спасении спасающихся благостражде, поелико мощно Бога подражаетъ, хотешаго всѣмъ чловѣкомъ спастисе, насладивсе Божиихъ богодѣйственныхъ нашъствий, сирѣчь боги сьдѣлюющихъ и сьвршающихъ.

⁴⁸ Яко подобаетъ недомышляющомусе не стыдѣтисе о нихже недомыслисе, нь исповѣдати неразумнѣе, а не якоже случисе отвѣщавати, от нихже не разумѣ.

⁴⁹ Подобаетъ вѣдѣти, яко познания, яже имѣху еллиние еще сущи, светы сии и по обращени къ Христу бе-студа приписоваху себѣ. Се бо и сь «Ареопагита» наричетъ себе, и божественны Иустинъ въ иже «Къ еллиномъ» словѣ: «Иустина, — приписа, — Философа».*